

**EIGHTH LEGISLATIVE ASSEMBLY OF MIZORAM  
(SEVENTH SESSION)**

**LIST OF BUSINESS**

FOR THIRTEENTH SITTING ON MONDAY, THE 15<sup>th</sup> MARCH, 2021  
(Time 10:30 A.M. to 1:00 P.M. and 2:00 P.M. to 4:00 P.M.)

**QUESTIONS**

1. **Questions** entered in separate list to be asked and oral answers given.

**FINANCIAL BUSINESS**

***\*\* DISCUSSION AND VOTING ON DEMANDS***

2. **DR. K. BEICHHUA**, Minister to submit to the vote of the House various Demands under his charge.
3. **PU R. LALZIRLIANA**, Minister to submit to the vote of the House various Demands under his charge.

H. LALRINAWMA  
Commissioner & Secretary

---

\*\* Please see Bulletin Part-II Sl. No. 168 dated 9<sup>th</sup> March, 2021 for Demands to be moved by Minister.

**SPEAKER** : *Upa hnenah finna a awm a, Khua reiah hriatthiamna.*  
*Joba 12:12*

Zawhna leh Chhanna-ah kan kal nghal ang a, tunah Member zahawm tak Dr. F. Lalnunmawia; hetah hian ‘Dr. F. Lalnunmawia’ kan ti a, ‘Professor’ tia lam thin a ni bawk a, hei hi kan lo record atan khawngaihin, ‘Professor’ tia rawn dahna kha rawn thehlut la khawngaih takin, lam dan a inang lo nuai thin a, ka han ngen che a ni, Member zahawm tak.

Starred Question No. 185 zawt turin Dr. F. Lalnunmawia ka sawm e.

**DR. F. LALNUNMAWIA** : Pu Speaker, ka lawm e. Minister zahawm tak Labour, Employment, Skill Development Entrepreneurship Department changtu chhan atana ka zawhna chu hei hi a ni e –

- a) Covid-19 pandemic avanga Mizoram pawnna hnathawka awm, hna chan anga Mizoram rawn haw engzat nge awm?
- b) Heng hna chante chhawmdawl tur hian sorkarin engtin nge hma a lak tih a ni e.

**SPEAKER** : A changtu Minister zahawm tak Pu Lalchhandama Ralte chhang turin ka sawm e.

**PU LALCHHANDAMA RALTE, MINISTER:** Pu Speaker, Member zahawm tak zawhna chhanna chu hetiang hi a ni e -

- a) Covid-19 pandemic avanga Mizoram pawnna hnathawka awm, hna chan anga Mizoram-a rawn haw zat, Mizoram Youth Commission buatsaih Comprehensive Database of Migrants Workers, 2020-a in report tur kan tih anga in report kan chhinchhiah zat chu mi 2,637 an ni.
- b) Heng hna chante chhawmdawl tur hian Mizoram sawrkar chuan Mizoram Youth Commission kaltlangin hma a la a. 1<sup>st</sup> phase zawh tawh niin, a hnuia Training chi hrang hrang hi pek tawh an ni a. Department hrang hrang kaltlangin he training hi kalpui a ni. Heng training hi mi 720 hnenah pek an ni tawh a ni.
  - 1. Entrepreneurship Development Programme.
  - 2. Decentralized Training/Skill Training.
  - 3. Internship-cum-Entrepreneurship Skills Training.
  - 4. Entrepreneurship and Skill Development Programme for Home based Food processing.
  - 5. Training of Tour Guides te tih zawh tawh a ni.

Heng bakah hian 2<sup>nd</sup> phase pawh peih fel tawh niin, a rang thei ang bera chhunzawm nghal tum a ni. Hetah hian mi 800 cover tum leh a ni e.

**SPEAKER** : Zawhbelhna zawt turin a zawhna neitu Member zahawm tak Dr. F. Lalnunmawia ka sawm e.

**DR. F. LALNUNMAWIA :** Pu Speaker, Covid-19 avanga Mizorama rawn haw kha report aia tam fe an niin a hriat a, mi thahnem tak MYC-a in report lote pawh an awmin a hriat a, khang mi tam takte kha idea nei tak tak, mahni kut kea eizawng tura phailama experience zuk nei tak takte pawh kha an awm niin a lang a. Chutih rual chuan hengah bultanna tur sum neilo leh harsa tak takte pawh kha niin an lang hlawm a, khangte kha tanpui dan ngaihtuah theih a ni ang em? Labour cess te hian an bul tanna tur ang kha a theih ang anga dap sak theih an ni ang em, tih kha ka zawt belh a ni e.

**SPEAKER :** Zawhbelhna zawt turin Member zahawm tak Pu Lalrintluanga Sailo ka sawm e.

**PU LALRINTLUANGA SAILO:** Pu Speaker, ka lawm e. Ka zawhbelhna chu hei hi a ni e -

LESDE Department hian returned migrants workers te tana an hmalakna bakah Covid-19 chhung hian workers welfare tan eng hmalaknate nge a neih. A pahnihna-ah chuan, foreign-ah Mizo thalai tam tak inhlawhin Agency te tirh chhuahin an kal thin a. Heng Agency te khuahkhirhna dan hi mumal tak Mizoram sawrkar-in a nei em? Nei ni se, tunge chu dan chu kengkawh tih ka zawt e.

**SPEAKER :** A theih ang ang chhang turin Minister zahawm tak ka sawm e.

**PU LALCHHANDAMA RALTE, MINISTER:** Pu Speaker, Member zahawm tak zawhna neituin a zawahah khan returned ‘migrants workers’ han tih chat lai hi a zat chiah hi hriathiam a har a. Covid-19 avanga lo haw hrim hrim hi sawrkar record-ah chuan, State pawn atang hian mi 23,705 niin kan han hria a. Amaherawhchu tam tak kha zirna avanga ram pawnawmte, family-a awm hrim hrimte an ni a. Keini ina kan han buaipui ber chu hnathawka zuk inhlawhfa lo hawte, chung chu kan theih ang tawka chhawmdawl turin sawrkar kan lo inruahmannaah MYC kaltlangin in report turin kan ti a, chutah chuan mi 2,637 te hi in report an ni.

Zawhna neitu ina a sawi ang deuh khan anni lo tanpui tur hian labour cess atangte khan a tih theih em tih lai kha, labour cess chiah nilo hian MYC hian North Eastern Council-ah anni tan hian sum kan dil a, a thawh khatna atan hian vaibelchhe 3 min rawn pe a, chung vaibelchhe 3 hmang chuan nichina kan sawi ang khan mi 720 te training hrang hrang, an eizawnna tur ruahman sakna kan neihpui a. Chu lo lehah chuan a phase hnihna-ah NEC-ah tho vaibelchhe 2.7 min rawn sanctioned leh a, chu chuan mi 800 cover tumin leh ruahmanna dang pawh nei zelin training chi hrang hrang, an eizawnna turte an siamremna tur atan kan buatsaih leh a, labour cess tak chu hemiah hian kan hmang lo a ni.

Chutih rual chuan Member zahawm tak Pu Lalrintluanga Sailo rawn zawhna nen khan chhan kawp theih niin ka hria a. He Covid-19 pandemic avanga harsatna kan neih lai

hian LESDE Department hian nasa takin hma kan la ve a, labour cess kan neih tling khawm atang hian kan Board meeting chuan kan theih ang tawkin kan mipuite harsatna, a bik takin Workers Welfare Board member-te harsatna pui turin i luang chhuak ang kan ti a. Chutah chuan a thawh khatna atan hnathawk theilo, workers welfare member zawng zawng mi sing 5 zet zawtte hnenah anmahni account theuhah ₹3,000/- kan thun theuh a, chumiah chuan cheng vaibelchhe 1,58,241,000 kan seng a. Tin, chu bakah chuan mipui ten hnathawka inhlawh theilo leh ei bar harsatna an tawh avangin a tanchhan lian berah kan member-te piah lamah thingtlangah phei chuan khawchhunga ration buhfai la te zawng zawng hnenah sum faiin, Food, Civil Supplies & Consumer Affairs Department hnenah nuai 640 chuang pein, ration thla khat chhung a thlawna lak theih turin FCS & CA hnenah sum kan pe a, chumi hmang chuan he pandemic chhunga LESDE Department ten kan hmalakna hi kan kalpui a ni.

Tin, kan Member zahawm tak Pu Lalrintluanga Sailo zaghna tho, foreign agency, foreign-ah hnathawktu tam tak kan inthawn a, heng mite enkawlne, khuahkhirhn chungchang kha, January Ni 1, 2016 atanga hman tan tur khan Mizoram Private Placement Agencies Regulation Act, 2015 hi Ni 16 November, 2015 khan Mizoram sawrkar Home Department chuan a notified tawh a, he Act hnuiah hian Rules hi June Ni 21, 2017 khan Home Department in a notify ve leh a. Heng hnathawka eizawng thawn chhuaktute hi LESDE Department ina kan enkawl an ni chiah lova, anni hi Home Department hnuia in register-te an ni e.

**SPEAKER :** Starred Question No. 186 zawt turin Member zahawm tak Dr. Vanlaltanpuia kan sawm e.

**DR. VANLALTANPUIA :** Pu Speaker, ka lawm e. Ka zaghna Starred Question No. 186, kan Minister, Personnel & Administrative Reforms Department changtu zahawm tak chhan atan

- a) Sawrkar Department hrang hranga post ruak awmte hnawhkhah tumna a awm em?
- b) Post thar siam (create) tumna a awm em?
- c) A awm chuan eng post te nge, tih a ni e. Ka lawm e.

**SPEAKER :** A chhang turin a changtu, Dy. Chief Minister zahawm tak Pu Tawnluia kan sawm e.

**PU TAWNLUIA, DEPUTY CHIEF MINISTER:** Pu Speaker, Member zahawm tak Dr. Vanlaltanpuia zaghna chhanna chu:

- a) Sawrkar Department hrang hrang hnuia Post ruak, a bikin Promotion Quota leh Limited Departmental Examination (LDE) quota te hi chu hnawhkhah reng a ni a. Amaherawhchu, Direct Recruitment Quota bik erawh hi chu sawrkar sum leh pai dinhmun leh department-in an mamawhna thlir chung zelin a tul ang zel a hnawhkhah thin a ni.

- b) Tun maiah chuan post thar siam (create) tumna a awm hran lova. Amaherawhchu, department-in an sum leh pai dinhmun a zir zela post thar siam (create) chungchang hi ngaihtuah thin a ni.
- c) A awm chuan eng nge, tih a ni a, tunah khan a chhang fiah sain ka hria.

**SPEAKER** : Zawhbelhna zaws turin a question neitu Dr. Vanlaltanpuia ka sawm e.

**DR. VANLALTANPUIA** : Pu Speaker, ka lawm e. Ka zawhbelhna chu - MPSC hian eng post chin nge a recruit thin? Pahnihnaah, MSSB hian eng post chin nge a lak thin? A pathumna, a department-in departmental in eng ang chin nge lak? Tin, a tawp berah chuan, Mizoram Youth Commission, 2008 hi a din tirha thawkhote hi a ngai reng mai hian kan la awm a, kan mamawh hle mai a. Hei hi tuna pahnihna zawhna min chhanna ang khan a tul ang zela ngaihtuah zingah khan min rin lut ve thei em tih kha ka han zaws a ni e.

**SPEAKER** : Zawhbelhna zaws turin Member zahawm tak Pu Lalrinsanga Ralte ka sawm e.

**PU LALRINSANGA RALTE:** Pu Speaker, ka lawm e. DP & AR changtu Minister zahawm tak chhan atan ka zawhbelhna chu hengte hi an ni e.

Mizoram-ah IAS cadre post engzat nge awm? Mizo IAS engzat nge tunah hian kan neih tih leh Mizoram sawrkarah hian tunah IAS engzah nge awm tih a ni a. Tin, Pu Speaker, MCS cadre post hi engzat nge awm? MCS post ruak engzat nge awm? Post ruak a awm chuan fill-up tumna a awm em, tih kha ka zawhbelhna a ni e.

**SPEAKER** : Opposition lam in va phar ve lo ve maw le, ka han hawi thin a. Zawhbelhna zaws turin Member zahawm tak Dr. Z.R. Thiamsanga ka sawm e.

**DR. ZR. THIAMSANGA** : Pu Speaker, ka lawm e. Covid-19 kan hriat hma khan kan CM zahawm tak duhsakna avangin Health Department hian post 700 vel lai mai post ruak kha kan indaih loh em avangin hnawkhkhan phalna min han pe a ni a. Amaherawhchu, Covi-19 avangin kan indaih lo hle nachungin hnawkhkhan theih a ni ta lo a. Chuvang chuan tunah hian doctor te, nurse te, health workers te, technician te kan indaih lo a. Health Department hi department dang a pawimawh lo e tihna ni lovin mihring deal tu kan ni a, bial tinah, hmun tinah, Sub-Centre ah te health worker te, technician te, doctor te, staff nurse te kan mamawhna a sang a. Chuvang chuan hetiang boruak hi ni mah ila kan mamawh zual hi priority min pe thei ang em tih hi kan Minister zahawm tak, Personnel & Administrative Reforms Department changtu ka zaws a ni.

**SPEAKER** : A theih ang ang chhang turin a changtu Minister zahawm tak Dy. C.M. Pu Tawnluia ka sawm e.

**PU TAWNLUIA, DEPUTY CHIEF MINISTER:** Pu Speaker, zawhbelhna kha a awm nial a, engpawhnisela a theih ang angin ka han chhang ang a.

IAS cadre post Mizoram segment-ah hian post 32 hi IAS chanpual a ni a, tunah hian serving (a thawk lai) hi 22 IAS kan nei a. Tin, MCS cadre post 234 kan neih ah hian serving hi 186 an awm a; tin, deputation-ah hian 20/30 hi ti hian a kal reng bawk a. MCS hi kan indaih lo hle mai a, tunah pawh kan chhut dan chuan MCS-ah hian vacant post 80-90 bawr a awm a. Tichuan, IAS leh MCS cadre post te hi hetiang hian awm mahsela an inkalpawlh chin a awm lo thei lova. IAS te kha kan nei daih ngai lova, MCS leh engemaw senior atangin tikhan adjustment kan siam thin a. Tunah hian IAS hi senior Mizo 5-te tun February thla tawpah hian an retired a, chung hnawhkhahna turin Home Ministry-ah Mizo officer kaisang thei tur te kan thehlut mek a. Chumi Mizo te kaisanna tur bik, quota a kha chutiang chuan kan bawhzui mek a ni.

Tin, MCS kan tih hi Combined Service Examination kan ti a, chutah chuan tunah hian theih ang tawkin hma kan la a. Tunah hian combined examination ah hian MCS 8, MPS 8, tin, Finance Service 8, MIS Information 4, a vaiin 28 hi tunah MPSC hian advertisement a chhuah a, kumin chhung hian exam tum a ni. Chutiang chuan kan post ruakte hnawhkhahna tur n sorkarin a tul ang angin hma a la a ni. Tin, post ruak hnawhkhah hi Pu Speaker, kan chhannaah khan a chiang khawp mai a. Sorkar hian a pawng a puin post ruak awm apiang kha a hnawhkhah lova, mahse department in an rawn proposed a, DP&AR-ah a lo kal a Finance te, hetah CM approval te lak hnu ah hnawhkhah chho zar zar a ni, promotion post te pawh. Tin, Limited Departmental Examination chu anmahnii, khatiang khan. Tin, direct tak kha chu kan sum dinhmunin a zir ang zel khan restriction kan nei a ni.

Tin, recruitment chungchangah hian MPSC-in a khawih tur chin engzat nge tih kha, chu Group ‘A’ leh ‘B’ gazette chin kha MPSC hian recruitment a ti a. Tin, kan siamthar tak Mizoram Subordinate Service Selection Board tuna function tan mek ina recruitment a tih tur chu Group ‘B’ (Non-gazette) ho kha an ni a. Tin, Departmental Promotion Committee ina a lak tur ang tuna siam hi chu Group ‘C’ leh ‘D’ te an ni. Chutiang chuan kan theihtawpin kan Dan te zawm chungin leh kan sum dinhunte enhungin tunah hian recruitment pawh direct-in tam tak tih a ni tho a, tin, promotion phei chu mi promotion han block kha a hrehawm khawp mai a, chuvang chuan promotion-ah pawh hian post fill-up hi chu a kal chho reng a ni tih kha ka chhanna a ni.

Hmanni ka wind up naah khan ka sawi a, tunah information atan ka sawi leh ang a. Tunah hian Mizorama sorkar hnathawk sanction post kan neih hi chu avaiin 44,500 a ni a, chutah chuan regular 28,654, contract 317, provisional employee 993 te ani. Tichuan, vacant post tuna kan neih lai mek hi 14,536 a ni a, kan mamawh ang zelin direct pawhin recruitment kan ti a, amaherawhchu, a nawlpuia kan mamawh ang apiang tih kha chu kan sum dinhmunin a tlin rihloh avangin kan la ti lo a ni.

Tin, Champhai North bialtu leh kan zawhna neitu khan an rawn sawi ve ve a, keimahni department a hnaruak, a bik takin priority pein equipment hi kan pe thei dawn lawm ni tih pawh kha, Pathian zarah damin kan awm ang a, covid boruak pawh a ziaawm hret hret a, budget session te kan nei a, financial tharah chuan DP & AR lam atangte pawhin rawtna (proposal) department hrang hrang atanga kan hmuh tuna tlingkhawm ruih te pawh hi zawi zawiin hetiang hian Finance-ah te; tin, CM approval lak tih pawh hi, kan tum a, mahse a chhanna dik bera kha chu, kan sum dinhmunin a zirin kan mamawhnaah hi chuan direct recruitment pawh tih char char kha sorkar kalphung a ni tih kha ka sawi duh a ni e. Pu Speaker, ka lawm e.

**SPEAKER** : Starred Question 187 zawt turin Member zahawm tak Dr. K. Pachhunga ka sawm e.

**DR. K. PACHHUNGA** : Pu Speaker ka lawm e. Starred Question No. 187, Hon. Minister chhan atana ka zawhna chu –

Mizo thalai, Nula-Tlangval ten sorkar hna an neih tam zel theih nan, State sum atang nilo, Union Home Ministry enkawl tur Mizoram Territorial Army Battalion emaw Mizoram Scout Regiment Battalion din theih nan central sorkar-ah hma lak theih a ni ang em, tih ani a. Pu Speaker, khawngaih takin i remtihain, hei hi State subject niin, Mizoram State thuneihna a ni lova, nimahsela, han zirchian deuh hian thalaite lehkathiam a hmei a pain kan tam ve tawh a state sorkar-ah hna a harsa tan a, chuvang chuan tunlai khawvelah India leh a thenawm ramte, abikin China leh Myanmar-ah te pawh a ni ang a, India sorkar pawh a inrawlh viau a rinawm a, Sikkim-in Scout Regiment a nei tawh a, Arunachal-in Territorial Army a nei a, Madras Territorial Army a ni bawk a, chutiangin Indo-Tibetan Border Police te pawh a awm a, Indo-Myanmar Border Police te pawh chutiang chuan rilruin zau taka dap theih anih ka ring a. Hei hi Mizoram sorkar thuneihna a ni lova, all NGOs ang te pawhin dil chi anih ka ring a, kha kha ka han sawi zau deuh a ni e. Ka lawm e.

**SPEAKER** : Chhang turin Home Minister zahawm tak Pu Lalchamliana ka sawm e.

**PU LALCHAMLIANA, MINISTER:** Pu Speaker, Member zahawm tak Dr. K. Pachhunga zawhna kan chhanna hi a sawi zau ang deuh khan keipawh ka duhthu a sam vak lova, ka lo enchiang lo deuh hlek niin ka hria a, pawi ka ti a. Ka han chhang phawt ang a supplementary lamah duh leh chiang deuh zawkin kan la sawi ang a.

Mizo thalai ten sorkar hna an hmuh tam zel theih nana Union Home Ministry enkawl tur Mizoram Territorial Army Battalion emaw, Mizoram Scout Regiment Battalion emaw din chungchang hi Home Department huang a ni chiah lova, Sports & Youth Services lam subject anih angin rawn anni a. Sports & Youth Services lam chuan a theih leh theih loh tun

dinhmunah chuan an hre lova, Union Home Ministry-a thlen an tum dawn thu an sawi a ni tih kha ka chhanna ani e.

**SPEAKER :** Zawhbelhna zawt turin member zahawm tak Pu C. Ngunlianchunga ka sawm e.

**PU C. NGUNLIANCHUNGA:** Pu Speaker ka lawm e. Ka zawnha hi vawiinah list-ah hian a awm a, Starred Question No. 193 dahi a ni a, a chhuah hmanloh hmel riau mai a, chuvang chuan zawk belhna lam atangin ka han zawt mai ang e. Ka zawnha chu kan Home Minister zahawm tak chhan atan –

- i) Hripui len laia Kohhran thenkhat sorkarin Standard Operating Procedure an zawm loh vanga pawisa chawitir an awm em?
- ii) An awm anih chuan, eng kohhran leh khawi khua a mi nge?
- iii) Engzat nge pawisa hi chawitir an nih?
- iv) Hetianga chawitir ve dang hi Pawl emaw, Kohhran emaw, Veng emaw an awm em?
- v) Chutianga chawitir an awm anih chuan tute nge, engtik hunah nge?
- vi) Dan bawhchhia zawng zawngte chawitir an nilo em ni?
- vii) Kan Chief Minister leh MOS (Sports) te chawitir an ni ve em? Ni lo se engnge a chhan, tih kha ka zawk belhna ani e.

**SPEAKER :** Zawhbelhna dang zawt turin member zahawm tak Pu Vanlalhlana.

**PU VANLALHLANA :** Pu Speaker, ka zawk belhna chu –

Kum 2019 khan Union Home Minister Amit Shah Mizoram-ah a lokal a, citizenship amendment bill buaipui lai kha a ni a, Aizawla a lo kala a sawi chu- Mizoram thalaite an awmna tur central-ah eng force berah emaw, eng battalion emaw Mizo thalaite luh hukna tur kha a sawi a ni. Chu chu sorkar hian a bawhzui lo niin ka hria a. He House-ah pawh hian kan sawilang tawh a, executive meeting-ah te pawh kan sawilang tawh a, tunah hetia zawnha a lo kal takah chuan, engatinge sorkar khan a bawhzui loh, Union Home Minister-in helaia a sawi kha a ni si a tih kha ka zawk belh e.

**SPEAKER :** Zawhbelhna zawt turin Member zahawm tak Pu C. Lalsawivunga i lo sawm ang.

**PU C. LALSAWIVUNGA :** Pu Speaker, ka lawm e. Starred Question No. 196 hi a chhanna a awmsa tho turah ka ngai a.

- a) MNF Election Manifesto, 2018-ah ‘Inremna thuthung angin Minority-te dikna leh chanvo humhalh a ni ang’ tia dah a ni a. Mizoram chhunga Minority te chu tute nge?
- b) Mizoram Minority-te ziah lanna leh tihchianna India Constitution-a a inziah dan detail-in min hrilh thei em, tih ka zawk belh e.

**SPEAKER :** Zawhbelhna a kar kikin a kil hle mai a, a theih ang anga chhang turin a changtu Minister zahawm tak Pu Lalchamliana ka sawm e.

**PU LALCHAMLIANA, MINISTER:** Pu Speaker, zawhna neituin a zawk chhan tak kha chu Mizo thalai ten eizawnna an hmuh theih nan Scout Regiment emaw Territorial Army emaw din tih chungchang kha a ni a. Hei hi a pawimawh khawpin ka hria a, a rawn zawt nawn lo na a. Mizoram Ex-Service League ho pawh hian Territorial Army emaw, Border Guarding Force emaw hi an ngaipawimawh a, heta ka han that ve tirk pawha an rawn sawi a ni. Amaherawhchu, Mizoram sorkar thuneihna a ni lova, Central sorkar thuneihna a ni a, chuvangin heng Territorial Army emaw, Scout Regiment emaw te hi Central Ministry of Defence leh Home Ministry te inbiak rawna tih chi chu a ni.

Tin, India Sorkar hian ramri venhim hi a ngaipawimawh a. 2016 khan Madugar Gupta Committee a din a, India Home Minister hlui Madugar Gupta, Aizawl-ah te pawh an rawn kal a ni. Aizawl an lo kal tum hian Mizoram sorkar hmasaah khan a ni a, Border Guarding Force Battalion din a lo rawt a, Burma lam leh Bangladesh lama dah turin. A chhan chu BSF leh Assam Rifles te hian khawchhung mi an nih loh avangin, tunge tual chhung mi nia, tunge foreigner lo lut tih kha a tak takah chuan an hrehrang hlei thei lo a ni. Chuvang chuan a tak takah chuan tualchhung mite kha dah ni se tih a ni a. Chu chu Gupta Committee hian positive deuhin, ‘hei hi dah nise’ tiin Home Ministry ah pawh a recommend a ni. Amaherawhchu a inchiah ta vang vang a, kan sorkar leh hnu khan Member zahawmtak Pu Vanlalhlana sawi ang deuh khan, Union Home Minister, Amit Shah lo zin tum khan kan Chief Minister zahawmtak hian a lo raised leh a ni. Amaherawhchu ka hriatsual loh chuan Home Minister khan, “State in intih dawn chuan pawisa in nei leh si lo ang a, CRPF Battalion emaw, Central Force Exclusively for Mizo Youth tan din ni se a tha zawk ang” tiin a lo chhang a, mahse kha pawh kha thutakah a chang ta chuang lo a ni.

Tin, Boder 13<sup>th</sup> Force Battalion leh Madugar Gupta Committee pawhina a lo recommend tawh kha a puitlin theihna turin he sorkar hian theih tawp a chhuah a, a bawhzui lo em ni, tih zawhna kha, theih tawpin kan bawhzui e. July Ni 9, 2019 khan Chief Minister zahawmtakin Union Home Minister hnenah DO a thawn a, nikum Dec. Ni 9, 2020 khan reminder a thawn leh bawk a ni tih kha, he House zahawmtak hi ka hriattir a ni.

Tin, zawhna dangkha a inpersan ang reng a, mahse hei a chhanna a awm a, hripui len laia kohhran thenkhatin SOP an zawm loh avanga pawisa chawi tir an awm em tih kha, ‘Awm e’ tih kha a chhanna a ni. Chungte chu EFCI Kohhran Sakawrdai, EFCI Kohhran Vaitin, Mizoram UPC, Mualthuam North te an ni a, chungte chu ₹5000/- theuh chawitir an ni a. Tin, pawl emaw, Kohhran emaw a dang an awm em a ti a, ‘Awm e’ tihkha a chhanna a ni a, Chungte chu - Bharatya Janata Party (BJP), Lawngtlai District, dt.29.10.2020 leh Indian National Congress (INC) Congress Bhavan dt.12.1.2021 chawitir an ni bawk a ni.

Tin, Chief Minister leh Sports Minister te chawitir an ni ve em tih kha, report tu an awm lo anih ka ring, report tu awm se chu chawitir ve mai awmtak.

(...*interruption...*)

**PU C. NGUNLIANCHUNGA:** Pu Speaker, TV-ah khan khawthlang lam an kal kha an zawn a, an phu luai luai a, hek hrarpa an ngai em maw ni le? Kar hmasa Zirtawpni resolution sawi ni khan, kan House Leader zahawmtak hi a fair ve ka ti a, a bawhchhiat thu kha a sawi mai a, ‘keini ai chuan vairamah an bawhchhe nasa zawk’ a ti a ni. SOP kha chu an bawhchhia a, kha kha hek kher a ngai emaw ni le?

**PU LALCHAMLIANA, MINISTER:** A chawitirtute khan an lo en fuhlo emaw dawn le.

(...*interruption...*)

**PU C. NGUNLIANCHUNGA:** Pu Speaker, *zawng rengte serthlum veng* kan ang hle mai a.

**SPEAKER** : A rei tawh em mai, chawitir tawh lo mai rawh aw.

**PU LALCHAMLIANA, MINISTER:** Tin, Pu Speaker, Member zahawmtak Pu Sawivunga zawhna kha, a har khawp mai a, minority chungchang hi, kan sawi tak tak chuan Pu Robert a leh Pu Nguna hi an inhnial leh ngat ngat dawn a nia. A zawhna chhanna a ziak awmsa hi kan sawi lang mai ang a.

MNF Election Manifesto, 2018-ah “Inremna thuthlung angin Minority-te dikna leh chanvo humhalh a ni ang” ti a dah a ni a. Mizoram chhunga Minority te chu tute nge tih lai tak hi an inhnialna kha a ni a. Kan rilru hi chuan Mizoram chhungah na na hi chuan ‘chu mite’ tia kawh chu a nei hlawm a ni. Mahse dan leh hrai hnuaiah minority te kha identified an nih loh avang khan inhnialna kha awm thei tak a lo ni ta a. A chhanna chu- Mizoram sorkar hian eng community mah a hrarpain puan a nei lova. Ministry of Welfare Notification S.O.816(E) dated 22.10.1993 leh Ministry of Minority Affairs Notification S.O.267(E) dated 27.01.2014 in Minority a puan te chu - 1) Muslims 2) Christians, 3) Sikhs, 4) Buddhists, 5) Zoroastrains (Parsis) leh 6) Jains te an ni. Mizoram Minority bikte ziah lanna Indian Constitution ah emaw Rules ah emaw kan la nei rih lo a ni.

**PU C. NGUNLIANCHUNGA:** Pu Speaker, nichin khan kan hming kha Home Minister zahawmtakin a lam rik takah chuan, Pu Roberta nena kan inhnialna bik deuh kha chu PMJVVK chungchang kha a ni a. Kha mi scheme-ah kha chuan religious minority kha a tin deuh bik niin a lang a, a ziak phei chu ka nei lo nain lo practice tawhah chuan religious minority te chawikanna tura tih deuh kha a ni a, kha kha kan han tanchhan tak pawh a ni e.

**SPEAKER :** Ngawi rawh u aw. Kan House hi a zahawm thin a, Zawhna a chhuah hman loh khan ‘heta zawhna a chhuak hman lo a’ tiin in zawt thin a. Chhuak lek lek tawhin member pui tho khan an lo nghak thin a. Hei hi chu tih loh thin dan chu a ni a, tun hnuah chuan ti tawh lo ang u aw. A bul a mite hian a lo nghak thin a, tu pawh kha ni se. Tin, tlaiah a chhanna fiah takin an rawn pe leh thlap che u a ni tih kha ka sawi duh a ni e. Tunah chuan Starred Question No.188 zawt turin Pu Lalrindika Ralte ka sawm e.

**PU LALRINDIKA RALTE:** Pu Speaker, ka lawm e. Agriculture Minister zahawmtak chhan atan ka zawhna chu - Divisional Horticulture Office (DHO) Tuidam ami hi –

- a) Khawi hmunah nge sawn a nih?
- b) Lak chhuah/sawn a nih chhan min hrilh thei em, tih a ni e.

**SPEAKER :** Chhang turin Chief Minister zahawmtak Pu Zoramthanga ka sawm e.

**PU ZORAMTHANGA, CHIEF MINISTER:** Pu Speaker, Member zahawmtak Pu Lalrindika Ralte zawhna chhanna chu :

- a) Divisional Horticulture Office (DHO) Tuidam hi sawn ni lovin nuaibo a ni.
- b) Sorkar Notification No.A.13032/1/2016-HORT/pt angin Horticulture Department chu restructure a ni a, chuvangin Divisional Horticulture Office Tuidam chu Block Horticulture Office atan hman a ni ta zawk a ni.

**SPEAKER :** Zawh belhna zawt turin a zawhna neitu Member zahawmtak Pu Lalrindika Ralte, chumi zawh Dr.Vanlalthlana.

**PU LALRINDIKA RALTE:** Pu Speaker, ka lawm e. Nie, Divisional Horticulture Office hi 1994 vel atanga lo awm tawh kha a ni a, kum 26 a pum tawh a. Tuna a rawn sawi ang khan nuaibo a ni a, kan ui khawp mai a. Block kha chu a aia te zawk kha min pe a, kan lawm tho na chungin tunlai khawvel thang zelah chuan a te lama han intih kha chu kan lawm a kim chiah lo a, sawi neuh neuh a tama, heng hi central atanga sorkar laipuiin ruahmannna a siam avanga hetianga tihdanglam a ni tih te sawi a awm a. Tin, sorkar thu pawh a ni lo tih te a awm a, chu chu thu dik tak min hrilh thei em? Central atanga hmalakna a ni em tih te ka zawh belhna a ni e. Ka lawm e.

**SPEAKER :** Zawh belhna zawt turin member zahawm tak Dr. Vanlalthlana i lo sawm ang.

**DR. VANLALTHLANA :** Pu Speaker, ka lawm e. Horticulture changtu Minister zahawm tak chhan atan –

Nikuma *dendrocalamus brandisii*, mau supply kha tunah hian engzat nge dam chhuak awm, mortality rate kha chhut a ni em? Zuk en leh tawh a ni em? Tin, Venus Bamboo

Product Limited-ah hian sawrkar hian share kan nei a, an paid-up share capital kha 314 tih a ni a, sawrkar-in kan neih hi nuai 160 kha a ni a, company dana chhut chuan sawrkar hi majority share holder kan ni a. Private Limited Company ni lovin public ang zawngin a kal dawn nge ni ang tih kha ka han zawt tel bawk a. Sawrkar kha majority share holder kan lo ni reng a, chu chu tunah hian sawrkar hian share a la nei em? an la nei a nih chuan Audited Financial Report hi a copy min pe thei ang em?

**SPEAKER** : Awle, inpersan deuh deuh a awm a, a theih ang ang chhang turin Horticulture changtu Chief Minister zahawm tak i lo sawm ang.

**PU ZORAMTHANGA, CHIEF MINISTER:** Pu Speaker, member zahawm tak Pu Lalrindika Ralte zawhna kha, keimahni kan in-restructure hi a tul kan ti ve tawh hrim hrim a. District headquarter a han piana kan han ti neuh neuh hian District Headquarter-ah khan department hotu ber awmna tur khan District Heasquarter kha chu a tul ve hrim hrim mai a, district khai khawm turin. Chutia han tih dawn chuan district thenkhatte chu circle awmna chauh, a lian awmna te kha a lo ni lova, chuvangin restructure kha a tul kan tih ve tawh hrim hrim avangin district-ah khan District Headquarter kan dah a, a lian ber divisional kha a hnaivai mi anih chuan kan dah chho a.

Amaherawhchu, Circle pangngai kha chu kan siam ta lova, a awm sa ho divisional kha block-ah kan dahin kan siam ta a. Hei hi Mamit bik mai a ni lova, Mizoram pumpuia kan siam a ni a, restructure hi. Chuvangin khatiang bawka hmun danga awmte pawh an awm nual a ni. A then chu sik sawia a remchan dana zira siamte pawh an ni bawk a ni.

Tin, Member zahawm tak Dr. Vanlalthlana zawhna Brandisii mortality kha chu ka la chhiar chiah lova, thal a han tawp a, fur an rawn nih tan a, khata khan kan phun sing riat chuang zuk chhiar chhuah veka a thi report kha chu kan nei chiah lova. Enge maw zat chu phun tawh zingah khan thi chu a awm ngeiin kan ring a. Mahse, nuai hnai thuak han chhiar chhuah vek kha a har khawp mai a, a number dik kha tunah chuan kan la chhiar chhuak vek lo a ni. Venus Bamboo Company-ah khan Mizoram sawrkar pawh share holder a ni a, leh lama mite pawh share holder an ni. Audited copy kha chu a awm ang ang kan lo inpe dawn nia.

**PU LALRINDIK RALTE :** Pu Speaker, ka zawh belhna kha a rawn sawifiah chiang lo deuh hlekin ka hria a, restructuring kha sawi a ni a, kha kha sawrkar laipui nawrna a ni lem lo em ni tih kha ka han hrechiang duh deuh a ni.

**PU ZORAMTHANGA, CHIEF MINISTER :** Keimahnin tul kan ti ve hrim hrim a, chuvangin kan tih a ni.

**SPEAKER** : Starred Question No.189, zawt turin Dr. Vanlalthlana i lo sawm ang.

**DR. VANLALTHLANA :** Pu Speaker, ka lawm e. District Council & Minority Affairs Department Minister zahawm tak chhan atan -

- a) PMJVK hnuiai DPR hi eng department siam nge?
- b) Kum 2020-2021 last quarter-a pawisa awm dana sanction pek tura tihte zingah khan sanction dawng tawh an awm em?
- c) PMJVK hnuiai sum hmuhte hi eng district-ah nge hman tura tih a nih, tih a ni e.

**SPEAKER :** Chhang turin a changtu Minister zahawm tak Pu R. Lalzirliana ka sawm e.

**PU R.LALZIRLIANA, MINISTER:** Pu Speaker, ka lawm e. Member zahawm tak Dr. Vanlalthlana zawhna chhanna chu -

- a) PMJVK hnuiai DPR hi department siam a ni lo.
- b) Kum 2020-2021 chhungin project eng emaw zat atana sanction dawn a ni a. Amaherawhchu, 29<sup>th</sup> Empowered Committee Meeting-in 2020-2021 last quarter chhunga pawisa awm dana sanction pek tura tih project atan chuan Mizoram sawrkar in sanction a la dawng lo.
- c) PMJVK hnuiai sum hmuhte hi a hnuiai district headquarters leh Minority Concentration Blocks (MCB) ah te hian hman tura tih a ni. :
  - i) Lunglei District - West Bunghmun RD Block, Lungsen RD Block;
  - ii) Mamit District - Zawlnuam RD Block, West Phaileng RD Block;
  - iii) Lawngtlai District - Lawngtlai RD Block, Bungtlang South RD Block, Chawngte RD Block-te an ni e.

**SPEAKER :** Zawhbelhna zawt turin zawhna neitu Dr. Vanlalthlana i lo sawm leh ang.

**DR. VALALTHLANA :** Pu Speaker, ka lawm e. Minister zahawm tak ka han zawh belhna chu - PMJVK hnuiah Aizawl East-I atan khan dilna a lut niin kan hria a, hei hi department-in a hriatpui em tih a ni a. Pahnihnaah chuan, PMJVK hnuiah hian state matching share awm tura ngaih a ni a, 10% kha state matching share tih a ni. Hei hi a changtu department-ah leh department dangah pawh hian hmuh tur a awm lova, hei hi engnge a chhan tih hi ka zawh belhna a ni e.

**SPEAKER :** Zawhbelhna zawt turin Member zahawm tak Pu KT Rokhaw i lo sawm leh ang.

**PU K.T. ROKHAW :** Pu Speaker, PMJVK hi hnam tlem zawk leh hnuaihnung zawkte chawikanna tur scheme niin ka hria a. Tun sawrkarin PMJVK hmanna tura district a thlante kha Mamit, Lunglei, Lawngtlai district-te an niin ka hria a. Engvanga

Siaha district hi thlan loh nge anih, hnam tlem zawkte chawikanna tur anih chuan Siaha district hi thlan ngei ngei tur a ni dawn lawm ni tih ka han zawt e.

**SPEAKER** : Zawhbelhna zawt turin ruling lam hi ka tih ve loh chuan lailo min ti deuh ang a. Dr. K. Pachhunga ka sawm e.

**DR. K. PACHHUNGA** : Pu Speaker, ka lawm e. Nichina Minister zahawm tak chhanna ang khan Lunglei South bial Lungsen RD Block-ah hian ka bial khaw 14 a awm a, BDO kal tlangin dik taka project siam a ni a. Mahse, kan hotu thenkhat hian a mihring minority hi an target lutuk hi a dik lova. Union Ministry-a Secretary leh Joint Secretary te hmaichhanah hmuin min hrilh dan chuan, a mihring lam ai mahin *declared area* a ni em? Area-wise kha a ngai pawimawh a ni. A declared area Bunghmun RD Block-ah khan Sap pawh, Mizo pawh, Vai pawh awm se an enjoy thei vek a ni tih kha ka hriatdan a ni.

Tichuan, ka bial bikah khan engemaw min siam sak ve thei ang em tih kha ka rawn dil ve thei ang em, tih kha ka rawn zawhbelhna a ni e.

**SPEAKER** : Awle, a theih ang ang chhang turin Minister zahawm tak Pu R. Lalzirliana kan sawm e.

**PU R. LALZIRLIANA, MINISTER:** Pu Speaker, tun Session hi a rei viau tawh a, ka zawhna hi a vawikhat chhuahna a ni a, in rawn din tuk tuk ka ring a ni a, in rawn ngaipawimawh lo riau mai a. Sawrkar chu sawi loh, kan MLA, opposition lam pawh hian ka department ve hi min ngai pawimawh lo riau hian ka hria a, ka vui deuh a ni helaiah hi chuan. Ban han phar deuh suau suau ula a tha a ka hriat tehlul nen. A vawikhat chhuahna chauh a ni a, ka zam lek lek a ni vawiinah hian, ka ding khat lutuk a.

Pu Speaker, Mathlantea, kan MLA zahawm tak a rawn zawhbelhna kha, Aizawl East-I ah khan an dil ve niin ka hria a, hei hi engtia tih tur nge tih lampang kha a niin ka hria a. Helai a area kan sawiah hi chuan Aizawl East-I kha a awm silo a, amah doctor lai a ni si a engtin nge a zawh leh duh tih kha ka ngaihtuahnaah chuan a awm a, eng emaw thuk deuh a awm nge ni a. Engpawh ni se, khalaiah kha chuan tuna ka rawn sawi PMJVVK hnuaia hnathawhna turah hi chuan a theihloh a ni.

Tin, State Share hi department-ah hian kan hmu si lova, engtin nge an tih tih kha, hei hi chu kan State Finance-ah hian kan mamawh ang zelin kan dil a. Finance Minister zahawm takin a lo sawi tawh thin, “central-ah sum tam tak a awm a, hei hi kan dil chhuak ang a, helaiah keini tum ve tur hi chu kan nei a, kan dah a ni” a ti a. Chuvangin hemi kan dil hi hmuhloh kan la nei lova, a lawmawm kan ti khawp maia, midang pawhin dil ve vek se. Ka department pawh hian tun kum chho maiah khan nuai sing chuang kan dawng nghe nge a ni. Chutiang ang share tur pawh chu min pe vek a ni.

**DR. VANLALTHLANA :** Pu Speaker, a lo hrelo palh a ni ang a, a changtu Minister khan. CMO atangin DO letter kha a kal a, Zemabawk North High School atan khan nuai 5,61,25,000/- dilna lut kha a changtu Minister-in a lo hre lo palh hlauh a ni ang e.

Tin, tun budget-ah hian a lang miah lo mai a, State Matching Share kha. PMJVK-ah khati zat kan dawng a kan ti a, department pakhat phei chu kan infak rawn a. Amaherawhchu, State Matching Share, kan State budget hi a chi tur tia kan dah si kha kan hmu miah lo kha a chhan engnge ni aw? Finance-in an dah miahlo ania, Budget-ah. (*SPEAKER: Chhang zo phawt se la aw.*)

**PU R. LALZIRLIANA, MINISTER:** Pu Speaker, a chi tur a tih kha a la dik chho zel chuan ka hria a. A chi tur nuai 100 kan zu dah khan, nuai sing khat dawn kha kan la chhuak thei tlat mai a. Buh pawh kan han tuh a, a fang tetak teah hian a fang zanga te a rawn to chhuak a kan thar ta ang khan, tunah hian a chi tur kha kan han tuh mek chu a nih hi maw le. Chu chu nimai ta sela.

Tin, member zahawm tak Pu Rokhaw zawhna, Siaha hi Engatinge an tihloh bik tih kha, a Block-ah hian Siaha Block hi a awm ve silo a, chuvang chuan helam hi chu kei ni mawh a ni chiah lo a, a rawn thlangtute hi keini sorkar kan ni lo a, khulamin an rawn thlan mai a ni a. Chuvang chuan tih theih te kan nei ve a nih chuan kan hnufual dan te chu sawi leh te pawh a tha ang chu, chu chu ni mai sela.

**PU K.T. ROKHAW :** Pu Speaker, kan Minister a din lai khan, PMJVK hi a scheme in a tum ber chu hnam tlem zawk leh hnuaihnung zawkte chawikanna tur a ni a, Siaha District hi hnam tlem zawk kan ni si a, eng vanga thlan loh nge kan ni tih kha ka zawhna a ni a. Pu Speaker, kha kha khawngaihin min lo hrilhfiah theih se la ka lawm khawp ang.

(...*Interruption...*)

**PU LALRINTLUANGA SAILO:** Pu Speaker, ‘a din lai khan’ an ti zel a. Religious Minority a sawina a ni lo maw, helai minority a tih laia hi?

**PU R. LALZIRLIANA, MINISTER:** Pu Speaker, PMJVK hi helaia kan rinthua ‘chutiang a tihna chu a ni lo maw’ tih vel kha, kan rinthu nilo hian khulama mite’n min lo hrilhfiah mang bik si lo a. Chuvangin keimahnin kan duh dan dan hian kan lo let kual ve vel maithei tho a. Amaherawhchu, khatiang kha a tih theihna a ni si lo a, a scheme-in a tum, tuna ‘tihtheihna hmun a ni e’ an tihna hmunah hian kan han ti rih chu a ni mai a. Tunah pawh hian, ‘Sports lamah chauh tih a ni em’ tih ang deuh thaw khawpin eng eng emaw sawina a awm a, amaherawhchu sports lamah chauh hian a ni lo a, thil dang dangah Education, Health leh thil dang tan pawh kan la la chho zel dawn a. Tunah heti laia scheme kan han thehluh, project kan han thehluh mek pawh hi Sports-ah chuan a awm tawh lo a ni.

(...*Interruption...*)

**PU ZODINTLUANGA RALTE:** Pu Speaker, tuna a sawi lai kha.. (*Pu ZOTHANTLUANGA : Pu Speaker, a hnung chiahah hian ka zawhna a awm a, khatia delay-a tihkual kha a tha lo, a chhuah khat tehlul nen*) Kan House zahawm taka Education Minister-in a rawn chhana ah kha,n PMJVK education, tuna scheme a awm tho kha, DPR siamtu tunge tih chhanna kha, ‘District Council & Minority Affairs Department’ tih a ni a. Tunah khan kan Minister-in “Department-in kan siam lo” a tih avang khan, tuna kan Minister chhanna hi a changtu anih avangin a chiang ang a. Education chhanna kha siamthat theih dan a awm em tih lai kha, khalai zawk kha a siamthat theih ang em?

**PU R. LALZIRLIANA, MINISTER:** Pu Speaker, siam that a ngai lo a, a chhan chu anmahni District-in, sawlaia an department-in an lo ti ve a nih chuan; keini chuan tuna keimahni hnena lut chauh hi kan chhanna a ni a, a dang zawng zawng kha a zawl chuang lo a. Chuvangin Department siam a ni lo a, hei hi a siamtu zawk chu Sports Council a ni a, hei hi department an nih loh avangin, “department siam a ni lo e” kan ti a ni, tuna kan sanction hmuh tawh hi.

**SPEAKER** : Ngawi rawh aw. Zawhna hian ‘department siam a ni em’ a ti a. Sports anih chuan department siam a va ni tho si ve.

**PU R. LALZIRLIANA, MINISTER:** Sports Council kha Department a ni lo a, Pu Speaker; Dr. K. Pachhunga, MLA zahawm tak zawhna kha atih theih ang, hemi a scheme huam chhunga awm anih chuan kan la ti chho zel dawn a ni. “Aw, nghak hram la phun nawi lo takin” tih satute kan nih kha. Kan han ti tan chauh a ni a, sawi zau pawh a chakawm a, nakinah ka Department sawi hunah tlem chu kan la sawi leh thei ang chu maw. Ka lawm e.

**SPEAKER** : Hun i hmang zo teuh hle mai. Starred Question No. 190, zawl turin Member zahawm tak Pu Zothantluanga ka sawm e.

**PU ZOTHANTLUANGA :** Pu Speaker, ka lawm e. A chhuak lo teuh hle mai. Hon. Minister, AH & Veterinary chhan atan ka zawhna chu- Mizoram-ah Veterinary Hospital engzat nge awma, Veterinary Dispensary leh Rural Animal Health Centre engzat nge awm, tih ka zawl e.

**SPEAKER** : Zawhna leh Chhanna hun a tawp a, kan chhan zawl tir mai dawn em ni? Awle, chhang rawh le.

**DR. K. BEICHHUA, MINISTER:** Pu Speaker, ka lawm e. Member zahawm tak Pu Zothantluanga zawhna chhanna chu -

- |                                  |   |             |
|----------------------------------|---|-------------|
| i) Polyclinic Hospital           | - | 1           |
| ii) District Veterinary Hospital | - | 10          |
| iii) Veterinary Dispensary       | - | 67          |
| iv) Rural Animal Health Centre   | - | 69 a awm e. |

**SPEAKER** : Zawhna leh Chhanna hun, Question Hour a lo zo ta a. Vawiin hian Minister zahawm tak Dr. R. Lalhangliana chhungkaw rokhawlha avangin House a absent a ni tih ka puang a ni.

Tunah chuan Financial Business-ah kan kal leh tawh ang a. Vawiin hian Minister zahawm tak tak pahnih, Dr. K. Beichhua leh Pu R. Lalzirliana te Demand kan sawi ho ang a, pass kan tum leh dawn a ni. Minister pahnih te Demand hi a rualin kan la leh ang a, tunah Minister zahawm tak Dr. K. Beichhua sawm ila, House dawhkanah a Demand te –

- Demand No. 7 - Excise & Narcotics;  
 Demand No. 29 - Social Welfare;  
 Demand No. 34 - Animal Husbandry & Veterinary Department;  
 Demand No. 41 - Sericulture Department-te House-a submit turin ka sawm e.

**DR. K. BEICHHUA, MINISTER** : Pu Speaker, ka lawm e. On the recommendation of Governor of Mizoram and with your permission, Sir, I move the Demand Nos. 7, 29, 34, & 41 for ₹2,94,45,27,000.00 (Rupees 294 crore 45 lakh 27 thousand) only, for meeting expenses during 2021- 2022 in respect of the following departments –

Demand No.	Purpose	Amount (in ₹)
7	Excise & Narcotics	40,34,49,000.00
29	Social Welfare	1,54,63,98,000.00
34	AH & Veterinary	79,43,30,000.00
41	Sericulture	20,03,50,000.00
<b>TOTAL</b>		<b>2,94,45,27,000.00</b>

Thank you, Sir.

**SPEAKER** : Aw le, tunah Minister zahawm tak Pu R. Lalzirliana House-ah a Demand te –  
 Demand No. 23 - Art & culture;  
 Demand No. 27 - District Council & Minority Affairs;  
 Demand No. 33 - Land Resources, Soil & Water Conservation;  
 Demand No. 39 - Power & Electricity Department te House-ah rawn submit turin ka sawm e.

**PU R. LALZIRLIANA, MINISTER** : Pu Speaker, ka lawm e. On the recommendation of the Governor of Mizoram and with your permission, Sir, I move that Demand Nos. 23, 27, 33, & 39 for ₹11,90,12,28,000.00 (Rupees 1190 crore, 12 lakh 28 thousand) only, for meeting expenses during 2021 - 2022 in respect of the following departments -

Demand No.	Purpose	Amount (in ₹)
23	Art & Culture	12,91,93,000.00
27	DC & Minority Affairs	4,51,06,49,000.00
33	Land Resources, Soil& Water Conservation	21,41,38,000.00
39	Power & Electricity	7,04,72,48,000.00
<b>TOTAL</b>		<b>11,90,12,28,000.00</b>

Ka lawm e.

**SPEAKER** : Aw le, Minister zahawm tak tak ten Demand House-ah an rawn submit a. Sawi hona kan tan leh tawh ang a, minute engzat nge kan inpek leh ang le?

Minute 10 ti leh mai ang aw, a khairual thin e. Minute 10 kan inpe leh ang a, tunge han sawi hmasa ber ang le? Awle, Pu L. Thangmawia hi a hmasa ber thei riau mai. Member zahawm tak Pu L. Thangmawia ka sawm e.

**PU L. THANGMAWIA** : Pu Speaker, ka lawm e. Hei, vawiin hi Art & Culture Demand kan sawi ni a ni a, rilruin thil thui tak a chhui a, a chhan chu Myanmar lama kan unaute harsatna tawh, hei vawiin a ka kawr rawn hak pawh hi, chumi hre ran chuan ka rawn hak a ni tih kan sawi duh a. Kum zabi 5-na lai Shan State a kan awm lai historian ten an han ziah te, tin, kum zabi 8-na lai Komo valley te rilruin a chhui a, tin Khampat Bungpui an phun lai te, tin, kum zabi 14 hnua thlang tlak lai te rilruin a chhui a. Hei hian Zofa tam takte lung ala ti leng a. Captain L.Z. Sailo pawhin, ‘Insuiikhawm leh zai i rel ang u,’ tih alo phuah a. Tin, chu mai ni loin khi lamah Myanmar lama kan unau Pu T.S Khaia chuan, ‘Tun sung khat pan’ tih, ‘Chhul khat kual kan ni,’ tih hla kha, “Kawl ram leh vai ramah inthen rih mah ila Pathianin min la hruai khawm leh ang Zoramah” tih hla kha a lo phuah bawk a ni. Literature lamah pawh hian tam tak a awm a, kan sawi seng lo ang a, Mizoram-ah pawh a awm ang a, Zofate zingah pawh khitah kan unau te tam tak an awm a, an tawrhna hi kan tawrhpu takzet a ni tih he House zahawm tak kaltlang hian ka sawi hmasa duh a. Tin, Pu Speaker, sawi tur a tam ang reng a, hun a tlem si a, kan sawi zung zung mai ang a.

Demand No.7, Excise & Narcotics hi, hei total prohibition kan han ti chho a, an hah hlein ka ring a, staff pawh hi duh ang hian an indaiah pawhin ka ring lo a, hengah hian hah taka an thawhna ah lawmthu ka sawi a. Tin, ka bial hi Pu Speaker, ramri depah kan awm a, zu leh ruih hlo hi thenawm ram atang tein, thenawm State atang te, international border atang te hian No. 4 tleng hian alo lut fo mai a ni. An hah em em mai a, Tuivai-ah phei chuan Khawkawn MHIP te hial an duty fo mai a ni, nikum lam te pawh khan. Chuvang chuan hengah te hian check gate leh awmze nei zawka tih dan hi min lo chhinchhiah sak thei se ka lawm ngawt ang a, kan Minister-in. Tin, khitah darkar hniih khat han kal hleka Myanmar ram thlen theihna khua hi a awm nual bawk a, khang atang te pawhin drugs leh

thil dang dang alo lut bawk a, heng te pawh hi ngaiantuahna hman deuh chu a ngai viauin ka hria a.

Tin, Demand No. 34, AH & Veterinary-ah hian hmasawnna tam tak mai kan han hmu a, Pu Speaker, SEDP pilot project chhungkaw 1,020 hnenah pek a han ni a, a ropui khawp mai a, tunah hian an ti mekin ka hria a. Tin, District 6, a vai chuan ka chhiar chhuak tawh lo mai ang a, hun ka ren avangin, a dispensary te kha hospital-a hlan kai an ni a. Tin, District 7 ah te District Veterinary Hospital thar sak mek a ni bawk a, tin, Rural Animal Health Centre 35 te kha Veterinary Dispensary-a hlankai an ni bawk a ni. Heng ringawt pawh hi kan sawrkar hnu covid vanglaia tiyah chuan an hah viauin ka ring a, kan Minister zahawm tak leh a department a thawktute chungah lawm thu ka sawi mawlh mawlh a.

Tin, *Trans-boundary Animal Disease* hrang hrang laka kan him theih nan Animal check-gate kan boundary area hmun 10 laiah sak a ni a, hengte hi Pathianin mal a sawm a ni ang a, hei kan sawrkar hnuah kan fel bik vang ni hauh loin, kan department te leh enkawltu Minister-te thawhrimna zarah PRRS leh natna min rawn tibuai nasa lutuk a awm loin ka hria a. Hengah te pawh hian Pathian hnenah leh department hah taka thawk tute chungah lawmthu ka sawi mawlh mawlh bawk a.

Tin, artui leh sa tea kan intodelh theih nan kan ti a, hei Thenzawl leh Serchhip phei hi chu opposition bial ni chung hian an duhsak bik emaw ni chu aw tih mai tur hian nikum June Ni 2 khan kan Chief Minister zahawm tak Pu Zoramthanga ho hianin Goat Breeding farm te pawh kha a hmunah kan tlawh dairh tawh a ni. Chuvangin, hetiang chi hmalakna tam tak a awm a, vawk chi tha kan han lakluh te pawh, khangah khan a lawmawm khawp mai. Tin, he department hian CM relief fund-ah hian cheng nuai 1,99,860/- lai nikumah a chhung lut bawk a ni, a lawmawm khawp mai.

Tichuan, Demand No.41, Sericulture-ah hian, SEDP hnuaiah project basein chhungkaw 900 hnenah hna an han siam sak a, seed emporium an han ti changtlung chho bawk a, hei hi kan ram hmakhua hriltu niin ka ring a, Sericulture pawh hi tun aia kalpui nasat chhoh a ngai viauin ka hria a, Pu Speaker.

Tin, Demand No. 29- Socail Welfare ah hian hmalakna nasa tak a awm bawk a, Eklavya Model Residential School te hi 11 lai mai zu sawichhuah belh a ni tawh a, tunah hmalak tan mai theih a ni a, ka bial Ngopa-ah pawh sak zawh tawh a ni a, Session zawah te hi chuan kan Minister zahawm tak ho hian kan hawng thei turah ka beisei a. Tin, Tribal Institute Kelsih-ah kan han ti a, tunah kalpui mek niin ka hria a, a lawmawm khawp mai a. Ka bial Teikhang-ah pawh khian Paihte cultural Centre tur ruahmanna min neih sak mek niin ka hria a, lawmthu ka sawi lawk duh bawk a. Tin, Tribal Freedom Fighter, *Ropuiliani Museum* atan 100% central funding turin Kelsih, Aibawk huamchhungah hna tan a ni tawh bawk a, cheng 1,08,000/- vel a ni dawn a ni. A dang pawh sawi tur tam tak a la awm a ni.

Hei, Article 275 hnuiah te, tin, SEDP-a kan policy, ruihhlo ngai te tanpuina tur kawnga kan policy tih hlawhtlin nan kan CM zahawm tak leh kan Social Minister hmalaknain Jordan Centre, Sethawn-ah ruihhlo ngai mi 1,000 lai mai awmna tur kha tunah tih mek a ni bawk a, a dang pawh a la tam a, kan sawi seng lo a ni ber e. Chuvang chuan, a lawmawm a.

Ka bial lamah tepawh Pu Speaker, han lut i la. Ngopa-ah kan hotupain, ‘ka phuah chawp’ atih ang deuhin keipawhin hei hi scheme awmsa nilo, thalaiho training theihna tur min zawn sak teh u, ka ti a, a tawpah Social Welfare atangin kan Minister zahawm takina hma min lakpuina zarah Youth Development Centre tunah an sa zo tep tawh a ni. Khitah khian puanthuite pawh a ni ang a, Computer te pawh, Cement mistiry pawh, khang kha department dang nen in co-ordinate a tih turin rilru kan nei a, chungte chu hawn theih tep a ni tawh bawk a, hei hi department-in theihtawp min chhuahpuina a ni a, lawmthu ka sawi duh a.

Tin, Tribal Girls Hostel ka biala mite tan Luangmual-ah sak tan a ni dawn tawh bawk a, a ram tepawh a fel vek tawh a. Hmanniah kan Minister Zahawm tak pawhin a hmunah min en sak tawh a, a lawmawm em em a. Covid vanga kan han muanna hret nuai 500-in Kawlkulh leh a chheh vela mite awmna tur hostel sak tur pawh principal approval kan hmu tawh bawk a nikum khan, tunah *kept in abeyance* te a niin ka hria a, covid te a ziawm hunah kan sa chho thei mai turah kan ngai bawk a. Tin, Dulte-ah pawh khian Community Complex tunah hma min lak sak mek niin ka hria a, central-a thawn thlak turin, chungah te pawh chuan lawmthu ka sawi duh a.

Tin, Social Welfare-ah hian Pu Speaker, a bik takin kan mi bikte tana dedicate ka duh a, ka thusawi hun tlem a zawng hi. Hei, pianphunga rualbanlo kan han ti a, ‘vohbik’ tiin emaw, ‘mi-bik’ tiin emaw ka rawn sawi ang a, heng ho hi tam tak an awm a, he mite tan hian society tam tak he departmen hian a thawk a ni. An thawhna te pawh hi a then then chu Pu Speaker, a document te pawh kan lo hmu tawhin ka hria a, nikumah tepawh an rawn sem a, MLA zahawm tak tak ho zingah. Hetah hian society-a *mi-bik* te tana thawktute hah dan tur ka ngaihtuah hian an chungah vawiinah, Mizorama *mi-bik* awm zawng zawngte chungah zahna lantir pahin lawmthu ka sawi duh a ni. Middel te, bengngawng te Gilead School angah te an han enkawl a, amaherawhchu vawiina ka sawi tel duh pakhat chu, a bik taka pawl sang an han zir dawn hian buaithlak hi a awm ve a ni. Entirnan, pawlsang lamah khan middel hawrawp te a lo ngai ta a, Class-X passed te pawh kan nei tawh a, mittdelah BA passed te pawh kan nei tawh a, a ropui khawp mai a. Chutiang bawkin bengngawng leh rawngtheilo ang chi te hi Gilead ah an han kal phawt a, amaherawhchu School pangngai a an han kal dawn khan tlar hmasa a that tir ringawt khan an harsatna a solve lo a, chuvang chuan society hran te an indin a ni.

Hei, Ephetha Special School hi Vaivakawn-ah an lo din a, a thlawna luh tirte pawh an awm a ni. Chungte pawh chu an fakawm khawp mai a. Kan MLA zahawm tak Aizawl

West-II bialtu pawh hian a MLA fund pawh hi a pe tawhin ka hria hemi tan hian. Tunah hian an mamawh em ema chu, inthawh khawmin zirtirtu an ruai a, a building tur an mamawh a ni. Hei hi Education direct-in a ni, dawt bawk si lovin education a kaihhnawih si a. Chuvangin kan Social Welfare Minister zighthawm tak hian min lo note sak sela, hengah hian School defunct tawh han luah mai turte a awm em? Tin, Aizawl-ah building hman awlsam deuh department ta pawh dilsak theih tur a awm em tih te pawh nise, a sum leh pai lam hi chu an beisei tam lovin ka hria a. Chutichung chuan, puihtheihna, an lo puih nual tawh avangin, department pawhin an puih theih chuan a lawmawm khawp ang.

Tin, Pu Speaker, hei a tawp lam atan chuan, Demand No. 39, Power and Electricity-ah hian, Khawzawl leh Kawlkulh Line hi ka sawi fo tawh a, Pu Speaker, reilo te, hei hi a hlui tawh bawk si a, chuvang chuan a line faul changa han thlak maina tur Lamzawl peng atanga Pawlrang kha nuai 17 lekin a tih theih a, chumi anih chuan Pawlrang, Hliappui, Kawlkulh phei Vanchengpui thleng khan Khawzawl atanga line a that loh khan an hmang thei dawn a, chung chu kan Minister zahawmtak pawhin min hriatsak tawhin ka hria a. Tin, Leiva Hydel Project pawh a khawl hi Kawlben-ah an dah rup tawh a ni, mahse an la phur thla lova, hengte pawh hi hawn hma theih ni se mega watt 4 vel, mega watt 3.5 pe chhuak thei tur a ni a. A za a za kan chantur a ni bawk a a nghahhlelawm tawh viauin ka hria a. Tin, Tuiching, Mimbung bula mi mega watt 0.1 pawh hi hawn theih mai tawh ni khan ka hria a, nikumah khan hengte pawh hi engnge a dinhmun tih kha kan Minister zahawm tak hnena khan kan sawi duh a.

Tin, a tawpna tak tak atan chuan Pu Speaker, ka bialah hian Art & Culture hmalakna hi a ropui khawp mai a, Bualpui Chekawn te kan ti a, hengte pawh hi an lo register fel thlap tawh a, Tin, Dullai Sial leh Vankal Sial kan han tih awmna te thla pawh an zu lak pawh a en theih a. Tin, Chhawrtui han tih ringawt pawh hian, Opposition Group Leader hi a nuih a lo za ang tih ka hlau a, hmanlai thil a nia. Chhawrtui han tih te, Tuanilung han tih te leh Samdala awmna khua te pawh kan lo ni ve a ni, ka bialah hian, heng zawng zawnga hi heritage atan a la tih chhawm a thain ka hria a. Chung atan chuan an department hmalak tawhna lawmthu sawi chungin tan la lehzual tur pawhin ka ngen duh a.

A tawp ber tak takah chuan, he demand hi a thlawpawm a, Pu Speaker, pass pawh a chakawm tawh viauin ka hria a, chuvangin pass ngei tur pawhin ka member pui zahawm tak takte pawh kha kan sawm nghal bawk a ni e. Ka lawm e.

**SPEAKER** : Member zahawm tak Pu Zothantluanga, chumi zawahh Pu K.T.Rokhaw.

**PU ZOTHANTLUANGA:** Pu Speaker, vawiinah hian Minister zahawm tak tak Dr. K.Beichhua leh Pu R. Lalzirliana Demand te sawihona hun kan nei a a lawmawm hlein ka hria a. A pakhat naah chuan Demand No. 39, Power & Electricity Department hi hmasawnna atan chuan department pawimawh berte zinga mi a ni lawm maw ni le, ka ti a, Mizo mipuite

pawh hi a tel lo hian kan awmtheilo nasa hle tawh mai a. Entirnan hnathawhna kawng hrang hrang atan te, kan eng atan te, inchhunga kan sekrek khawihna zawng zawngah te, TV, Washing Machine engkim maiah hian power neihloh hrehawm zia chu kan hre tlang vek mai a. Chuvang chuan power neih that a pawimawh zia, tun thlenga tuia harsatna kan neih chu kan Power Transformer hlui tawh chhiat avang a ni a. Tichuan siamtha leh thin mah ila, a lo chhe leh a, chu chuanin kan tui pump chungchangah pawh harsatna min thlen leh thin a. Hmani lawkah pawh kan Deputy CM zahawm takin a sawi a, Luangmual-ah 12.5 MVA Transformer lian tha tak a thar bun mek a ni a, hei hi siam zawn anih chuan tui pump chungchangah pawh harsatna kan nei dawnlo a ni tih te han hriat hian a lawmawm ka ti a. Tin, nimin lawkah ka bial Sihhmui-ah khuan 12.5 MVA bawk hi an phurthla leh lung lung mai a, khutah khuan an zuk bun leh dawn niawmin ka hria a a lawmawm hlein ka hria a.

Tin, power chungchanga lawmthu han sawi ka duh leha chu, tunhma chuan Power House atang hian min enkawl thin a, hei tunah kan sawrkar chak tak, kan Minister chak tak hnuaiah Luangmual-ah SDO Office siamin min rawn thutchilh ta a, kan bialah hian power mamawhna kan nei nasa hle a. MZU, Mizoram University mizo naupang mai nilo, khawvel hmun hrang hranga zirlai lo kal awmna te, tin, Central Jail current awmloh vanga buai mai thin te, tin, Artui kan awp keuna ZPBS-ah te, tin, Mudafar-ah ranchaw siamna te a awm a, chutiang chuan a tel lova awmtheilo em em bik mai Constituency kan nih avangin kan sawrkar-in a hma min han laksakna hi a lawmawm ka ti a.

Tin, khulaia harsatna pakhat kan neih chu, Tanhril feeder atang khuan Central Jail te, Sakawrtuichhun te, PTC kan tih thin Lungverh te zawng zawng khu feeder khatin min chawm a, khungte khu thensawma siamthat anih loh chuan hmun pakhata a chhiat pawhin shutdown a ngai thin a. Tin, kan LT Line tam bera hi a rei tawh lutuk a, hei hi kan chhiat fona thin pakhat a ni a, kan Minister-in min hriatsak se la. Hmun thenkhatah chuan hrui hnawk lutuk avanga khawpui chhung kan buaina hi ABC Line han siam a, a fel duak mai thei laite pawh hi min enpui kan ngai khawp mai a, chu chu vawin hian kan sawi duh a. Tichuan Power chungchangah kan sawrkar-in a a hnai zawka Officer te min thutchilh tu siama min enkawlnaah lawmthu ka sawi a ni.

Tin Demand No. 23, Art & Culture-ah hian NRZCC te ruahmannan khan, kan thalaite kan lam, culture te kanin exchange thin kha a ni a. Vawiinah hian thar thawh leh a pawimawh hlein ka hria a, Ka bialah khuan Yatri Niwas tih te a awm a, Cultural Club ten culture thil te an zir a, an lam a, mikhuall ten an en duh em em a ni. Tin, State hrang hrangah kan kal a, foreign thlengin culture entirin kan kal thin a ni a. Kan thalaite tan exposure tha anih avangin khangte kha tih leh theih dan ngaihtuah kha culture chungchangah hian, a aia nasaa hma lak a tul hlein ka hria a, chu chu kan sawi duh leh bawk a.

Tin, Demand No. 33, Land Resources, Soil & Water Conservation Department hi, Ni e, kan ram hi tlangram a ni a, kan hre vek a, fur a ni a, kan ram leilung hanna a fertility hi a luangliam thin a ni tih kan hria a, hemi kawngah hian department ina kan ram lo hausak

zelna turte, kan thlaithar kawng engkima hma kan sawnna tur atan department pawimawh tak niin ka hra a. Hun hmasa lamah khan ‘dying department’ te kan ti a, chutiang nilova tunah hian kan sawrkar-in SEDP hmangin hma a lak tir a, department pawimawh tak alo ni te hi a ropui ka ti khawp mai a. A bik takin SEDP hmanga kan project tur rubber leh kuhva chin chungchangah te hei hi Nodal Department-a a lo tang chho te hi a ropui a. Ni e, kan ram hi a tha a, kan thlai chin turte, eizawnna tur atana kan identify that chuan tha takin kan kal thei zel a ni a. Kuhva kan hria a, vawiinah hian a market zawnbuai a ngailo, kan thar zawng zawng hi awlsam tein a market theih vek a ni. Khawthlang lamah nasa takin tunah kan ching mek a, khawkhatin a nuai 100 tel, nuai 200, 300 lalutte pawh an awm teuh tawh a. Bilkhwthlir leh Vairengte lamah te pawh a ni a, hmani lawkah pawh House-a kan sawifo khawchhak kuhva smuggling anih dan te, anih loh dante pawh kan sawi a ni. Chuvang chuan khawchhaka mi pawh an lak duh a, foreign atang pawha kuhva an lalut duh anih chuan kan rama kan thar chhuah atang hian lakluh lohna chhan tur a awm lo, kan hrall theihlohma chhan tur a awm lovin ka hria a.

Tin, rubber pawh hi kan hria a, Tripura-ah rubber chinga an lo harhchhuah tak hnuah hi chuan kan tribal pui rethei tak takte kha vawiinah hian chawikanin an awm mek a ni. Hemi chungchangah pawh hian kan Minister hian hma a la a, tunah hian rubber ching mek te bakah la ching leh zel turte tan pawha phurawm, incentive awm tanpuina lo kalin, a sawngbawlna tur machine, machine-te subsidy-a beneficiary-te tana in siam kan han chang ngat ngat te pawh hi rubber chungchange hma kan sawnna tur a ni a. Khawthlang lamah khuan chin hlawhtlinpui tam tak an awm tawh a, kum tinin an pungchho zel dawn a ni. Rubber pawh hi a market-ah harsatna a awm lo reng reng, an tharchhuah apiang hi hrall nghal zung zung theih a ni. Chuvang chuan, Mizoram tan a tha a, Tripura a hlawk kan tih rual khan Mizoram leilung hi a la hang tha zawk a, a la fertile zawk bawk a, chuvang chuan rubber production pawh hi Tripura aiin a hlawk zawk dawn a ni tih hi khawthlanga ching mek ten an hmuh dan a ni. Chuvang chuan, he department pawh hi a pawimawh hlein ka hria.

Demand No. 7, Excise & Narcotics hi a bik takin keini bialah chuan a pawimawh khawp mai. Rangvamual leh Phunchawng thlaah te khuan khawpui mite harsatna a thleng fo thin a, amaherawchu, enforcement nei tlem ni siin Rangvamual-ah Excise Outpost din a ni a, thawktu tlem te ni mahsela theih tawp an chhuah a, zu siamsa an tichhia a, zu siam lai an man a, nasa takin hna an thawk a ni tih kan hria a ni. Chuvang chuan, Excise indaih lohnate pawh hi kan sorkar hian ngai pawimawha a aia tam zawk, indaih zawk leh hmanraw tha zawk kan bel chuan a lawmawm ngawt ang. Kan sawrkar hian total prohibition puang pawh nise chumi enforce tur sipai kan neih tam loh erawh chuan hemiah hian harsatna kan nei thei a ni tih hria a, a daih tawk tur kan nei theilo a nih pawhin eng emaw zat an hna han chhunzawm thei tur kan neih belh erawh chu a pawimawh khawp mai tih ka sawi duh a.

Tin, Sericulture-ah pawh hian SEDP atangin chhungkaw 900 zet mai sericulture farm hlawhtling an siam theihna tur a tan tanpuina pek an lo ni tawh a, silk emporium pawh

siam chhoh a lo ni hi department pawimawh tak a lo ni chho zel a ni tih kha ka sawi leh duh a.

Demand No. 29, Social Welfare-ah khan Lengteng bialtu **MLA** zahawm takin a sawi teuh tawh a. Jordan Centre, Sethawn a mi chungchangah pawh hian kan thalaite ruihhloah an kal nasa tih kan hria a, ruihhlo ngai enkawl ngai, chhawmdawl ngai, chhanchhuah ngai tam tak an awm a ni. Mi 1000 lai awm theihna tur kan sorkar-in a buatsaih a, SEDP atangin nuai 921 lai leh Ministry of Social Justice & Empowerment atangin nuai 723 lai kan project atanga first installment release a ni hi a ropui a.

Tin, Eklavya Model Residential School chungchangah, ‘11 ngawt mai’ han tih khan, sorkar hmasaah khan 5 an lo ti ve a ni. Vawiina kan sorkar thar hian 11 project hial siama sanction niin vawiinah hian hnathawh a lo ni ta a. Hei hi a thatna chhan em em chu Pu Speaker, project tam takah chuan State Matching Share a awm thin a, hei erawh hi chu pure central funding a ni a, a thlawn liau liaua central atanga tanpuina a ni tih kan hria a.

Tin, Anganwadi hi naupangin lehkha an la zir hma atan a tangkai em em a, tun Covid-19 avanga harsatna hun rei tak kan tawh chhung pawh khan nutrition pek an nih mai bakah Poshan Abhiyaan hnuiah category hrang hrang awm zinga pahnihah 1<sup>st</sup> position kan ni a ni. Chumi hlawhtlinna lawmman atan chuan central-in nuai 2,000 lai min pe a, chungte chu kan state tan hian nuai 2,000 lawmman liau liau kan Anganwadi hmasawnna tur atan a awm hi a lawmawm em em a ni tih ka sawi duh a.

A tawp berah chuan Pu Speaker, Veterinary-ah khan ka bial a awm anih avangin sawi loh theihloh a awm a, Pu Speaker, min lo hrethiam lawk la. ZPDS-ah khuan tunah hian artui sing 2 vawi khat a awp keuna kan nei a ni. Kan indaih lo em em a, kan thalaite hi ran vulh chungchangah kan harh thar nasa a, saa intodelh kan duh a. Vawiinah hian vawi khata sing 6 awp keu tur a tih hmasawn a ni hi a ropui ka ti a. Chuvang chuan, vawiina kan Minister-te pahnih Demand hi pass ang u tih ka sawi duh a ni. Pu Speaker, ka lawm e.

**SPEAKER** : Member zahawm tak Pu KT Rokhaw ka sawm e.

**PU K.T. ROKHAW** : Pu Speaker, ka lawm e. Vawiina kan Minister-te Dr. K. Beichhua leh Pu R. Lalzirliana-te Demand kan sawi tur hi a bik takin ka bialah phei chuan a pawimawh lehzualin ka hria a. Pu Speaker, ka bial tana thil tha titute hi chu fak ka hreh hauh lova. Demand No. 34-na, Animal Husbandry & Veterinary Department hi sawi phawt kan duh a.

SEDP pilot project chhungkaw 1020 hnenah pek a ni tawh a. Department dangte ka ngaiantuah a, AH & Veterinary hian SEDP tanpuina hi department dang zawng zawng aiin a pe tam anih ka ring a. Vawk vulhtute hi cheng nuai 3 theuh pek an ni a, ar vulhtute hi cheng nuai 1 leh sing 5 theuh pek an ni bawk a, lawmawm viau mahse hei hi Unstarred Question-

ah khan a lang a. Ka bialah hian chhungkaw tlemte chauh pek an ni a, Siaha District hi vawk leh ar vulhtute pek theih tur district 3 or 4 thlan zingah kan tel a, mahse Palak bial hi kan Minister khan tanpuina min pe tlem khawp mai a, a sem leh hunah chuan ka bial hi min duhsak tawh se tih ka ngen duh a.

Tin, Tipa Vety Department staff quarter ho hi a hlui tawh hlawm a, a clinic centre phei chu 54 National Highway laih tur anih avangin thiah a ngai a. Kan Minister zahawm tak khan quarter leh clinic centre building hi a thar min sak sak turin ka ngen duh a. Tin, Chakhei Rural Animal Health Centre hi changtlung zawka min enkawl sak turin ka ngen duh a. Chakhei khua hi Burma border-a awm anih avangin ran ar, kel, vawk, bawng leh sial an lo luhpuina hmunpui ber te zinga mi a ni a. Tin, Chakhei khuaa chhungkua 100-a 60 vel hi chu ran vulha eizawng kan ni a, sial vulh hlawhtling tak Chakhei khua hi an ni a. Term hmasa Congress sawrkar lai khan NLUP hnuaih sial vulh hlawhtling ber Mizoram-ah lawmman an lo dawng tawh a, chuvangin heng kan ran vulh mek leh Burma lam atanga ran lo lut tur endik tu tur hian doctor kan pawimawh khawp mai a. Chu vang chuan Chakhei Rural Animal Health Centre hi Dispensary and Animal check post-ah min upgrade sak thei sela kan lawm viau ang.

Tin, Pu Speaker, Demand No. 29, Social Welfare hi, kan Minister zahawmtak hian ka bial hmasawnna infrastructure tha tak Tipa Centenary Higher Secondary School building project tunah min siamsak a, a then phei chu advance kan la tawh a, building pawh kan sa tan tawh a. Tin, Zyhno handloom building sakna tur leh Preservation of Heritage Site Saikao ami te project min siamsakin chu project te chu a lo hlawhtling vek ta a, a chungah hian kan lawm viau a ni tih ka han sawi duh a. Tin, Aganwadi Centre hi ka bialah chauh ni lovin Mizoram pumpui ang pawhin thuam that a ngai tih hi ka sawi duh a. National Education Policy hian a main foucs ber chu, *Early Childhood Care and Education* a ni a, chuvang chuan Aganwadi centre hi ngaih pawimawh ni se a lawmawm viau ang.

Tin, Demand No. 41, Sericulture hi kan Minister hian central lama kan mithiamte nen tunah hian pangang khawi lamah hma an la tan mek niin ka hria a, hetah hian ka bial min lo duhsak ve se la kan lawm viau ang.

Tin, Demand No. 23, Art & Culture-ah hian kan Minister zahawm tak hnena kan ngen duh leh hma min han laksak se tih ka duh em em te chu –

Pakhatna, Development of Mara Typical Village at Zyhno: Hei hi Mara Autonomous District Council hmalaknain Zyhno khuaah Mara Typical Village din a ni a, a hmunhma hi a rem bawk a, hmanlai kan pi leh pu in leh lo leh an khawsak dan pho lanna anih avangin mipui pawhin an hlut hle a. Zirlaite hian Historical tour neih nan an hmang thin a ni. MADC-in a typical village a din hi Council sum atang chuan changtlung taka enkawl leh ti hmasawn hna thawh tak tak theih a ni lova. Chuvang chuan kan Minister zahawmtak hi Art & Culture Department chauh ni lo District Council Affairs changtu a ni bawk a, he Mara

typical village Zyhno-a din hi central lamah pawh project te min siamsaka changtlung zawka din theih turin hma min laksak thei sela tih ka ngen duh a ni.

Pahnihna, Development of *Kuma* Museum, hei hi Tipa-ah khian din a ni a, pi leh pute rohlu leh hnam thil vawn himna tha tak mai a niin, zirlai naupangte tlawh leh an zirlai puitu atana hman ber pakhat a ni. Chuvang chuan, kan Minister hian Financial Assistant Fund under Museum Grant Scheme atangin Kuma Museum atan hian hma min laksak hram se tih ka ngen duh bawk a ni. Khawngaihin hun min pek belh hram la, Pu Speaker.

Demand No. 39 Power & Electricity hi han sawi leh ka duh a. Lawnglai leh Siaha District hian power supply kan hmu tlem em em a, 33 kV line bak hi kan hmu lova. A bik takin Lawnglai Greater Water Supply leh Siaha Greater Water Supply te khi power supply kan hmuh tlem em avangin tui an pump hleithei thin lova, mipui te hian harsatna namen lo kan tawk thin a ni.

Tin, chumai ni lovin, tunah hian Hospital tha tak sawrkar-in min sak sak a, kan lawm viau a, damlo enna khawl changkang tak tak te pawh kan nei zel a, a lawmawm takzet a ni. Amaherawhchu, power kan hmuh tlem em avangin damlo enna khawl te pawh hman hleih theihlohin a awm a, a pawi hle a ni. Power-in a zagh si loh chuan engang khawl tha pawh nei mah ila awmzia a awm lo a, chuvangin 132 kV line hian Lawnglai a thleng tawh niin ka hria a, a sub-station erawh sak a la ni lova. Hei hi a rang lama min sak sak turin kan Minister hi ka ngen a, Siaha 132 kV line pawh hi tan theih nise a lawmawm hle ang.

Tin, Tuipang Hydel Project hi 3 mega watt pe chhuak thei a ni a, leiminin a hnawl hma kha chuan Siaha leh Lawnglai District te hian kan chhawr em em thin a, a hmun te pawh hmanni khan ka zuk tlawh a, hna te pawh an thawk mek zel a. Kan Minister zahawm takina min hrilfiah se ka duh em em chu, engtin nge hmalak zel a niha, engtikah nge zagh anih ang tih hi. Tin, 33 kV line Zero point to Tuipang hi NEC funding turin 2020-2021 khan vaibelchhe 16.72 project dil niin ka hria a, NEC lamin an lo pawm em tih kha khawngaihin kan Minister khan min hrilh thei bawk sela ka lawm hle ang. (**SPEAKER:** Awle, i sawi thui tawh viau a nia)

A tawpna tak tak, a pawimawh takzet a, Pu Speaker. District Council hi tlem han sawi ka duh a, Demand No. 27 a ni a. Hei hi tlem han sawi lan ka duhna chhan chu, Mizoram sawrkar hi District Council pathumte - Lai, Mara leh Chakma te tan chuan nu leh pa chan chang kan ni a, duhsak bik leh thlei bik emaw kan nei turah ka ngai lova. Mahse tun MNF sawrkar erawh hi chuan duhsak bik leh thlei bik a nei a ni tih hi an thiltih atang hian a chiang khawpin ka hria a.

Diktak chuan Mizoram-ah Congress a sawrkar lai khan Autonomous District Council pathumte - Lai, Mara and Chakma-te hi population criteria 11:9:7 ratio hmangin sum hi kan sem thin a ni. Mahse MNF sawrkar hnu chuan, 2020-2021-ah khan Chakma

Autonomous District Council-ah MNF a sawrkar avangin nuai 500 lai pek belh an ni a, Lai leh Mara Autonomous District Council erawh chu party dang sawrkarna anih avangin cheng khat mah pek belh an ni lova. Kumin 2021-2022 Supplementary Demand-ah khan Lai leh Chakma Autonomous District Council-te chu MNF sawrkar an nih avangin cheng nuai 15 ve ve pek belh leh an ni a, Mara Autonomous Council erawh chu BJP sawrkar anih vang nge, pakhatmah pek an ni lova, chuvangin Mara Autonomous District Council chuan he MNF sorkar hi kan chhawr thlawt lo a ni... (**SPEAKER:** *A lutuk tawh e, a tawk e*) tih ka han sawi duh a ni e. Ka lawm e.

**SPEAKER** : Aw le, Pu V.L.Zaithanzama kha a phar hmasa kha a ni a, chumi zawah Pu Lalchhuanthanga, chumi zawah Pu Lalrintluanga Sailo aw! Member zahawm tak Pu VL Zaithanzama ka sawm e.

**PU VL. ZAITHANZAMA :** Pu Speaker, ka lawm e. Demand-a kan luh hmain thuhmahuai tlemte i phalnain sawi ka duh a.

Inrinni zingah khan ka bial chhung Maubawk-ah vanduaina kan tawk a, In dinglai pariat (8) lai kangralin chhungkaw sawm panga (15) zet chenna mumal nei lovin an buai a. He thilah hian ram leh hnam tana ka thawhpui, kan Minister zahawm tak takte a hmunah rawn kalin min rawn enpui a. DM & R Minister zahawm tak Pu Lalchamliana te, Rural Development Minister zahawm tak Pu Lalruatkima te kan thlabarna min hnem turin a hmunah an rawn kal a. Tin, MLA zahawm tak tak pathum - Pu Lalchhuanthanga te, Pu C.Ngunlianchunga te, Pu Lalrindika Ralte ten min rawn kan bawk a, in chungah ka lawm tak zet a ni. Tin, heng bakah hian kan Mayor Pu Lalrinenga te, Dy.Mayor Pu R.Thanglura te leh Councillor pathum - Pu Rosiamngheta, Ward No. V, Pu John Zosangliana, Ward No. VI te leh Pi Ramthanzaudi, Ward No. XIV te a hmunah an rawn kal bawk a. Kan DC Dr. Lalhriatzuali Ralte leh a thawhpuite, CYMA leh Kohhran leh pawl hrang hrangte atangin tanpuina leh tuarpuina nasa tak kan dawng a, he House zahawm tak kaltlang hian lawmthu thinlung leh tihtak zetin ka sawi a ni.

Demand No. 39, Power & Electricity-ah hian ka lut ang a. Kumina budget hi 29.72% zetin a pung a, hna pawh nasa taka kan thawh kan beisei a ni. Nikum lama thil tleng Tuirini Small Hydel Project, mega watt 24 chungchang hi tawite a han sawi rik ka duh a. An hluihlawn danah hian power supply a intodelh tuma kan hmalakna hi duhthu a va sam lo em tih ka ngaiantuah a. Ni 16, May, 2019 ah Administrative approval pek fel a ni a, a senso atan vaibelchhe 465 ruahman a ni. Chutichuan, Department of Economic Affairs in Ni 29 May, 2019 ah Small Hydel Project mega watt 24, Tuirini din nan External Financial Assistance, New Development Bank, Shanghai-in loan lak phalna a rawn pe a, tlumte thlir takin hlawhtling tur maia ngaiin beiseina sangtak nen kan lo thlir laiin April Ni 21, 2020 khan hmalak zelna atana pawisa dil Finance Department-in a phal ta lo a, a hnu reilote June Ni 20, 2020 ah a pumpuia hluihlawnna tur order a chhuak leh ta nghal a ni.

Hei hi kan Chief Minister zahawm tak decision a ni nghe nghe awm e. Cheng vaibelchhe 465 te hi chuan Pu Speaker, power-a kan intodelhna tura kan hmalakna file pawimawh zawng zawng peih vek tawh si, hma kan han la ngam lo hi hrehawm ka ti a, chuvang chuan hei hi ka han sawi chhuak a ni. Hetiang pawha hma kan la ngam lo anih chuan kan hmalakna zel turah hian beisei a sang lo hle a ni.

Tin, thildang pakhat, Power & Electricity hnuiah hian supply hrang hrang pek a ni thin a, ram leilung fa leh hnam dangte pawh supplier-ah an awm a. Amaherawhchu, ram leilung fate duhsak uchuak bik lutuk kha chu a dik hauh lo ang a, tuna a lan dan chuan ram leilung fa lo zawk, hnam dangte hi kan duhsak ni hian a lang a ni. He thil hi tun Ministry thil mai ni lovin Ministry hmasa atanga kan chin, kan chhawm zel niin alang a, Pu Speaker, hei hi tih tawp dan zawn a tul hlein ka hria a, chu chu ka han sawi chhuak a ni.

Tin, thil pakhat, transformer kan indaih lo thin a, veng hrang hrang kan mangang thin a, ka bial chhungah pawh Maubawk-in mangangin department-ah tranformer an dil a, an rawn pe a, an hung ruau tawh mai a. Amaherawhchu, a dahna tur cement works te a lo ngai a, hmun remlo laih zawl leh slab han chhun te, kha kha department hian an ti thei lo an ti a, kan siam loh chuan an rawn la let mai dawn tiin an mangangin min rawn hrilh a, hma kan la rau rau anih chuan a dahna hmun te hi kan siam sak thei lawm ni tih ka rawn zawt a, an theih ngang loh erawh chuan MLA fund atanga ti mai turin kan inruahman mek tih kha ka rawn report a ni.

Demand No. 29, Social Welfare Department hi Pu Speaker, a budget 9.01% zetin a pung a, a lawmawm hle a ni. He department-ah hian Directorate of Woman & Child Development hi a tel ve a, central sawrkar-in Woman & Child Development hi department hrangpa siam turin a rawn hriattir thin a, vawiin thleng hian tihpuitlin a la ni lo va, Central sawrkar duh dan ang ngei hian central-a a line department, Ministry of Woman & Child Development hming chawi hian tuna Directorate of Woman & Child Development hi Social Welfare & Tribal Affairs Department hnuia awm lo hian department puitlingah hlan kai theih dan a awm em tih ka zawt a ni. Ka rilruah hmeichhia leh naupangte chauh ngaihtuah tu department hi a bikin awm se tih duhna nen ka rawn sawi a ni. Kan ram tan pawh, sawrkar tan pawh a that ka ring bawk a.

Hmeichhate hi an pung chak em em a, mipa te hi kan pun hleih theihloh lai hian, an ni bik enkawlna tur department hi kan mamawhin ka hria. Tin, thildang, tar pension hun rei tak lo lak tawh, an account-a lut mai thin, tun hnuiah an account a pension lut ve ta lo an awm a, hengho hi engtia tih zel tur nge tih ka zawt a, nakinah kei pawhin report ka dawn hi bawhzui pui ka tum a ni.

Demand No. 34, Animal Husbandry & Veterinary Department hi a changtu Minister ka lawmpui viau mai, an rawn sawi tawh a. SEDP pilot project atan chhungkaw 1020 zet nikum November Ni 25 a an thlang chhuak te kha Vawk leh Ar vulhho te an ni a, ka lawmpui

khawp mai. Amaherawhchu, engtin nge an tih tak zel chu kan la hre lo a. Tin, District Veterinary Hospital, District pasariha thuam that a ni mek te hi ka lawmpui bawk a. Amaherawhchu, kan budget hi 2.19% zetin a tlahniam a. Tin, budget han en hian ei leh in, sa leh bawngnute lama kan intodelhna tura hmalak tumna budget kuminah hi chuan ka hmuhpui lo hle mai a, pawi ka ti hle a ni.

Demand No. 41, Sericulture-ah hian ka han lut leh lawk ang e. Sericulture hi Department upa ve tak si, thangduang lo tak ni hian ka hmu a. Pangang khawia eizawngtute intelkhawm SERIFED Limited Society hi an awm a, hengte nen hian thawhona tha an nei lo hle niin ka hria a. Society dang MIZOFED te leh MAFED te hi chu an department nghenchhan te nen an thawkho tha viauin ka hria a.

SERIFED hian Sesawng ramah ram tin 50 hmun zet a nei a, department nena thawkho turin an inpeih reng a, thawhhona tha nei ta se department tan pawhin a tangkai hle turah ka ngai a, tanrual hi chakna a ni si a, thawk ho turin hma la se la tih hi ka duhdan a ni a, ka sawi ri ve hrim hrim a ni.

A tawp berah chuan Demand No. 7, Excise and Narcotics Department hi department pawimawh tak an ni a, zu kan zawrh lai phei kha chuan hna an ngahin an buai em em thin a, kan khap hnu pawh hian a pawimawhna hi a la kiam chuang lova, an hna hi a hautak em em a ni. Kan budget ka han en hian an salary hi nikum ai khan a tlahniam duai mai a, engtia kal nge an tum, nikumah nuai 437,016,000 kha kuminah nuai 3,80,16,2000, nuai 5,68,54,000 zetin a tlahniam a, engtia siamrem tur nge ka hriatpui chiah lo naa, a pawi khawp mai

Pu Speaker, a dang ka sawi tawh lo anga, he department hi a pawimawh ka tih tawh kha, amaherawhchu Rangvamual khu engti kawng mahin a rem thak khawp chuan kan veng hneh lo a ni maithei e, amaherawhchu motor-a tlan velte tana hmuh hrehawm khawpa kawng sira ruihhloin a tihbuai awm rengte khu tih reh theih hram tura hmalak ni se ka va ti em.

Ka bial chhung West-III Reiek kawng lamah sawn ..... kan mamawh khawp mai, hma min lak pui theih chuan kan lawm hle ang, Pu Speaker, ka lawm e.

**SPEAKER** : Member zahawm tak Pu Lalchhuanthanga ka sawm e.  
In pel vek mai a vawiin chu, engtizia nge maw ni le, mi pakhat sawi aia tam in pel vek tawh a. Pu Lalchhuanthanga.

**PU LALCHHUANTHANGA:** Pu Speaker, ka lawm e. Minister zahawm tak takte pahnih demand kan han sawi dawn a ni a, a hmasa in Sericulture hi ka han sawi teh ang.

Sericulture hi Mizoram tan potential tha em em mai a ni a, a product leh a rate te pawh a tha a ni. Central Silk Board atang hian anni hian min tuipui em em mai a, North East hi Sericulture tan hian duhthusam a ni a, silk hi chi 4 a awm a, chung zinga tha ber chu *mugha* a ni a, hengte hi Mizoram-ah hian a tha duh em em mai a ni. Chuvang chuan Central Silk Board pawh hi an phur a ni. Amaherawhchu he department hi department upa ve tawh tak si, thang lo deuh mai hi a ni tlat mai a, a pawi khawp mai a, a dawhthleng hi a tha lo a ni. Department-ah Director nih inchuhna te leh department suma inlungualna that loh avang hian a thang thei lova, a dawh thleng that loh vang a ni. Sericulture hi hna nem tak a ni a, hmeichhiate leh pensioner-te tan pawha eizawnna tling eizawnna tha a ni a, kan Minister pawh hian vil deuh se tih ka ngen a, ka beisei a. Sericulture hi Mizoram tan, thalaite tan leh hmeichhia awm nem deuh zawk tan leh pensioner-te tan pawha eizawnna tling, eizawnna hlawk a ni tih kha ka sawi duh a.

Tin, Demand No. 7, Excise & Narcotics Department hi, total prohibition kan han puang leh a, staff indaih lohnate a lian hle mai a, district senior ve tawh tak tak Siah/Lawngtlai-ah te pawh hian Excise & Narcotics District Office hi mumalin a la function lo niin ka hria a, Siah-ah te, Lawngtlai-ah te hian Assistant Commissioner in awp lovin Inspector ten an awp vel mai mai rih niin a lang a. District thar 3 – Saitual, Khawzawl leh Hnahthial-ah te pawh hian District Office puitling takte a la ding thei lo deuh anih pawhin hma lak chhoh tan a tul hlein ka hria a.

Drugs hi a hluar em em mai a, Kanhmun-ah te, Tripura leh Assam atangte pawhin ruihhlo a lo lut nasa a, mahse khulaiah khuan check turin out post pawh a la awm lo tlat mai a, hetah hian kan sorkar hian lo hria se la, nichina Pu Thangmawia sawi ang deuh khan khawchhak leh Manipur lam atanga ruihhlo lo lut thinte pawh hi Out-post siama check gate tha tak nen kan tih loh chuan tunlai hian Mizoramah ruihhlo drugs a hluar khawp mai. Excise Force-te pawh an tang a, kan Minister pawh hi chak leh zuala hma la turin ka beisei a ni.

Art & Culture Demand No. 23 hi sawi leh ka duh a. ‘Art & Culture’ tih hian a huam zau khawp mai a, kan hriat lar danah chuan *Zo thuam inbel* han tihte, engemaw nikhua-a han chaia han lam velteah khan kan rilru a awm deuh mai thin a, amaherawhchu hei hi niin ka hre lova. Art & Culture hian a huam zau khawp mai, kan ei leh in thlenge hian a huamin ka hria a. Mizo ina kan tharchhuah kan thlaite leh kan siam chhuah ang chi reng renge hi kan hluta, kan ngaihsan hian culture thui deuh hi a keng tel niin ka hria a. Sorkar-in function kan neih nikhuate hian phai lam atanga kan lak luh, Coco cola te, Frooti te han sem mai lo hian keimahni ina kan siam chhuah sapthei tui tih ang te sem hi han uar ta ila, heng hian culture thui tak a kengin ka hria a. Tin, a lehlamah kan kut hnathawktute leh kan thalaite tan pawh eizawnna siam theihna hmanruate pawh a ni a. Chuvangin, Art & Culture hi huam zau zawk deuh hleka hma lak dante pawh hi a awm theiin ka ring a, a pawimawh khawpin ka hria. Tunah KVI-ah thei tui te an zuar a, rawtuai te pawh a pickle te pawhin an siam a ni, hengte hi i hlut ang u, heng hian culture thui tak a ken tel bakah thalaite leh kut hnathawktute tan hamthatna a ni a, a pawimawh riauin ka hria a ni.

Pu Speaker, Demand No 39, Power & Electricity hi a pawimawh khawp mai a, power pawimawh zia leh a tangkai zia te, a tel lova khawsak a harsat zia te leh a theih loh zia te pawh kan hre chho ta zel a, mahse tunah hian kan sorkar hian power generation kan neih tam theihna tur hian eng angin nge hma a lak tih hi kan hre vak lova,

Sorkar hmasa hun lai khan MoU kha signed-in project 10 dawn lai kha siam a ni a. Khatih hunlaia kan Minister kha tuna kan Minister tho hi a ni a, khang kha thil engkim hi a hrechiang viau turah ngai ila. Khang kan MoU sign te kha a hlamzuih ta mai em ni. Potential kan nei tha kan in ti a, kan sawi kur dup a, MoU chutah chuan kan sign kan ti a kan sawi kan sawi a, mahse a tak ram kan thleng thei tlat lo hi a pawi khawp mai a. Tun MNF Ministry hian eng angin nge hma a lak dawn, eng eng nge a hmachhawp tih kha hriat ka duh a ni. Tin, khang MoU kan sign te kha tih hlawhtlin chu ni tawh se chuan Mega Watt 2,400 lai aia tam power pechhuak thei a ni a.

Tin, tunlai hian solar energy tih lamah hian kan sorkar hian hma a la niin ka hria a. Hengte pawh hi Power Minister hian engtiangin nge hma a lak a, engnge kan thlen tawh tih te pawh hriat a chakawm a. Hetah hian power mega watt tam tak (Pu Speaker, ka zo dawn e) nei thei tura kan hmalak dan te hi hriat ka chak a ni. Solar energy siam turin potential kan nei tha a, hengte hi chak lehzuala hmalak theih anih chuan a lawmawm khawp ang. Kan hmalak tur leh kan hmalak dan tur te, tuna kan project kallai mek kan neih te hi eng chen nge ni tawh, kan hmang thei dawn tawh em, tih te ka han zawt tel a ni. Pu Speaker, ka lawm e.

**SPEAKER :** Member zahawm tak Pu Lalrintluanga Sailo ka sawm e.

**PU LALRINTLUANGA SAILO:** Pu Speaker, ka lawm e. Hei, vawiinah Minister zahawm tak te pahnih Demand kan han sawiho a ni a, ka han sawi hmasak ber tur chu Demand No. 27, District Council & Minority Affairs hi a ni.

Hei, Pu Speaker, House Member-te hian PMJVVK hi kan chiang lo deuh hlekin ka hria a, hei hi Central lamin a introduce-na a la rei lo bawk a a awm viau a. Tunhma chuan MSDP, ‘Multi Sectoral Development Project’ tih thin kha a ni a, nikum maiah central lam hian a hmingte rawn thlakin a kalphung te a rawn ti danglam kha a ni a. Helai hi kan chian deuh hlek a thain ka hria a, kei pawhin ka theih ang tawkin a guidelines te ka study ve a. He project-ah hian kan House Leader zahawm takin a sawi angin, kan budget *a-chi* atana kan hmanna tur pawimawh tak niin ka hria a, kan Minister zahawm tak enkawlna hnuaiah hian hmun tam takah hmalak a ni a. A bikin ka bialah chuan nuai 3,400 chuangin sports infrastructure te kan kalpui a, helaiah hian i veilama mite, lehlamah chuan kan Sports Minister te leh a changtu Minister te pawh kan han engemaw question deuh hlek niin ka hria a.

Helai hi a guidelines in a ngaih pawimawh danah hian priority a rawn then hrang a, health sector hi No. 1 ah a rawn dah a, education hi No. 2, skilled development hi No. 3 ah a dah a. Chutah chuan health leh education lama a kalphung hi kan lo hresual deuh hlek niin ka hria a, ka bial bikah chuan Pu Speaker. Hetah village level atangin a project implementna tur atan a hmun Village Council hruguituten an phalna a lo ngai a, chu an phalna chu Block development BDO ah an tichho a, chuta tangin DC ah, DC atangin State level ah a lo kal thin kha a ni a. Chutiang chuan department lamin manpower kan neih loh avangin helaiah hian kan kalchak tawk lo deuh hlek a ni.

Sports lamah, Sports Council lam hian chak takin hma an rawn lakna pawh, keipawhin a hmunah te kalpuuin kan han tichho a, a hlawhtlinna kan han hmu ta a ni a. Amaherawhchu, inzirtir kan nih avangin tumah hi thiam lo kan awm pawhin ka hre hran lova, helai hi kan member-te pawhin kan hriat chian a thain ka hria a ni. A hmaa MSDP anih lai pawhin District Council hian he department hi a chang ngai lem lova, MSDP anih lai khan Social Welfare kut a ni a. MNF Ministry tuna mi a lo din tirh khan tan te pawh kan han la ve a. Chungah chuan Girls hostel-te pawh nasa takin hma kan sawn a, school building-ah pawh. Amaherawhchu, MSDP anih laia education leh health sector-a project-a 1<sup>st</sup> installment hmuh ni si tun thlenga 2<sup>nd</sup> installment kan la hmu thei lo hi, chutiang chu kan kalphung a ni a, bialah pawh harsatna tam tak kan tawk a ni tih ka sawi duh a. Vawiinah hian he PMJVVK hi keini area bikah chuan nasa taka development kan kalpuina tur a ni tih a langin ka hria a, kan kalpui meknaah lawmthu ka sawi tel duh a ni.

A dawt lehah chuan Demand No. 41, Sericulture hi ka sawi duh a. Member zahawm tak Pu Chhuana rawn sawi ang khan, Sericulture hi potential kan nei tha a, central lam atang pawhin mithiam an lo kal a, a bikin ka bial Mamit RD Block hnuai hi potential thatna a ni e an ti a. Chuvangin kan Minister zahawm tak leh kan sorkarin min ngai pawimawh a khaw tam takah tunah hian Sericulture ah hma min laksak a. Pilot project te siamin a taka hlawhtlinna chhungkaw tam takin kan hmu mek a lawmawm hle a ni tih kahan tarlang tel a ni.

Tin, Demand No. 34, Animal Husbandry & Veterinary-ah hian, hei hi kan ngaihtuah uluk a tul hlein ka hria a. Kum 2013 leh 2016 - 2018 chho-ah khan kan ramah hian PRRS, ‘vawk pul hri’ kan tih mai kha nasa takin a leng anih kha, Pu Speaker. Tin, ‘African Swine Fever’ an tih Assam, Manipur, Tripura leh Myanmar ah te nasa takin a leng a, kan vawk leh ar te nasa takin a pul a ni tih kan hria a. Chuvang chuan kan ramah pawh kum 2016-2018 chho vela kan vawk khati zat a pulh nachhan kha ram dang atanga heng ran kan lakluh vang hi niin a lang a. Engpawhnise tun sorkarah chuan PRRS a ni emaw, African Swine Fever a ni emaw tunah hian khatiang kha kan tuar ta lo a ni a, chuvang chuan a enkawltu Minister chungah pawh lawmthu ka sawi duh a ni. A chhan chu State dang leh international boundary cross-a ran lakluh a awm ta vak lo anih vang te pawh a ni ang e tih te ka ngaihtuahnaah a awm a. Chuvang chuan a pawimawh berah chuan heng laka kan himna tur chuan ramdang atanga ran kan lakluh loh hi a him hlein ka hria a.

Chutiang ti tur chuan kan Minister zahawm tak hian chak takin hma a la a. Chutiango Kel lian chi vulhna tur pawh nimin maiah Lunglei lamah kan va kal a, Thenzawl-ah pawh khatiang hmun te kan han hmu a, a lawmawm hlein ka hria a. Tin, ar vulhna chungchang thuah te pawh hma chak takin an la a, pilot project te siamin chhungkaw 1020 ngawt ten eizawnna puitling an nei dawn a ni tih te a lo lang a. Chuta hrisel lohna te kan lo nei chho anih pawha hmalakna tur Vety Hospital paruk lai kan han nei te, dispensary paruk lai mai up-grade a lo ni ta te hi a lawmawm ka ti a. Chutih rual erawh chuan ka bial chhungah, min lo chhinchhiah sak sela, Phaileng te khaw lian a ni a; tin, engkimah Block anga function-in chutah chuan hospital kan mamawh khawp mai tih ka tarlang tel duh a ni.

Tin, ZPDS atangin vawikhatah ar note 20,000 atanga 60,000 keu tir theihna te kan han neichho ta zel te pawh hi a lawmawm hlein ka hria a. Chuvang chuan ka ngaihtuahna tak takah chuan kan Vety Minister hmalakna hi a lawmawm ka ti takzet a, a chhan chu chawhmeh duhtui chi ka ni a Pu Speaker, mahnia kalsawn thei hi chawhmehah chuan ka duh zawng a ni a, awmhmun sawn theilo hi tui ka ti vak lova. Chuvang chuan kan Minister zahawm tak hmalakna hi ka thlawp hle a ni tih ka sawi duh a. Hetiang a hriselna lamah pawh tha zawk te ni tura hma a lakchhohna hi lawmawm ka ti.

Tin, Demand No. 29, Social Welfare ah hian nichina ka sawi ang khan PMJVK central-in a introduce hma MSDP anih lai atangin, Eklavya Residential School pawh Mizoram-ah 11 ngawt mai kan han nei thar te hi lawmawm ka ti a. Ka bial West Phaileng-ah te pawh kan han nei chho dawn a, amaherawhchu helaiah hian min lo chhinchhiah sak se tih duh lai ka nei a, vaibelchhe 24 velin bul an tan chho dawn kha a ni a, a tam tham viau mai. Amaherawhchu, an tender system leh an selection-ah hian state sorkar, abik takin kan Minister chak tak hi inrawlh se ka duh deuh hlek a. A chhan chu village level atangin ram hectare 20 vel an lo donate a, an leh awl tlat thin laia hi enfiah a ngai khawp mai, anih loh chuan tender-a an reflect anih loh chuan harsatna te pawh a awm thei dawn a ni tih a langin ka hria a. Hei hi a taka kan implement theihna tur leh kan thawhhona a that theihna turin a tender chungchangah pawh hmalak ni se a tha hlein ka hria a. Tin, Tribal Girls Hostel te pawh Mizoram-ah tam tak kan nei chho ta a, nichina ka sawi ang khan, ka bial West Phaileng-ah pawh nuai 230 ngawtin tunah hma kan la a, luah theih tep alo ni ta te khu tui let hnua thil la awm ngai lo a ni. Chuvangin kan Minister chungah hian lawmthu ka sawi duh a. Tin, a building sak zelna turah te pawh hma lakna tur kan la nei a, hengah hian tan kan lak chhoh zel chuan hma kan sawn zel ang tih beiseinain kan thlir a ni tih ka tarlang duh a.

Tin, SEDP atangin Social Security hnuiah de-addiction centre, Sethawn-ah kan House Leader zahawm tak duh dan leh a sawi tam ber thin angin mi sangkhat ngawt len theihna tura hma kan han la te hi ropui ka ti a, hei hian chunglam kan rinna kawng thlengin a khawihin ka hria a, chuvang chuan lawmawm ka ti a. Chhungkaw tin vawiin niah hian ruihtheih thil in min run mek a ni a, chumi lak ata chhanchhuah chu keini ram rawngbawltute

kan mawhphurhna a ni tih hriaa chak taka kan Chief Minister zahawm tak duh dan hriaa a Minister in-charge in hma a la hi lawmawm hlein ka hria a, ka tarlang tel duh a ni.

Tin, Demand No. 39, Power & Electricity-ah hian kan hmuh leh kan hriat angin, Covid ten min han tibuai a, hma thar lakna lian em em awm lo mahsela sem darh lamah kan Minister hian tan a la hlein ka hria a, keini Dampa chuan hnuai lam eng ngailo kha kan eng ve ta a ni. Hmanniah Pu Speaker, he House zahawm taka ka sawi tawh ang khan, eng kan hmuh khuan mak kan ti thin a ni, thim fate kha eng ah min chantir ta mek a, chu mi atan chuan vawiinniah hian Marpara Power Sub-Station sorkar hmasain hma a lo lakna te khu commission hnaih theih tawh ni se, a hun awm vel tal kha min react thei se tih kha ka duh khawp mai.

Tin, keini thingtlang bialtu ten kan Minister te hmalakna zarah solar street light kan han nei ve ta te hi a danglam ve hrim hrim mai a, a system lah khu a changkang riau mai a khaw thim rualin a eng a, khaw en rualin a thim leh mai a ni; khatiang chi kha a ni a, chuvang chuan vawiinniah hianin tam zawk te pawh central lama sawichhuah leh dan awm sela ka duh khawp mai tih ka tarlang duh a.

Tin, Demand No. 33, Soil & Water Conservation Department chungchangah hian, pilot project te siamin kuhva leh rubber chungchangah te pawh ka bial Chunglang Dai-ah hmalak niin Kangmun-ah te pawh hma chak taka lak chhoh mek a ni a, lawmawm ka ti hle a. Chak zawka hma la turin potential kan nei tha a ni tih ka sawi duh a, hei hi min hriatsak se ka duh khawp mai.

Demand No. 23, Art & Culture chungchangah hian, tuna kan kal dan piah lamah hian a tha tawk viau nachungin, kan ramah hian ‘Mizo hnam’ han ti ila tribe hrang hrang kan awm a, hetah hianin a bikin Chakma te, Bru te pawh hi he House-ah hian an tradition, anmahni han hmuha an incheina atanga hriat hran mai theih te pawh hi kan la ha ve lovin ka hria Pu Speaker, next Assembly-ah chuan rawn hak ngei kan tum ang chu Art & Culture Department kaltlangin tih te rawtna ka siam duh a, chuvang chuan hei hi a pawimawh khawp mai.

A tawp berah chuan Pu Speaker, Excise & Narcotic Department, Demand No. 7 ah hian manpower kan ngah tawk lo tih kan hria a, chuti chung chung chuan Excise force te hi an fakawm ka ti a. Heti khawpa, ruihhlo kawng a ni tih international pawhin an puang a, chak taka an hmalakna hi lawmawm ka ti a. Tin, induh khawp tawk chu a awm lo, ka bial chhung Phaileng-ah te khuan a nasa em em a, tin, Reiek leh Tlawng kawngah te pawh kawi tin maiah khuan nula tlangval zantin mai hian an thu a ni. Hengte pawh hi en ngun deuh hlek dan te a awm lawm ni tih ka sawi duh a. Nichinah khan member zahawm tak kha a chhuak ta mai a; Palak bialtu khan “MNF ministry hi thlei bik nei a ni” te a han ti ngawt a, Pu Speaker, a ngaihtuah thui lo deuh emaw ni chu aw, ka ti deuh a. NLUP kum 10 an sem chhung khan thlei bik an neih zia kan hria mai a nilo, hmanni lawkah an leader-in a sawi

chu, “Congress an nih loh chuan ka thisen zawmpui pawh ni se engahmah ka ngai lo” titute kha an ni lo emaw ni le tih hi he House hian kan hriat a thain ka hria. Awle, Pu Speaker, ka lawm e.

**SPEAKER :** Pakhatin a la sawi thei a, Pu Lalrinsanga Ralte ka sawm e.

**PU LALRINSANGA RALTE:** Pu Speaker, ka lawm e. Hei, vawiinah kan Minister te pahnih Demand kan han sawiho a ni a, sawi tur a tam thin khawp mai a, mahse kei chu thuawih thin ka ni a, hun ka hmang pel lo turah ngai ila. Minute 10 sawi theih a ni a, hei minute 8 ala awm a, minute 2 kha chu ka kal pelh pawhin a hun takah ka rawn zo mai dawn a ni tih kha ka rawn sawi hmasa duh a ni.

Demand No. 33, Land Resources, Soil & Water Conservation hi han sawi hmasak ka duh a. Department lian lo tak a ni a kan hre theuh a, mahse tun sorkar tharah hian hma an han la chho a, anmahni department lam pawh inbuatsaihna tha zawk nen theih tawpin hma an han la a, a ropui hlein ka hria a. Sorkar hmasa lam leh hun dangah kha chuan he Soil Department-ina a enkawl, allocation of business-a awm ‘hmunphiah’ kan tih ang chi te kha a rate a to ngai lo reng reng mai a, a rate-ah hian kan buai fo mai a. Ka bial khu hmunphiah tamna a ni a, tun sorkar tharah chuan a hring pawh cheng 47, cheng 50 te kg-ah a kai chho a, a ro pawh kg-ah cheng 120 te a kai chho a, khatiang tura ruahmanna an han siama theihtawpa hma an han la kha a lawmawm hlein ka hria a. Tun sorkar tharah chuan kuthnathawk tuten an thlai tharte man man zawka an hrallh thei hi lawmawm ka ti a ropui ka ti takzet a ni.

Tin, SEDP hnuiai kuhva hi pilot project tunah hian beneficiary mi 300 tan buaipui mek niin ka hria a, a lawmawm hle a, hei hi nasa lehzuala kan tan lakna tur a niin ka ring a, central lam atangin sum pawhchhuah theih a ni dawn lova kuhva-ah hian, amaherawhchu Mizoram-in kan thlai tharah hian kan hrallchhuah that ber, sum kan lakchhuah that berna anih ka ring a. Ka biala Bilkhawthlir bikah ringawt khuan kum khatah nuai 500 chuang man kuhva hi an hrallh chhuak thin a ni. Tin, Serlui bialah, Saipum, Saiphai, Vairengte ah te khuan kum khatah crore 10 chuang te kuhva manah kan lei a, Kolasib District-ah khu chuan crore 20 chuang a nih ka ring a, Mamit District-ah pawh khuan crore 20 bawr vel man hi chu kum tin an hrallchhuak thin a ni. Chuvang chuan central lama pawisa hmuh a harsat dawn avangin SEDP-ah duhsakna nasa tak kan pek hi a thain ka ring a ni.

Tin, Demand No. 39, Power & Electricity Department hi han sawi leh ka duh a. Kan Minister a changtute an fakawm khawp mai a, kan Chief Minister ruahmanna te a ropui ka ti a. Ramri buai kan neih hrang hrangah current kan pawt lut nghal zung zung mai a, a ram hum nan kan ti a Vairengte lama kan buai pawhin kan Minister rawn tlan thlain a ban tur 20, 30 dawn ramri lamah kan pu thla nghal zung zung a, a khawtlangin kan pui a, a hrui kan pawt a kan tieng nghal rum rum zel a. Chutiang chiah chuan hmanniah Bairabi-ah pawh

harsatna a thleng a, kan Minister tlan thlain kan Chief Minister te nen ruahmanna siamin ramhnuaih an zu tieng nghal a, a lawmawm tak zet a. Ram leh hnam humhim nan hian Power Department hian an thawh hlawk hle a, a ropui ka ti tak zet a ni tih kha ka han sawi duh a.

Chutihrual chuan staff hi an indaih lo hle mai a, Power & Electric Department ah hian, ‘linesman’ kan tihte hian khaw 4-te an vil thin a ni. Thingtlangah chuan line a lo hlui tawh a line foul a lo tam a. Hei hi ka lo hrilh a, kan Minister zahawm tak pawh khawpui a rik ringawt pawh hian an off thin a ni ka lo ti a, chutiang khawp chuan line hlui tawh avangin thingtlangah harsatna an tawk a an buaipui em em thin a, staff lak belh ni thei se a lawmawm hlein ka ring a. Staff lak belha a line enkawltute pawh uluk zawka ruahman a thain ka han ring a. Tin, line hlui tawh tak tak te hi thlak ngai a tam tawh khawp mai. Tuna Thingthelh leh Hlimen inkara kan LT line pawh khu a fuh tawh lo khawp mai a, thlak dan min ngaihtuah sak theih se tih kha ka rilruah a awm a.

Tin, Buhchang atanga Phaisen line pawh pheina, Phaisen current tih enna tur khu pawh zagh vek tawh a ni a, kum khat vel hman lohin a awm a, khu khu enge a chhan ka hre lo a, tih en theih reng tawh anih kan ring a, ruahmanna kan hotute, kan Minister te leh kan official te pawhin min lo hriatpui se. Buhchang atanga Phaisen line an pawh pheiah engkim zagh fel tawh khu kum khat dawn tih en lovin khumi line awm lo khuan an awm a, khu khu hman vata tih en sak vat khu a ngai a ni. Tuna line an pawhna hi ramhnuaih a awm a, eng emaw hlekah line fault a awm a an buai khawp mai a. Khu mi pawh fel vek tawh khu hmanga current pek vat an ngai hle a ni tih kha kan sawi ve duh a ni.

Tin, Saipum leh Saiphai inkarah khuan 11 kV line kan tih bumboh deuh mai ramhnuai pilril tak maiah hian a awm a, eng emaw line han chhia leh eng emaw hlekah hian khawtlang anga inpuih a ngai thin si a, a hautak khawp mai a. Khu khu sawn dan a awm em, a kawngpui dung zawng deuhin tih te kan Minister leh kan department lama official ten min hriatsak se a thain ka hria a.

Tin, Pu Speaker, Serlui Hydel Project hi kan House Leader leh kan Chief Minister zahawm tak khutchhuak a ni a, khu khu nasa lehzuala kan chei a tul hlein ka hria a. Serlui thermal office hi Bilkhawthlir-ah a awm a, a tlabal vek tawh mai a, quarter pahnih khat chiah khu luah tlakin a awm tawh a, a zahthlak viau mai a. Khungte khu chei that a ngai tawh hle a ni tih ka sawi duh bawk a ni.

Demand No. 34, AH & Veterinary ah hian ka kal ang a. Kan thiante’n an rawn sawi tawh a, SEDP pilot project-ah beneficiaries 1020 chuang an rawn thlang a, a ropui khawpin ka hria a. Vawkvulhah nuai 3, Arvulhah nuai 1 sing 5 a ni a. Kan sorkarin sa intodelh kan sawi thin a, hmalakna a takin a han lang chho hi a lawmawm hlein ka hria a. Tunah hian ruahmanna an kal chhohpui a, Ar inte an sa tan tawh a ka bialah pawh kan lawm hle a ni tih kha kan sawi duh a. Tin, district paruka Vety Dispensary te hospital-a hlankai a ni te, district

pasarih-ah Vety hospital thar sak a ni te hian tun sorkar-a Vety Deptt. hmalakna a ropuiin a lawmawm a, kan hmalakna hi a chak tha a ni tih a lang a, kan Minister a fakawm hlein ka hria a. Hetianga chak taka hma kan lak chuan kan ram hi saah kan intodelhna ang a, ram dang atanga kan lak luha natna hri kan hlauha kan buai kan buaina hi a reh ngei kan ring a ni.

Tin, Rural Animal Health Centre 35 zet mai Dispensary-ah min hlankai sak a, chung zingah chuan ka bial Bilkhawthlir leh Saiphai a tel ve a kan lawm tak zet a. Tin, Bilkhawthlir hi YMA Conference denchhenin Vety dispensary a ni tawh bawk a doctor tunah a awm nghal thei lo anih pawhin, hmun dang atanga midang nena rawn kawp tur talin min tih sak teh tiin kan Minister kan ngen a, Bairabi-a doctor nen min rawn khawp tir a kan lawm tak zet a ni. Tin, natna hrik, ran kan lak luhah hri te an kai lohna tur a boundary hmun 10 laiah gate an han siam hi a ropui ka ti a, tha ka ti a. Tun sorkarah chuan natna hrik avanga kan buai, ran natna lak luh kan nei loin ka hria a, a lawmawm hle a ni.

Pu Speaker, Demand No. 29, Social Welfare hi han sawi leh ka duh a. Vety kan sawi ang deuh kha a ni a, kan Minister a chak tha a, a fel a, a lawmawm khawpin ka hria a, hma nasa takin a la a hmasawnna hmel thar tam tak Social Welfare-ah pawh hian a lang a ni. Eklavya kan tiha kha keini pawh Bilkhawthlir-ah kan nei ve a, kan sa chho tan map map mai a, kan lawm khawp mai a. Central School tur a ni a, a enkawl leh a buaipui zawng zawng khulam rawn tum tur leh school naupang te pawh a thlawn a an kalna tur a ni a, keini ang thingtlangah school tha, central school min han dah sak hi kan lawm tak zet a ni.

Tin Jordan Centre, Sethawn-a mi sangkhhat chuang ruihhlo ngai leh nun lo hmang sual tawh te han enkawl that lehna tur te kan Chief Minister zahawm takina ruahmanna a siam kan Minister ten an rawn bawhzui a, khutiang khuan siam puitling a lo ni ta a, khungho khuan lei rem an rawn rah lehna tur te, an eizawnna kawng an rawn kal chhoh lehna tur a an eizawnna kawng an rawn siamna tura bul an han tanna tur hmun kan nei te khu a lawm awm hlein ka hria a. Ruih hlo ngaite an mahnia tal chhuak thei tawh lo he sorkarin a khaichhuaha, an eizawnna tur thlenga ruahmanna siampui tuma hma a la hi a lawmawm tak zetin ka hria a ni.

Tin, Pu Speaker, Article 275(1) atanga project kan siam thin hi a lawmawm hlein ka hria a, hei hi asset ropui tak tak kan neih theihna tur a ni a, helaia sawi ka duh erawh chu, he Article 275(1) atang hian MLA bial tina kan ngaih pawimawh leh tha kan tih zawng project kan siam hi a khai rual lo deuh thinin ka hria a, hei erawh hi chu kan tih khairual deuh a tulin kan hria a. Keini bialah te khuan hmasawnna kan mamawh ngei ngei a, Bilkhawthlir-ah khuan inter-State Cultural Centre project kan siam a, kan thehlut tawh a. Chu chu Mizoram sorkar hnuia SLEC-ah pawh hian (**SPEAKER** : *Ngawi rawh aw. Kan chawlh a hun a, i sentence a laklawh viau em?*) Pu Speaker, ka zo dawn e, keichu thu ka awih thin kha, minute 1 khan ka pel a, minute 9 chiah ka la sawi a, minute 1 ah ka rawn zo

tawh ang (**SPEAKER** : *House phalna kha a ngai a nia. A sentence a laklawh em mai a, kan zawh tir mai dawn em ni? Aw le, han zo mai rawh le*)

Pu Speaker, ka lawm e. Kan sawi tawh ang khan Bilkhawthlir-ah State Cultural Centre sakna tur project kan thehlut a, amaherawhchu nikumah Covid-in min tihbui avangin ruahmanna pawh duh angin a chak thei lova. He kan project thehluh hi ka hriat dan chuan SLEC-ah a tlang tawh niin ka hria a, hei hi priority min peka theih tawp chhuahin kan Minister hian ruahmanna min siampuia, kan hlawhtlin ngei theihna turin hma min laksak se tih ka sawi duh a.

A tawp bera kan sawi duh chu, covid leng karah pawh Aganwadi nutrition lak buai miah lo, bahlah miah lova an han kalpui kha, Social Welfare hian ram hnuk tak tak a khawih rual hian naupang te te thleng hian a khawih tel si a, chung zawng zawngah pawh chuan Aganwadi thleng pawh khan an hmalakna a lawmawm a, an hmalakna a hlawhtling a, nutrition buai miah lo, bahlah miah lova an sem thei te kha a lawmawm ka ti tak zet a ni tih kha kan sawi duh bawk a ni e.

**SPEAKER** : Han sawi duh ka nei a. Kan House Leader hi min ho tha hle mai a, a thu ngar ngar zel mai a, Member thenkhat hi chu an thutna a ruak reng mai a ni. Kan chawl tawh rih ang a, dar 2:00 PM ah kan lut leh dawn nia.

## **2:00 PM**

**DEPUTY SPEAKER** : Tunge han sawi leh ang? Chawhma lam khan member 7-in kan sawi tawh a, tunah Member zahawm tak Pu Lawmawma Tochhawng i lo sawm ang.

**PU LAWMAWMA TOCHHAWNG :** Pu Deputy Speaker, ka lawm e. Vawiin hian kan Minister zahawm takte pahnih demand kan sawiho a ni a, sawi pawh a phurawm ang reng hle a, an hma lak tawhna te kan hriat lawk lohin enge maw zat a lo kal a, a awm reng emaw tih lai hian hmasawnna tur tam tak, rana kan intodelhna tur te, electric power-a kan intodelhna tur te, a bik takin Lunglei lamah phei chuan lawmthu sawina tur kan nei nual a.

Pu Deputy Speaker, Land Resources, Soil & Water Conservation Department, Demand No.33 atang hian kan sawi tan ang a. He department langsar vak lo pawimawh zet si hi sawrkar hian nasa zawka chhawrna tur ruahmanna a neih a tulin ka hria a. Buh leh bal, thlai leh theite thar chhuah leh intodelh turin kan beihna lamah hian buh te, thlai te, thei-te a lo to chhuahna leilung lei tha humhalh that a nih loh chuan kan ram hi ram ro, tui awm lohna hmunah kan chhuah thei mai dawn a. Keimahni ngeiin tunah hian kan tuar tan mek a ni lo em ni tiin ngaituahna pawh a kal thei tawh a nih hi.

He department hmalakna hnuaih hian Lunglei lam sawn lawmthu sawina tur kan nei nual mai a. Ni 8.12.2020, nikum December thla khan Rubber Processing Unit 11 lai mai hi department hian chhungkaw 41-in an chhawr tur a rawn pe a, tangkai hle dawn a. Farmer-te an lawm an phur em em a, hnathawh an chak phah a ni. Lunglei District Rubber Harvest, 2020-ah khan rubber quintal 46 vel thar chhuah a ni tawh a. Market mumal tak a awm theih nan Rubber Board of India hian Mizoramah hian Regional Office hi nei thei se farmer-te tan a va tangkai zual dawn em aw ka ti a.

Tin, Lungleiah hian MIRSAC data hnuai atangin rubber potential area hi 1.6 lakh hectare class I leh Class II a awm mek bawk a. Rubber ching duhte an awm a, an pung mek zel bawk a. Tunlaia kan sawi lar viau kuhva pawh hi chin theihna pawh hectare nuai 2 zet potential area Lunglei lam sawn kan nei a ni. Pu Deputy Speaker, heng Rubber, Kuhva, Mau, Teak leh thlai dangte hi sawi pawlh lawk ta ila. Hengte hi Indo-Bangla border trade atana kan mamawh ngawih ngawih turte an ni a, chubakah ramria chengte tih hmasawnna atan leh ramri humhalh nan kan tangkaipui tur an nih avangin sawrkar pawh hian NASA zawka tan min lak sak theih chuan a lawmawm ngawt ang.

Power & Electricity han sawi leh ila, Demand No. 39 hi. Duhthusam a ni ta e tihna ni loin a hma ai chuan electric power supply lam hi kan hmu tha zawk a. Eng kan hmuhte pawh hi a mumal ta zawk hle mai a, hna thawktute pawhin tam zawk an thawh chhuah theih phah ta niin a lang a. Hmun thenkhata power sang tak mamawhna hmunah te tlem tea han khaihlakna te chu a awm lo thei lo a, hengte pawh hi siam that mek niin hmasawnna kan kalpui mek niin ka hria. Chhim bial District pathum chawm thei tur Kawmzawl, Pukpuiah 25 MVA Transformer megawatt 45 pe chhuak thei tur ruahmanna chu sawrkarin ngai pawimawhin ruahmanna a siam a, hna pawh thawh chhoh nghal a ni. Kumin tawp lamah hi chuan peih fel beisei a ni a, he ruahmanna hian electric eng chhit chauh ni loin tui pump lama harsatna te, electric power hmanga hmasawnna peng hrang hrang NASA taka min chhawk dawn avangin thil lawmawm tak a ni kan tan chuan.

Tin, Lunglei chhim lam electric power chawmtu ber pakhat Khawiva-ah 25 MVA Transformer lian pakhat dah belh turin hmalak a ni a. Mahse, harsatna lian deuh mai kan nei a, hotu-ten min lo hriat sak hram hram sela. Transformer lian dah thlakna tura kalkawng saw a chhe em em mai a, Khawl lian phurh thlak hleih theih a ni tlat lo a ni. Tunah chuan temporary-in emergency deuhin han siam chu a ni a, mahse a rin tlak tak tak dawn lo deuh niin a lang a. Chuvangin Lunglei chhim lam zawng zawng power hmunpui Khawiva panna tur saw kan department leh Minister te pawh hian khawngaihtakin min lo hriat sak sela kan duh ngawt mai. Tuna siam mek aia tha siam turin ruahmanna pawh a kal ruak tawh niin ka lo hria, chungte chu tihhlawhtlin thuai thuai theih ni se, kan nghakhlel hle a ni. Department-a thawktute an fakawm hle mai a, zan khaw thim leh ruah sur hnuaih pawh an chawl lo a, an chhuanawm takzet a ni. An hmanruate a tha loin duhthu a sam lo thung a, tunhma atanga kan harsatna a kum a kum lo ni ta thawktute chenna quarter saw luah tlak mang loh a tam ta hle a ni. Khawngaihtaka ngaituah sak theih ni se a lawmawm khawp ang.

Pu Deputy Speaker, Demand No.34, AH & Veterinary Department hi han sawi leh lawk i la. Chik taka ka han zawh chianin tun kum hnih chhunga a changtu Minister Pu K. Beichhua hmalakna hi a chhuanawm ngawtin ka hria. Hripui leng karah hian nichina a thunawn ang maia kan han sawi tak SEDP Pilot project atan chhungkaw 1020 hnena vawk vulh leh ar vulh tur, vawk vulh mite hnena nuai thum, ar vulhtute tan nuai khat leh singnga pe chhuak theite hi an awm mai mai lo tih a chiang a. Kan hri chhia hian min tibuai lo phei se chuan eng ang takin chhawr tangkai ang maw tih hi a ngaihtuah theih a ni. Heng Serchhip-ah te, Saitual, Mamit leh Hnahthialah te Vety dispensary-te chu Hospital puitlinga hlankai an ni hman a, District Siaha, Lawngtlai, Lunglei, Mamit leh Kolasib-ah te hian District Vety Hospital thar sak mek a ni te hian Minister leh department-te hi awm hmuna thua arbawm tah mai mai an nih loh zia pho langtu a ni a, a chhuanawm khawpin ka hria. Tun kum hnih chhung lek hian Rural Animal Health Center pariat sak zawh a ni tawh a, Rural Animal Health Center 35 zet hi he department hian Vety dispensary-a hlan kai a ni bawk a ni.

Nichinah pawh an lo sawi tawh kan ran vulhte him zawkna tura boundary-a check gate hmun 10-a dahte hian thui tak kan ran vulhte min humhim sak a tih loh theih loh a ni. Arsa leh artuia kan intodelh theih nana hmalakna ZPDS Tanhril-a tum khata artui 20,000 atanga 60,000 keu theihna tur te, Lunglei Lungpuizawl atana artui 5,000 tum khata keu theihna tur hawn mai theih tura din a nite sawn hmalakna hmabak a tiengin beiseina a ti sang hle a ni.

Pu Deputy Speaker, han tarlan ve hrim hrim ka duh chu kan Vety Minister hmasa hnuaih khan a bial chhung Mampui-ah sawn Artui 387 chiah hi an term chhung khan an awp keu tir a niawm a, tun kum hnih chhung Covid-19 hnuaih erawh chuan tuna kan Minister hnuaih hi chuan artui 1,405 zuk keu tir hmana mawle a inthlau rem rem ka ti khawp a. Ti tak tak leh lu pan hna thawha thawk thin te hna thawh dan a tar lang chiang hlein ka hria.

Pu Deputy Speaker, Social Welfare, Demand No. 29-a kan hnathawh tlangpui han tarlang leh ta ila. Enge maw zat hi chu an rawn tarlang tawh a. Sawrkar kaltaah khan Eklavya Model Residential School (EMRS) hi panga hai chhuah a ni a, tun MNF sawrkarah hian kum hnih chhung lekin 11 hai chhuah a ni tawh a ni. Tribal Research Institute Kelsih-a cheng nuai 2,000 chuang zeta sakte pawh zawh a lo ni ve tep tawh a, kan ram tan hlu tak leh tangkai tak tur a ni.

Ropuiliani Museum, Central Funding za ah za, Kelsih-Aibawk huamchhunga cheng nuai sangriat zet man changtu Minister-in a han hai chhuak te hi hmangchang hre tak Minister a ni a tih loh theih loh a ni. Special Central Assistance hnuaih CSS 100% bawkin 2021 chhungin ram tan project 12 zet mai nuai 1000 man approved a lo ni tawh te, tin, Article 275(1) hnuaih project hrang hrang 105 zet mai approval hmuh te hian ram tan beiseina min siamsak a. Sethawn-a ruihhlo ngaite sangkhat enkawlna tur hi chu kan sawi tawh bawk a sawi tawh lo mai ila.

A tawpna tak tak atan chuan Pu Dy. Speaker, Excise & Narcotics hi Department pawimawh tak, indaih lo leh hmanrua mamawh em em an ni a. Ram hmel ti thaa ti chhe thei tu an ni. An tlem na vang vangin an thawkrim a, an thawhrim rah ramin kan chhawr viau tawh a ni. Krismas leh kumthar vuakvetah Thana a han ruak te, mi tlemte an han awm te, khangte pawh khan ram hmel a ti tha a, an thawhrim zia a tilang a ni.

Tin, Social Welfare nen hian direct lehzuala mihring chhiat leh that enkawltu, engemaw zawnga ngaih phei chuan lei leh van hawlh tih a sawi theih an ni a. An mamawh tul te, an hnathawhna atan a hmanrua te, a mihring te ngei pawh hi sawrkar hian duhsak leh ngaihsak an phu hlein ka hria a ni. Ka lawm e.

**DEPUTY SPEAKER :** A lawmawm e. Tunah chuan Member zahawm tak Pu C. Lalsawivunga sawi turin kan lo sawm ang a. A niin a sawi zawahh hian Pu BD Chakma sawi turin a lo inring ve dawn nia. I lo sawm ang.

**PU C. LALSAWIVUNGA :** Pu Dy. Speaker, ka lawm e. Demand-a ka luh hmain tawngkam hnih khat lek han sawi chhuah ka duh a.

Kumin 2021-2022 kan Budget hi a mak danglam riau hian ka hria a. A chhan chu department zawng zawng deuh thawah hian Budget Demand atanga kan sawiho tur ruahmanna thar hmuh tur a awm miah lova. Hmasawnna kal mek emaw, hmasawnna thar, ‘hetah hian chutiang chu a ni a’ tih ang kha han sawiho tur awm miah lo budget demand kan sawiho thin hi a hahthlak ka ti a. Kan budget atang hian sawrkar kalphung tur hriat hi a harsa em em mai a, a ngaihna a awm lovin ka hria a. Chu chu Pu Dy. Speaker, ka han sawi hmasa duh a ni.

Demand No.7, Excise & Narcotics ah hian han lut ila. 2020-2021 ai hian budget pumpui hi cheng nuai 549.23 in a han tlahniam phawt a. Tin, chutih laiin Salary bikah hian 2020-2021 aiin cheng nuai 568.54 in a tlahniam daih bawk a ni. Zu khapna dan kan siam a, kan pass a, amaherawhchu, he kan dan siam pawh hi a tak taka tihhawhlin tumna a awm lo emaw ni, thawktu mi tlemte an awm a, hna lak thar pawh kan budget-ah hian hmuh tur a awm lova. Ka han bih ngial thin a, hna lak thar chu sawiloh a hniam zawng hlir mai hian kan kal niin a lang tlat mai a. Chuvangin helai hi a pawi ka ti em em mai a. Pu Dy. Speaker, heng zu khapna dan kan hman mek te, tin, ruihhloah kan thalaite an buai em em a, helamah hmalatu tur leh hnathawktu ber Excise & Narcotics Department hi tihchak an ngai ngawih ngawih a. Hlawh a tlem zawnga kuminah a kal ringawt maite pawh hi ngaihtuah tham a awmin ka hria a. He zukhapna dan kan hman mek hi tih hlawhlin tum tak takna hi a awm lo em ni tih hi ka ngaihtuahnaah a awm a ni.

Tin, Demand No.29-ah hian tawite tein han lut ila. Social Welfare Department-ah pawh hian 2020-2021 aiin 2021-2022 a kan budget pumpui hi cheng nuai 13,202.57 in a tlem daih zawk bawk a ni. Tin, hlawh chungchangah pawh kuminah hian nuai 1,321.68 in

a tlem daih zawk bawk a. Pianphunga rualban lote *personally disabled* kan tih hote, craft centre, anganwadi-te heng nutrition kan pek ang chite pawh hi helai budget atanga han en hian kan kalpui thei lo hial mai awm mang e tih ngaihtuahna a awm a ni.

Tin, hetah pawh hian heng mite tana hmasawnna thar tur ruahmanna engmah hmuh tur a awm lo a, high protein chungchang thu thleng hian kan tlahniam fai vek ringawt mai a kan budget-ah hian. Hei hi a pawi hlein ka hria a ni.

Tin, Demand No. 34, AH & Vety bikah hian helaiah hian 2020-2021 aiin kuminah hian kan budget hi nuai 2,213.89 in a tlem leh bawk a ni. Sa-ah kan intodelh loh kan hria a, artui-ah pawh kan intodelh lo a, sokar-in hemi a intodelhna tur hian theihtawp a chhuahin hma a la a ni tih hi kan hriat reng a ni. Amaherawhchu, kumin budget-ah hian sa-a kan intodelhna turte, ar a ni emaw artui a ni emaw kan intodelhna turte-in budget-ah hian pawisa engmah dah a awm lo niin a lang a ni. Chuvang chuan kan intodelhna tur atana hna kan thawhna ber tur pawisa a awm loh chuan engtin nge kan intodelh theih ang?

Chuvangin, chutiang ang hmasawnna tur ruahmanna thar hmuh tur awm lova demand kan han sawi ringawt mai hi keichu hrehawm ka ti a ni. ‘Helaiah hian, chutah chuan hma kan la a, hetah hian hmalak tum a ni a’ tiin capital expenditure turte chiang taka tarlan ni sela, chuta tang chuan ‘helaiah hian pawisa dah belh a la ngai a nih hi, hei hi kan thlen chin tur a nih hi’ tia sawi theih awm miah lo demand kan sawi a ni a, a pawi khawp mai.

Tin, Demand No. 41-ah hian lut leh ta ila. Sericulture Department-ah pawh hian kumina kan budget hi nikum 2020-2021 aiin nuai 629.20-in a tlem leh bawk a ni. Kan budget hi helai bikah phei chuan Revenue chauh tarlan a ni a, Capital pawh hi tarlan a awm miah lo. Sericulture hi kan ram economy siamthatna atana kan innghahnna a tling a ni. Muga, Mulberry, Eri kan tih te heng ang chite hi kan ramah hian a tha duh hle nia sawi a ni a. Chuvangin silk production neia tharchhuak turte, silk cocoon production tun aia nasa zawk nei turte, hemi silk production hrim hrimah pawh hian *large scale* production nei tur khawpa pawisa hman tur budget-ah pakhatmah hmuh tur awm lo hi a pawi ka ti em em a. Heti hi chuan hmasawn ngaihna a awm lo, engtikah mah kan ram hi kan intodelh a rinawm loh hial a ni. Chu chu Pu Dy. Speaker, ka hmuh dan a ni a, a pawi ka ti khawp mai.

Demand No. 39, Power & Electricity-ah hian han lut leh ila. Demand dang dang pawh sawi tur a la awm a. Hei, 2020-2021 RE-ai khan 2021-2022a budget estimate hi cheng nuai 19,422.35 ngawtin a tlem a ni. Hei hi a pawi ka ti khawp mai. Kan ramin kan mamawh bulpui ber pakhat chu power-a intodelh hi a ni. Theihpatawp chhuahin hma kan la a, solar power siamchhuahna tur zawng pawhin hma kan la a, a lawmawm a ni. Tin, tuikhua te reuh te te pawh kan khuap a, a tha tho-ah ngai ila. Mahse kan la intodelh chuang lo, intodelhna pakhatmah hetah hian kan la nei lo. Chumi awmzia chu Mizoram-in power a mamawh san lai ber hi megawatt 140 nia chhut a ni a. Pu Dy. Speaker, a tlang ka kawm dawn a ni a, he mi zawk hian, department dang chu ka lut lo mai ang. Tichuan, State dang

atanga kan lei thin hi megawatt 70 a ni tlangpui a. Tin, kan mamawh zual bik hunlaiah megawatt 120 vel te lei a lo ni a.

Tin, 2018 atanga 2020 February inkara power leina a tana kan sum senso zawng zawng hi nuai 7,668.66 lai a ni a, power-ah hian kan intodelh lo em em a. Kan ramah Pathianin lui tui, kawlphetha siamchhuahna tur remchang tak tak min pe a, heng ang hi vawiin ni thlengin khuap lova kan awma kawlphetha siamchhuahna hmanrua a tana kan la hmang lo te hi a pawi em em a. Kumin kan budget hi Demand kan sawihonaa tum thum ka tel ve na chinah pawh hian chutiang lam hawi zawng pakhatmah Demand-ah hian ka la hmu lo a, pawi ka ti ngawih ngawih a. Kan ram hi eng tikah nge a intodelh ve ang ei leh barah te. Vety- ah te, Agri-ah te, Industry hnuiaia factory lian nei ve turin, kan thalai, thangthar lokal zel ten tih tur, thawh tur an neih vena turin kawlphetha kan neih a ngai, kawlphetha kan neih that loh chuan chung chu a tih theih loh.

Chuvangin, vawiin ni a kan ram harsatna zawng zawng te hi hria in ngaihtuahna tak tak kan hman hi a hun tawh a. Vawiinah Power & Electricity Demand kan sawi naah pawh hian chutiang ang hawi zawng hmalakna hmuh tur a awm lo va, pawisa pawh dah a awm lo hi pawi ka ti em em a. Chu chu tawi te in kan sawi duh a ni. Sawi tur a tam a, amaherawhchu hun a chep si a, kha kha ka han sawi theih ni mai sela. Kan budget hi a pumpui thua ka thlir hian nichin a ka tarlan ang khan ruahmanntha, hmasawn tur thar, sawrkarah kalphung thar pakhatmah hmuh tur awm lo hi a rilru nat thlakin ka hria, Pu Dy. Speaker, ka lawm e.

**DEPUTY SPEAKER :** Awle, tunah chuan Member zahawm tak Pu BD Chakma ka sawm ang a, aniin a sawi zawk hian Pu Lalmuanpuia a lo inring dawn nia. Member zahawm tak i lo sawm ang.

**PU B.D. CHAKMA :** Pu Dy. Speaker, ka lawm e. Chair i lak hi chuan thusawi nuam ka ti khawp mai a. Mizoram State chu Special Category State a ni a, 9 to 10 minutes-in kan kal thin a. Chutiang chuan keini pawh ADC area atanga Member zahawm tak te hi chu 9 to 10 minutes min pe thei se ka duh khawp mai, ADC area MLA bik te tan. He ka introductory speech hi chu i chhiar tel loh ka beisei Pu Dy. Speaker. Tunah ka hun chu ka tan dawn chauh a ni.

Demand No. 23, Art & Culture-ah lut ila. Thil thar pakhat ngaihtuahna ka nei a, State thenawm te, a bikin Assam leh Tripura te chuan community te deuh te festival hmanna tur atan pawisa an dah thin a, an budget-ah. Mizoram-ah chuan tun thlengin chutianga tih hi ka la hre ngailo a, hnam te zawk Lai, Mara, Chakma leh Bru te kan awm ve a, kan community festival, a bikin Chakma-te hian ‘Biju’ kan nei thin a, kum khatah vawi khat ropui takin kan hmang ve thin a, festival ropui tak a ni a. Chutianga tan chuan tanpuina hi a awm thei ang em, community tlem zawk te festival hmanna tur atan? State fund atanga a theihloh pawhin eng emaw fund atanga ngaihtuah dan a awm chuan, kan Minister chak tak Art & Culture Department changtu-in min lo hriat sak se la.

Tin, Demand No.27, District Council & Minority Affairs-ah ka han lut leh ang a. District Council & Minority Affairs enkawlna atan tun budget statement-ah hian cheng khat mahin a pung lova, nikuma mi ang chiah, a pangngai in an dah tawp a ni a, hei hi engnge a chhan ka hre duh hmasa a. Tin, Supplementary Grant pawh hi Lai leh Chakma-te tlemte pek niin, Mara phei chu cheng khatmah pek an ni lovin ka hria a. Member zahawm tak Pu KT Rokhaw sawi ang khan a ratio zawng hian Supplementary Demand pawh hi pek theih ni se kan lawm ngawt ang.

Chu bakah CADC financial management thalo lutuk hi hmana tangin kan tuar nasa khawp mai a, financial management leh administrative management te kan sawi fo thin a ni a, March thlaa kan Session-ah pawh training chungchangah te, sawrkar hna inpek chungchangah zawhna ka zawt tawh a, Chakma District Council budget statement hmasaah khan sawrkar hnuiah hna thar pek tur leh training course atana budget allocation engmah a awm lo a, chutiang ni siin mi 50 vel training lai a awm a, an stipend pawh tam tak hlawh angin an pe thin a, tunah pawh an la pe a ni. Hetiang kan nih chuan engtin nge hma kan sawn ang tih ka ngaituah a, session hmasa khan CADC bik budget deficit kha 15 crore niin a lang a, chuti zat nei siin sawrkar hna thar pek leh training tura intirh chhunzawm a la ni chuan kan hma lam thim zia tur hi ka ngaituah a. Chuvangin khawngaih takin kan Minister chak tak hian min hriat sak sela, financial leh administrative control hi dik taka kan kal loh chuan nakin zelah ADC pathum te, a bikin CADC area chuan hrehawm kan ti khawp mai. Chuvangin, administrative leh financial control hi heta tanga tih loh chuan buaina a awm zel ang tih kha ka ngaituahna awm a ni.

Tin, PMJVKY hei hi a hming thar a ni a, hman ah chuan MSDP a ni a, hei hi policy thar chu a ni miah lo a, ‘minority’ chu kan sawi tawh angin, religious minority tur a ni a, Pu Deputy Speaker, religious minority anih chuan nichin a Member zahawm tak Pu Rokhaw sawi angin, Mara kan unaute pawh minority tho an ni a, chuvangin PMJVKY hnuiah Mara District Council pawh hi telh ve ni se a lawm ngawt ang.

Tin, Demand No.39, Power & Electricity chungchangah, power chungchangah a bikin Minister-in chak taka hma a lakna zarah eastern side chu a eng tha a, Tuichawng bial lam, mahse khutah Parva lam leh keini Indo-Bangla border lam Theka te leh khaw tam tak tun thlengin electric eng an la nei lo a, pathum nge pali chauh Pu Deputy Speaker, Chhotapansuri thleng chu electricfied a ni a, a piah lam chu eng a awm lova, khawngaihtakin kan Minister chak tak hian hma min lak sak se kan lawm ngawt ang. CADC headquarter, Kamalanagar-ah krismas vel khan thla khat ka awm a, nitin tliai lamah power cut darkar khat vel a awm thin a, engnge a chhan hei hi, power supply a chak loh vang nge transformer that tawk loh vang? Chuvangin khawngaih takin wind up naah Minister zahawm tak khan min lo hriat sak sela.

Tin, Demand No. 29, Social Welfare Department-ah khan, kan Minister hi a chak hle a, mahse a potfolio department pali, abikin Social Welfare tun tum chu a ro khawp mai

a. Central atangin Tribal sub-Plan hnuia Article 275(1) hnuai-ah sorkar hmasa khan sum tam tak a lokal a, mahse tunah hi chuan a ro hle a ni. A sum zawng zawng Sports department-ah vek a kal a, hei hi an inkarah inhriatthiamlohma a awm nge ka hre lova. Engpawhnise, Tribal sub-Plan hnuia Article 275(1) atanga pawisa lut zawng zawng kha chu central ministry atangin Social Welfare Department-ah lut thei se a tha ngawt ang.

Hei, thil diklo pakhat sawi ta ila. EMRS (Eklavya Model Residential School) hi kum 4 Kamalanagar-ah a awm ve tawh a, mahse work progress a muang khawp mai, Pu Dy. Speaker. Ka lo kal hmain ka va tlawh a, work progress 50% pawh a awm ang em aw ka ti a. Khawngaihin a Minister chak takin min lo hriatsak se la financial leh physical achievement hi engnge tih kha. Hetianga kan kal zel anih chuan kum hnih hnuah pawh an sak zagh a rinawmloh a ni. Tunah sikul tan a hun tawh a, inluahin an kalin ka hria a. Nichin lawka sawi ang khan, staff-te pawh lak thar a ni a, inluah tur pawh an nei lova, awmna turah an buai hle a ni. Chuvangin, hei hi chak taka hmalak theih dan min ngaihtuah sak se. EMRS, Kamalanagar hi compound lian tak a ni a, mahse sikul sak hna hi a muang lutuk a, hei hi min lo hriat sak se.

Tin, AH & Veterinary ah tlem sawi tur ka nei bawk a. Chawngte area bik hi chu hman ai chuan hma a sawn ve deuh a, Minister chak tak kaih hruaina hnuiah. Tunah hian animal vaccination pawh a kal tha a, mahse Theka area lamah chuan a la chak tawk lova. Tin, Borapansuri-a Rural Animal sub-Centre hi min lo hriat sak bawk se ka lawm khawp ang.

Tin, Excise & Narcotics ah hian, hei, tun tum chu chanchinbu ka chhiar deuh reng a, front page-ah hian Champhai lam atangin ruihhlo thil hi nitin vaibelchhe engemaw zah man hi alo chhuk reng thin a ni a, hei hi chu Excise & Narcotics Deptt.-a staff indaihloh vang nge sorkar lam atangin policy a dik loh vang ka hre lova, chuvangin control theih dan, ruihhlo lampang, engtinngé kan do ang tih lampang ngaihtuahna kan neih tha ka ti a, dry state kan nihna atangin engtin nge ruihhlo kan control theih ang tih ngaihtuahna neih a tha ka ti a ni Pu Dy. Speaker, chu chu ka sawi theih tawk ni se. Ka lawm e.

**DEPUTY SPEAKER :** Hun i hmang thiam hle mai; a lawmawm e. Tunah chuan Member zahawm tak Pu Lalmuanpuia kan sawm ang a, a niin a sawi zagh ah Dr. Vanlaltanpuia a lo inring dawn nia.

**PU C. LALMUANPUIA :** Pu Dy. Speaker, ka lawm e. Vawiinah kan Minister zahawm tak tak te pahnih Demand kan han sawi thei hi a lawmawm ka ti khawp mai a, hetianga hun tha min petu Pathian hnenah lawmthu ka sawi a ni. Hunte a reiloh avangin Pu Deputy Speaker, kan sawi zung zung ang a, a hmasa berah chuan Demand No. 34, Animal Husbandry & Veterinary Department hi kan sawi duh a.

Pu Dy. Speaker, he department hnuiah hian kan sorkar flagship programme pawimawh tak mai SEDP te pawh kalpui a ni tih kha Member zahawm tak takte khan an rawn sawilang tawh a. SEDP hnuiah Vawk vulhte, Ar vulhte kalpui a ni a, kan hriat theih angin Covid-19 in min tibuai em em a, ranvulh-ah, Vawk-ah te kan intodelh lova, a chhan chu kan thenawm State-ah te PRRF te, African swine fever-te a leng a, tun hma angin vawkte pawh kan lalut theilo a ni a, chutih karah Covid-19 hripui leng harsatna tawpkhawk karah pawh kan Chief Minister zahawm takin min ngaihtuah a, a changtu Minister Dr. K. Beichhua-in a ngaihtuah em em a, Pilot Project, hna tam tak chu a la nilo tih kan hria a, Vawkpui vulhte, Vawk talh tur ang chite leh Ar pawh chi hnii Rainbow rooster leh Broiler te kalpui a ni a. Vawkvulh-ah hian kan ranvulh tute tan nuai 3 te an han pe a, Ar vulhah pawh 1,50,000 te pek a ni hi a lawmawm khawp mai. Amaherawhchu hei hi a pilot tak tak a ni a, a bul tanna a ni a, kan mamawh a phuhru zolo hle mai, Mizoram khaw awmzat han ngaihtuaha han suangtuah hi chuan, chhungkaw 1020 hi chu a pilot tak tak a ni a. Amaherawhchu, Covid-19 hripui leng karah pawh hetianga hmachhawp, kan intodelh theihna tur kawng an insat kaw hrim hrim pawh hi Pu Dy. Speaker a lawmawm ka ti khawp mai.

Tin, chu mai a ni lova, Vawk hi Mizo te hian kan ngaihsan leh kan ei tam ber a ni a, Vawk lamah pawh hma Vety Department hnuiah hian lak a ni nasa hle mai a. UK atangin Vawk chi tha 45 zet mai lak luh a ni a, Yorkshire leh Landrace te kha lak luh a ni a, report-ah te pawh khan kan ngaithla tawh a. Tunah hian Delhi-ah enkawl mek an ni a, mahse kan thenawm State-ah African Swine fever te a len avangin rawn phurhtlang theihloh a ni tihte kan hria a. Khang kha kan Minister zahawm takin min lo hriatsak sela, Mizoramin kan mamawhna a sang si a, kan intodelh a ngai si a, khangte kha Mizoram hi lakluh thlen dan ngaihtuah hram theih ni sela a lawmawm khawpin ka ring. Tin, chumai ala nilova, Kel lian chite pawh lakluh a ni a, Thenzawl-ah enkawl mek a ni tihte kha a hmaah pawh khan kan ngaihthla tawh a. Kel lian chi, *Beetal* leh *Sirohi* te tunah Thenzawl Farm-ah tipung tura beih mek a ni a, kan mizo kel kan tih ang ai hi chuan a sangin a lian em em a, a sa te pawh a tam em em a, saw saw rintlak tur leh tha tak tur niin ka hria a. Sawngte saw mipuite tana pekchhuah theih hun ala awm dawnin ka hria a, helama Vety Department hmalakna hi a lawmawm ka ti khawp mai, Pu Dy. Speaker.

Tin, Siaha, Lawngtlai, Lunglei, Serchhip, Mamit leh Kolasib District-ah te Vety Hospital thar sak a ni te hi, hmasawnna mitin ka hmu thei a, a tak takin hmuu theiha a awmte hi a lawmawm khawp mai. Rural Animal Health Centre 35 te chu Vety Dispensary a thlan kai a ni te hi hmasawnna kan hmuu a ni a, a ngai ngar ngarin he department hi a kal lo a ni tih te a hmuu theih a. Tin hei District thar kan neih Khawzawl, Hnahthial, Saitual te pawh Vety Office din tura ruahmanna kalpui mek a ni te pawh hi, heng District thar te hi kan hlamchhiah lo a ni, hma kan la a ni tih he Sorkar hian a rawn tichiang em em a, a changtu Minister pawh a fakawmin ka hria a, a lawmawm ka ti khawp mai.

Tin, nichina kan sawi tawh ang khan Pu Dy. Speaker, ran hri hlauhawm tak tak African Swine Fever leh PRRS te a len thin avang leh ran lakluhte lo enfiah a ngaih avanga Animal Checkgate 10 lai mai border area-a siam a ni te hi ran vulh tute tan a thlamuan tlak hle mai a. He Department-ina hma a lakna hi a lawmawm ka ti khawp mai.

Chumai a la ni lova, Ar leh Artui-ah te kan intodelh theihna tura kawng hrang hranga hmachhawp a han awm te, ZPBS Tanhrilh-ah Ar note tam zawk awp keuhna tur, 60,000 lai mai keu tir tura hmalak a ni te hi a lawmawm khawp mai a. Hmasawnna hi Covid-19 hripui leng karah pawh chak tak chuan kal a har a, mahse he department pawh hi a thu mai mai ni lovin, hma a sawn a ni tih hi Pu Dy. Speaker a lang chiang khawp mai a. Tin, Mampui Farm-ah pawh Artui, kha Member zahawm tak takte khan an rawn sawi a, 1305 lai mai awpkeu tir a ni te kha a lawmawm khawp mai. Covid-19 hripui leng karah pawh he department kal tlang hian lockdown chhung pawh khan *meat and animal supply chain* an kalpui a, mipui harsa zawkte ina sa kan hmuh theihna tura ruahmanna, mipuite kan tlachham tur veng a ruahmanna an rawn siamte kha a thlamuan tlak khawp mai a, a lawmawm ka ti khawp mai.

Tichuan a dawt leh Demand No. 29-ah hian ka han leh ang a. Social Welfare & Tribal Affairs-ah hian hma lakna tam tak hmuh a ni a, Member zahawm tak tak te khan an rawn sawi tawh a. Eklavya Model Residential School 11 lai mai hmalakna a han awm te, tin, a funding source te pawh kan hria a, sorkar laipui atanga kan hmuh, an rawn tum vek a ni te kha a lawmawm ka ti khawp mai a. Tin, Kelsih-ah Tribal Research Institute sak a ni te kha a lawmawm khawp mai a, a chhuanawm ka ti khawp mai. ‘Lalnu Ropuiliani’ kan ti fo a, Ropuiliani Museum a awm tur hi kei chu a lawmawm ka ti a, a chhuanawm ka ti khawp mai, kan Lalnu ropui, Tribal Freedom Fighter hriat rengna tura Ropuiliani Museum tuna Kelsih-a sak mek a ni te hi a lawmawm khawp mai.

Tin, Jordan Centre, Sethawn hi a pawimawh khawp mai a, kan Chief Minister zahawm tak hian hmalakna tur SEDP-ah pawh khan ruihhlo ngaite chhanchhuahna tur sorkar flagship programme ah pawh a tel a. Kan Minister zahawm tak hian chak takin a bawhzui a, tunah hmalak a ni te hi a lawmawm khawp mai a, peih a ni tep a, kan ram hi economic dinhmunah sang eng ang mah ila, khawtlang nun nuam a awm si loha, kan ram a dam siloh chuan awmzia a awmla a ni. Chuvang chuan khawtlang nun nuam, society nuam a awm theihna tura hetianga hmalakna, ruihhlo ngaite enkawlna tur a awm te leh a hmuna hospital changtlung zawk, an mahni enkawlna tur sak a ni te hian, he sorkar hian thil a ti mai mai lo a ni, a ti tak tak a ni tih hi a ti langchiang hlein ka hria a, a lawmawm ka ti khawp mai.

Covid-19 hripui leng karah pawh Anganwadi te hlamchhiah miahlo a nutrition pek a ni hi a ropui ka ti khawp mai a, heng Anganwadi an chhawr tangkai em em a, naupang mal-nutrition kan tih ang chi, zokhaw lamah phei chuan khang kha tlachham kan lo awm thei a, chung zawng zawngah pawh chuan an ni hian an cover vek a ni. Pu Dy. Speaker, hun a reilo dawn hle mai a, kan sawi zung zung ang a.

Demand No. 39, Power and Electricity-ah hian, power supply te kan indaih chho tan hle mai a, a lawmawm khawpin ka hria a. Amaherawhchu, nichin khan kan hotute khan an sawi hlawm a, keimahni thar chhuah ngau-ah hi chuan kan la intodelh miah lo tih hi chu a langchiang sa a, mahse hmalakna kalpui a ni a, heng kan tansformer chhia leh eng emaw thlak ngaite thlak zung zung a ni a, hmalakna a kal hrim hrim hi a lawmawm ka ti a. Hengah hian kan department hi a awm mai mai lo a ni, theih tawp an chhuah a, kawng engkimah kan Minister chak tak hian a ngaihven a, hma a hruai a ni.

Pu Deputy Speaker, tlemtein a khaikhawm nan. Ka bial chhung Electric Veng-ah hian transformer a puak reng mai a, hma min laksak a, transformer thar kan nei hi he House zahawm tak kaltlang hian lawmthu ka sawi duh a ni. Sawi tur ka la ngah khawp mai a mahse, Pu Dy. Speaker, hun a tlem si a, ka duhtawk mai ang a. Heng kan Minister zahawm tak takte pahnih Demand hi pass ngei ni se tiin ka rawn thlawp a ni e. Ka lawm e.

**DEPUTY SPEAKER :** A lawmawm e. Hun i hmang thiam hle mai. Tunah chuan Member zahawm tak Dr. Vanlaltanpuia kan sawm ang a, a niin a sawi zagh hian Pu Ramthanmawia, Member zahawm tak a lo inring dawn nia.

**DR. VANLALTANPUIA :** Pu Dy. Speaker, ka lawm e. Vawiinah hian kan Minister pahnih Dr. K. Beichhua leh Pu R. Lalzirliana-te Demand sawi a ni hi a lawmawm ka ti a. A hmasa berin Demand No.7, Excise & Narcotics-ah hian han tan ila.

Kan hriat angin he Ministry hian zu zawrh a khap a chhungkua kan hlim ta viauin ka hria a, khawtlang pawh a zalenin ka hria a a lawmawm ka ti. Drugs pawh a ziaawm chho viauin ka hria a, achievement pawimawh tak an nei niin ka hria a; mahse an capacity a len loh avangin thuam chak an ngai viauin ka hria a, kan hotute pawhin lo hria se tih ka sawi duh a.

Demand No. 29, Social Welfare hi raipuar atanga naupang, tar damlo thlenga an ban department, department zau tak a ni. Achievement tam tak a neih an sawi tawh a, a lawmawm ka ti hle a ni. Minister dynamic tak kan nei a, a ngaihna hria Minister kan nei a, EMRS atana hmalaknate, Tribal Institute leh Ropuiliani Museum atana hma a laknate. Ropuiliani Museum chungchangah hian sawi lawk ka duh chu, kan Minister pawh hian a hre kher lo mai thei a, Ropuiliani hi Bristish ho laka in surrenders loa lar kan hriat a ni a, hetiang deuh tho hian Chhipphir Lal thlah zelah hian Vansanga tih a awm bawk a. Vailian Pahnihna Shakespere khan a man tur ngat khan a lo kal a, Kanghmun daiah hian a rawn man nghe nghe a, ka bial chhung chin chiah chiayah sawn a awm a. An man hnua zanah tlaivara an thlunna thingkung pawh a la awm a, kit reng reng suh u ka ti a. Hengte pawh hi ka han sawi duh mai mai a. Ropuiliani Museum in siam lai khan Vansanga Museum pawh nakinah chuan an la siam turah ngai ila.

Social Welfare-in a achievement a neih te a ropui ka ti a. Chutih rual chuan, kan bial chhung leh Mizoram concern thil sawi ka duh a. Starred Question No. 127-a ka zawhna, ‘Mizoram Child Adoption Rules kan nei em tih hi, ‘Nei lo’ tiin min chhang a. Tin, 2005-2021 chhungin naupang adopt tura an lak hi mi 355 an ni a. Hetah hian thil serious deuh a awmin ka hria a. Kan khel fo thin angin heng naupangte hi a then chu sakhaw dangah te an rawn la a, a then Hindu an ni a, a then Buddhist, a then sap an ni a, an lak dan system tak hi hriatchian a tha khawpin ka hria a. Nakinah Minister pawhin react se ka duh khawp mai. Heng hote hi chungho sakhuah chuan kan pe ta mai thin nge tih hi thil serious tak niin ka hria.

He department hi ka sawi tak ang khan raipuar atanga naupang, tar leh rualbanlo thlenga an chhawr department anih avangin wheelchair leh hearing aid-te, foot clutch-te MLA-te hnенah hian hei aia sem tam theih deuh ni se a va tha dawn ve tih te ka sawi tel duh a. Tin, ka bialah hian Creche Centre-te leh Anganwadi Centre-te hi thuam that ngai tam tak a awm a, hengte hi kan la rawn umzui ang a min lo hriat sak se tih ka sawi duh bawk a.

Tin, Article 275(1) hi hei aia hian tlemin in proportionate deuh ni se. Tuna kan kalphung pangngai ai hian a district-in emaw, a bialin emaw Article 275(1)-a kan project hmuh hote hi inseem rual thei deuh ila a va tha dawn ve tiin duh thu ka sam a ni.

Demand No. 34, Animal Husbandry & Veterinary-ah hian achievement tam tak ka nei a, an rawn sawi nual tawh hlawm a. Hmanni lawkah pawh Amendment Bill a lo lut a, private clinic-te hospital-a dah remtihname a awm a. Hmasawnna tam tak kan neiin ka hria a, slaughter house tha zawk leh sa leh hatchery lam a hma kan sawnna te, hightech laboratory lama hma kan sawnna te a awm chho zel a, a lawmawm ka ti.

Kan bial relate tlem sawi duh ka nei a. Serkawn-a Vety Department hi kan office a chhiat vek tawh avangin tunah hian VC House-ah office an kal ve a ni tih min lo hriatpui se ka duh a. Tin, heta an peon pawh kha a pension a, tunah hian Serkawn-ah peon nei lovin kan awm tih kha min lo hriatsak se ka duh bawk a.

Tin, RAHC, Pukpui hi centre upa tak tawh a ni a, Zotlang khawpuiten an hman tawm a ni bawk a. Amaherawhchu, hma a sawn lo viau mai a, hei hi attention min pek sak se tih ka duh hle bawk a. A aia serious leh chhawng chu, Haulawng khawpuiah hian Vety Dispensary kan nei a, doctor leh VFA awm miah lo a ni a, a rei viau tawh lehngthal a, department officials leh Minister-te hian min lo chhinchhiah sak se ka duh bawk a ni.

Demand No. 41, Sericulture hi ka sawi fo thin a, sawi uar pawl tak ka ni vein ka hria a, scope a that zia leh global warming avanga Assam pawhin Muga tharchhuah pawh an tih hleihtheih tawhloh avangin a seed pawh an produce hleihtheih tawh loh thute kan hria a. Tunah hian mizoram hi favourable climatic condition a ni chho a ni tih te, mulberry-ah hian tlemin a ziaawm lo deuh a. Muga leh a bik takin *Eri* ah scope a that zia te, vai ram aia a tui

keu pawh a tam zia te kan hria a ni. Hei hi NASA zawkin SEDP-ah te pawh hian assistance hi pek nise ka duh khawp mai a. *Tasar* te pawh a la awm zel a, ka bialah hian Pu Tlanzara hian Zapui ramah sericulture hmun hi nei tha ber anih ka ring a, *muga* farming-ah chuan Mizoram-ah vawi khat harvest-ah hian cocoon nuai khat chuang thar theihna hmun tunah hian kan nei a, hmun hmuhnawm tak a ni a, hengte pawh hi Minister zahawmtak hian demonstration centre atan emaw, model centre-ah te pawh min hmansak se kan duh hle mai; Mizoram mipui hi kan lo zirtir ang e kan bialah hian tih te ka han sawi duh a ni.

Tin, Art & Culture, Demand No.23, kan Minister zahawmtakah khan pakhatah han pakai ve ta ila. Pu B. Lalthangliana, Historian ina a lehkhabu ziaka pasaltha hrang hrangte an ranking a pekah hianin, sahrang hmaa huaite, tlawnmgai te, ral rel thiam han tih te, huaisen hrim hrim han tih te, khatianga Mizo pasaltha hrang hrang 19 vel a analyzed-na lehkhabu hi ka chhhiar tawh a. Chuta a dahsan ho zingah hian Chawngbawla chu ‘ral rel thiam’ atih ah hian a tel a. Ka bialah hian *Chawngbawla thlan* a awm a, a thlahte zingah pawh tunah hian kan Legislator-ah pawh hian an awm a Pu Valtea, Pu Zothantluanga hi a thlahte zinga mi a ni e te pawh an ti a. Chawngbawla thlan hi a chhe khawp mai a, hengte hi chawisan tlak leh chei tlak a niin ka hria a, khawngaihtakin kan Minister khan min lo hriatsak se ka ti a ni.

Demand No. 39, Power & Electricity-ah hian sawi tur tam tak ka nei ve a, kan sawi duha chu lawmthu sawinain bul kan tan leh ang a. 132 kV alternative line ‘Melriat line’ kan tih bawk commission anih hi a lawmawm hle a, mahse Lunglei lampang tan hian he line hi Khawiva Station-ah a lut a, a Minister pawh hian chiang takin a hre tawh a, a overflow a NASA em em a, a dahkhawl na kan nei tawh lo a ni. Chutah chuan transformer lian zawk phurh a ngai a, chumi phur luhna tur kawng pawh chu a awm thei lo a ni, Pu Dy. Speaker. Hei hi thil serious tak a ni a, a khawl lian pawh chu procure dawn pawh ni ila a phurh luh hleih theihloh a, kawng chhe takin tunah hian a awm a. A.A. tawh kha nuai 400 kan nei a, nuai 100 kan thawk tawh a chu chu permanent works in culvert leh eng eng emaw kan ti a, nuai 300 pawh hi a kawng siam nan min pe thuai thei se kan duh hle mai tih kan sawi duh a.

Pu Lawmawma Tochhawng khan a sawi tawh a, Khawiva-a megawatt tamtak lo chawlh lawk tirma tura kha thuam that a ngai a, ban pakhat grid line kha a hnaiah a awm a, kha grid line atanga sub-station-a lut mai tur kha a ni a, tichuan power tamtak a store theih dawn a, chumi atan chuan pawisa kan mamawh hle mai a. Chumi ina a nghawng leha chu, Lunglei khawpui tui semna, Lunglei Greater Water Supply scheme kha megawatt tamtak pek a ngaih avangin... (**Dy. SPEAKER : I hun a tawp e.**) Pu Dy. Speaker, hei hi ka han zo ve lawk ang e, khawngaihin.

Mipui tena an tui hman tur zuk pump-a kha a tlem berah 22 hours te pump a ngaih avangin tunah hian darkar 17, 18, 19 te an pump thei tawk a, mipuiina an hman laia kan zuk pek thlak kha chuan Power Supply-ah kan in daihlo ta thin si a, he thil hi a serious khawp mai tih hi kan Minister-in min hriatsak thei se tih kha ka sawi duh a ni.

Tin, March Ni 2 khan, session hmasaah pawh ka sawi tawh a, grid line Thiltlang khawpui chungah hian hrui lian ho hi inchung lawkah hian a kal a, hei hi chetsual a hlauhawm hle tiin session hmasa khan ka sawi tawh a. Tun March Ni 2 session lai khan thil a tleng ta a ni. An in sa khan mi a man ta a, tunah hian dinhmun serious takin a awm a ni tih hi Minister notice ah ka dah duh a. Chumi awmzia chu, grid line settlement, kan inte nena hnai tak taka awm ho hi thuam thata re-alignment siam that a ngai hle tih hi vawiinah hian sawi ka duh a ni. Tin, Chhipphir line re-alignment tur chungchang pawh kha ka sawi tawh a, an survey vek tawh a department-in, pawisa chiah kan mamawh tawh a, khawngaih takin heng te hi min tih hlawhtlin sak thuai se tih ka sawi tel duh a ni.

A tawp berah chuan Pu Dy. Speaker, i remtihnain Land Resources, Soil & Water Conservation Demand No. 33-ah hian kan Minister hnenah lawmthu ka sawi duh chu, Mualtuam North, ka biala rubber chingtute tana a process-na khawl tha tak mai min pe a, ka lawm hle a. Ka han sawi belh duh chu Haulawng-a kan soil hmunpui ho hi a rawih hle mai a, kan quarters ho te luah tlak a awm tawh lo tih te kha ka han sawi duh a. Khawngaihtakin kan Minister-in min lo hriatsak se, tun Financial Year chhung hian min siamsak se tih ka sawi duh bawk a.

Tichuan, kan Minister pahnihte Demand sawi hi tha ka ti hle a, ka rawn thlawp a, he House hian pass pui ngei turin ka rawn ngen a ni e. Ka lawm e.

**DEPUTY SPEAKER :** Awle, tunah chuan Pu Ramthanmawia, kan Member zahawm tak kan sawm ang a, a niin a sawi zawh hian Dr. F. Lalnunmawia kan Member zahawmtak a lo in ring dawn ania.

**PU RAMTHANMAWIA :** Pu Dy. Speaker, ka lawm e. A hmasa berin kan Minister pahnih Demand kan sawiho thei hi a lawmawm ka ti a. A hmasain Pu R. Lalzirliana Demand No. 39 hi ka han sawi ang a, hun a tlem si a, Demand zawng zawng hi kan sawi hman dawn lo erawh hi chu pawi ka ti a.

Kan hriat angin P&E-ah hianin kan la intodelh lo a, chutichung chuan intodelh tura hmalakna a awm chho zel hi lawmawm ka ti a. Ka bial chhunga Tlawva Small Hydel Project hi 5 mega watt pe chhuak thei tur kha tunah peih fel ni tawhin June thla tui tam laia commission tura an awm thei hi lawmawm ka ti a, a department changtu kan Minister chungah lawmthu ka sawi a.

Tin, Eva Small Hydel Project 3 mega watt pe chhuak thei tura hi kan nghakhlel khawp mai a, engchen nge hmalak zui anih tih hi kan Minister zahawm tak hian min hrilh theih chuan a lawmawm khawpin ka ring a. Hei hi ka bial chhunga nakina hmalak lehna tur anih avangin kan nghakhlel viau mai a. Khawpuiah hian electric a that viau laiin thingtlangah hi chuan eng emaw hlek a awm hian kan thim ve deuh reng thin a, chungte avang chuan tuna ka han sawi tak ang te kha a hlawhtlin hunah chuan khilai Champhai leh

a chheh vel pawh kan ziaawm phah dawn a, Pu R.Lalzirliana, Minister zahawm tak leh P&E Department hotute chungah lawmthu sawi ka duh a. Kan hriat angin ka bial khi Hmunpuizo atangin a hla a, mamawh kan ngah khawp mai a. Transformer-te hi a inchhiat chhawk reng mai a, mamawh hrang hrang kan han dil a, rang takin hma min laksakin min thlak sak zung zung a, kan lawm tak zet a ni tih kha he House kaltlang hian lawmthu ka sawi duh a ni.

Chutia lawmthu ka sawi mek lai chuan mamawh kan han sawi thin tawh te ka han sawi nawn leh ang a. Pu Deputy Speaker, Diversion of 11 kV line 1.7 kms at Farkawn, Construction of 4 kms, 3 phase 4 wire LT Line at Farkawn, Conversion of 7.87 kms LT Line at Farkawn, Power Supply to WRC at Bulfekzawl, Power Supply to Kawtchhuah Ropui at Vangchhia, Power Supply to Thangchhuah Mual at Vaphai te, Power Supply to WRC at Saikhumphai tih te hi department-ah khan kan rawn dil tawh a, hengte pawh hi Covid hrilenga sum indaih lohna a nasat avangin tunah hian a tang thup niin kan hria a, kan boruak a kiang chho tan dawn nia a lanah hian hlawhtlin kan beisei khawp mai a, min lo chhinchhiah sak se tih kha ka ngen duh bawk a.

Tin, kan bial chhungah hian staff pawh an indaih lo khawp mai a, hengte hi kan sawi tawh thin a, a remchan chuan min rawn ngaiantuah sak se. Chubakah Khuangthing, Saikhumphai leh Thekte-ah hian line duty tur kan nei miah lo a, harsatna kan tawk thin a, tin, staff quarter pawh kan nei miah lova. Heng Khuangleng, Khawbung leh Farkawn-ah te hian Section Office-cum-Building Counter a awm lo va, building pakhat theuh helaiah hian kan mamawh bawk a ni. Farkawn Sub-Station Quarter pahnih Type-II leh Type-III te pawh hi kan mamawh khawp mai a, Khawbung-ah hian Type-III kan mamawh bawk a ni. Tin, Khawbung Sub-Station pan chhohna kawng km 1 vel hi a chhe khawp mai a, furah motor a kal thei lova harsatna kan tawk thin a, hengte hi min lo hriatsak se a lawmawm khawp ang.

Tichuan, Minister zahawm tak Dr. K. Beichhua Demand No. 34, Animal & Husbandry Department chungchangah hian a lawmawm khawp mai a, Sa lama intodelh theihna tura hma an laknaah hian nasa takin kan hmu chho a, SEDP pilot project an han kalpui chho te hi a lawmawm khawp mai a, kan Minister, Board Vice Chairman Pu C. Lalmuanpuia bakah Vety Department-a thawktu ten nasa taka tan lain SEDP pilot project chhungkaw 1020 hnенah pek a ni te hi a lawmawm khawp mai a, a dawngtute pawhin tih tak zeta he SEDP project hi a hlawhtlin theihna tura tan an lak a tul hlein ka hria a, a mipuite pawh ka chah duh bawk a ni. Tin, chubakah chuan Covid-19 len chhungan Meat Supply Chain dinin lockdown kalpui anih lai pawh khan mipuite harsatna sutkian sak a ni a. Mampui Farm-ah te pawh kan hriat tak ang khan Artui 1405 awpkeu tir a ni a, hun hmasa lamah kha chuan 300 te, 400 te tling lo kha awpkeu tir a ni tih kan hria a ni.

Tin, Pu Deputy Speaker, Focus hnuai atang hian kan bial chhungah hma min laksak a, Arte, Rainbow Rooster bial chhung khaw hrang hrangah min sem sak a, Khuangleng, Lianpui, Farkawn, Sazep, Vangchhia, Samthang-ah te Sial In leh tui tlan tur, Mithun Shelter, Community Level and Water Supply Grazing Area te min siam sak a, hengte hi a lawmawm

tak zet a. Farkawn-a chhungkaw pathum hnenah piggery development atangin tanpuina pek tura hma min han laksak te hi kan lawm tak zet zet a ni.

Tin, Vaphai-ah Animal Check Post-te, Khuanglengah Dispensary Building repair-te min han tihsak hian tunah hian hmasawnna kan hmu a. Heng bakah hian kan bial chhungah mamawh kan han neihte kan sawi tawh thin a, VO quarters te, staff quarter-te repair ngai leh sak that ngaite kan nei nual mai a, hengte hi kan Minister zahawm tak hnenah kan rawn thlen tawh a, min lo hriatsak se kan lawm khawp ang.

Pu Deputy Speaker, Demand No. 29, Social Welfare & Tribal Affair Department-ah hian kan hriat angin EMRS kan ti a, central fund 100%, in 11 sakna tur kan sorkar hnuu lo chhuak hi kan Minister zahawm tak chakna leh thiltihtheihna leh thahnemngaihna a ni a, kan lawm khawp mai. Ka bial chhung Khawbung-ah pawh kan lo chang ve a, hengte hi a puitlin hun kan nghakhlel hle a ni. Tin, chubakah Project hrang hrang he Article 275(1) atang hian kan bial tan hian kan dil a, kan thehlut a, chungte chu ka sawi kim seng lo ang a, inchiah mek te pawh a awm a, theih tawp min chhuahpuia, kan bialte khi bial hnufual kan nih anga heng atanga hmasawnna kan hmuh ve theihna turin kan Minister leh a department hian thahnem min ngaihpui turin ka ngen a.

Tin, Farkawn-ah Khualbuk, *Traveller Inn* min sak sak a kan lawm khawp mai a, mikhual thlenna kan nei tha tawk lo va, a building chu nei mah ila a furniture hi kan nei dawn tlat lo a, chungte pawh chu kan Minister zahawm tak hian min ngaihtuahsak turin ka ngen nghal a ni.

Tin, Women & Child Development Department hi kan hre vek a, Nutrition tha tak takte kan naupang te te ten an dawng a, chatlak loa an dawng te hi a lawmawm ka ti a. Tin, Anganwadi Centre hi 2019 khan ka bial chhungah 24 min repair sak a, 2 Farkawn leh Sesih hi hi a hmun sawn a ngaih avangin a thara sak a ngai a, a repair-na in a daih loh avangin tunah hian sak zawh lohin a awm a, chungte chu a sak zawnha tur min ngaihtuahsak leh turin ka ngen a. Tin, Khuangthing Centre-II, Sesih-I leh Farkawn-II te hi sak that mamawh a ni bawk a. Tin, Khuangleng Centre-II hi repair ngai a ni a, kan sawi tak ang khan Farkawn Centre-I leh Sesih Centre-II te hi chu sak chhunzawm ngai a ni. Anganwadi Centre repair ngai, a tira tha reng si lirnghing in a tihchhiat kha 10 kan nei bawk a, hei hi khawngaihtakin kan Minister zahawm tak hian min hriatpui sela ka duh a ni.

Tin, ka bial hmunpua kan neih Khawbung ICDS Project-ah hian mamawh kan ngahin hmalak ngai kan nei nual a, chungah chuan office building sak that kan ngai a, CO quarters sak ngai kan nei a, Godown sak ngai kan nei a, IV Grade quarter sak ngai a ni bawk a. Heng kan mamawh tlangpui ka han sawi zawr zawrte hi khawngaihin kan Minister chak tak hian min chhinchhiah saka, remchan veleh min tih hlawhtlin sak turin ka ngen bawk a ni.

Pu Deputy Speaker, khang Demand ka han sawite Dr. K. Beichhua Demand leh Pu R. Lalzirliana Demand te hi he House hian pawmpui ngei turin kei pawhin ka rawn thlawp a ni e. Ka lawm e.

**DEPUTY SPEAKER :** Awle, tunah chuan Member zahawm tak Dr. F. Lalnunmawia ka sawm ang a, anuin a sawi zawk hian Pu Lalrindika Ralte, member zahawm tak a lo inring dawn nia.

**DR. F. LALNUNMAWIA :** Pu Deputy Speaker, ka lawm e. A hmasain kan Minister zahawm takte demand ka sawi turah hian vawiina member thenkhat ten mizo thuama kan inthuamna support kan han lan terna Art & Culture Department Minister zahawm tak Pu R. Lalzirliana chan hi sawi hmasak ka duh a. Department pawimawh tak a ni a, mizo nunphung chhawm nungtu leh mizo zia rang keng nungtu department a ni.

SEDP-a kan lo sawi tawh thin angin zofate inpumkhatna atana hmalakna eng emaw zah te nikum lamah kan hmu a, cultural events leh Zo Kutpui tihte kan kalpui tan a ni a, mahse kal pui zui hleihtheih lohin hun engemaw chen a awm a. Department budget ka han en hian ka biala mamawhte ka ngaihtuahin thahnem ka ngaihpui khawp mai a, tun aia tam deuh hi sum han dah sak thei se ka ti hle a, a tul angin sorkar pawhin a ngaihtuah ang tih ka ring a.

Mahni bial chhung han sawi ta ila. Mizo nunphung tilang theitu ka bial chhungah hmun eng emaw zah a awm a, Falkawn-ah ‘Zo khua’ kan nei a, kum kal ta lamahte tih changtlun leh chei that a ni a, miin an tlawh tam khawp mai a, a piah leh deuh Tachhip-ah ‘Sibuta Lungphun’ a awm a, mizo nula hmeltha Chhingpui lu khaina hmun te, Pu Deputy Speaker, i bialah khian an thahna hmun kha a awmin ka hria a, Chhingchhip-ah, a lu khaina hmun hi Tachhip-ah kan nei ve thung a ni. Sawng te pawh saw engah mah cheibawl loh leh ngaihven lem lohin a awm a ni. A piah leh Phulpui-ah ‘Zawlpala leh Tualvungi thlan’ hmun kan nei a, ‘Tualvungi them-tui hnawihna’ hmun te, sawngte saw han cheibawl a, mizo culture han tih nana pawimawh mi hmingthangte hmun a ni a, sawng laite pawh saw tlema han tlawh chakawm deuha cheite pawh kan duh hle a, heng atan hian sum tam lehzual han awm se tiin thahnem ka ngaihpui thu kha ka han tarlang duh a ni.

A pahnihnaah chuan Demand No. 39, Power & Electricity Department chungchang hi han sawi ka duh a. A lawmawm hlein ka hria a, nikum budget estimate aia tam dah a ni a, hei hian hna tam tak a thawh theih ka ring a, a bikin electric hrui leh ban hluite thlak tur ka ngah khawp mai a ka bialah, electric ban tlu lek lek eng emaw zah kan nei a ni. Chubakah chuan a hruipui sawn ngai kan nei a, Muallungthu veng chhak lamah sawn inchung lawk lawkah hruipui main line kal a awm a, hman kum khan mi pakhat a in sa ten an hawl palh a, current in a man kha a tla a, a boral phah nghe nghe a. Saw lai hruipui saw sawn kan dil a, kan ngen a, mahse sum harsatna avangin nikum lamah min la tih hlawhtlin sak thei lova, hei hi a theih veleh min tih hlawhtlin sak ka han ngen a ni. Khawchhungah mihring leh In

te an pung zel a, electric line extension te a ngai bawk a, chungte pawh chu kumin chuan a hlawhtlin ve ngei pawh kan beisei a ni.

Tin, Melriat 132 kV sub-station-ah transformer thar dah a ni a, chhim lam khua ten an tangkai pui hle a, a bik takin ZMC-in a tangkai pui a, power harsatna kha nasa takin a chhawk zangkhai ta a, kan lawm hle a ni tih kha ka han sawi duh a ni.

Demand No. 33, Land Resources, Soil & Water Conservation hi kan hriat angin leilung luangral tur venna leh tui hna humhalh tura hmalatu department a ni a, he department hian thlai kumhlun kuhva leh rubber chin lamte uarin hma a han la chho a, a tangkai hle dawnin ka hria. Tui lak leh tui khuahna lamah pawh nasa zawka hmalak a tulin ka hria a. Ka bialah sawn kuhva chin lama tui tak takte an awm a, hengah te pawh min hre ve turin ka chah duh bawk a ni e.

District Council & Minority Affairs lamah hian, District Council atana sum dah hi tangkai taka an hman kan beisei a, district council-ah sorkar tha ngialnghet tak kan nei chho a, nasa zawkin hma an sawn kan beisei a ni. Pu R. Lalzirliana, kan Minister zahawm tak demand chu ka sawi zo ni se la.

Dr. K. Beichhua, Minister zahawm tak department chanah hian ka han kal leh ang a. Excise & Narcotics-ah hian zu leh ruihhlo nasa takin kan do a, tan kan la a, zu leh ruihhlo avanga thihna a lo tlem ta hle a ni tih han hriatte hi a nuam hle a ni. Kan Chief Minister zahawm tak kaihhruaina hnuiah zu leh ruihhlo donaa tan kan han la a, ruihhlo ngaite chhanchhuahna kawnga nasa zawka hma lak a han ni te, de-addition centre leh a bik takin Sethawn-a Jordan Centre cheibawl a ni te hi a lawmawm hlein ka hria a ni. Tin, Excise Constable sum harsat avangin lak theih a ni lova, zu leh ruihhlo dona-ah duhthu a sam lova, a theih veleh Excise Constable tam zawkte pawh lak theih anih ve ngei pawh ka beisei a, ka duhthusam a ni.

Tin, Demand No. 29, Social Welfare-ah hian nikum budget estimate aiin revised estimate-ah khan a let zetin a pung a, a lawmawm hlein ka hria a. Kumin estimate-ah pawh sum thahnem tak dah a ni a, hemi piah lamah Tribal Affairs Ministry atangin project siamin hmasawnna tam tak haichhuah a ni hi a lawmawm ka ti a, heng project hmang hian hmasawnna leh infrastructure chhen fakawm tak tak thawh zel anih ka beisei.

Ka bial chhungah Tribal Research Institute sak mek a ni a; tin, tribal hostel te khawi khawiah emaw sak a ni bawk a. Tin, EMRS hmun eng emaw zahah sak a ni bawk a, heng hian hmasawnna nasa tak a thlen chhoh zel kan beisei a. Tin, ka bial chhungah economic road laih hi a tul khawp mai a, thingtlang mi kuthnathawktute tana kawng tangkai eng emaw zah kan nei a, heng laih te pawh hi rilru leh hmachhawpah kan nei ve a, engtikah emaw chuan tih hlawhtlin ngei te pawh kan beisei a ni.

Tin, Demand No. 34, AH&Vety leh Sericulture hi han sawi kawp ta mai ila. Sorkarin ran vulh leh sa tharchhuah bakah artui a kan intodelhna tura hma nasa taka a la hi ka lawm a, ranvulh lama tui mite tan beiseina sang tak min siam a ni. Tun term chhungah pawh artui tharchhuah a pung ta te hi a lawmawm ka ti. Tin, thalai lekhkathiam hna neilo tan pawh changkang zawk leh tunlai hmanraw tha zawk nena ranvulh dante din chhoh anih zel ka besei a. Sa thianghlim leh sa hrisel zawk, man tlawm zawk te pawhin kan la lei thei ang tih ka ring a. Tin, Vety Department hi Minister tha tak leh chak tak mai kaihruaina hnuiah SEDP bultan hmasak te a lo ni a, an chungah lawmthu sawi ka duh a. Kum lo awm zel turah te pawh nasa lehzuala ranvulh mite tihhmasawn an nih ka beisei.

Tin, Sericulture-ah pawh hmasawnna eng tak kan nei a, keini bial Chawilung khuaah sawn Sericulture lama tuimi, pangang khawi lama tui mi engemawzah an awm a, sorkar department lamte pawh hian han ngaihtuah nasa lehzual se chu, mite tan pawha entawn tur tha tak khua a ni tih te pawn ka hria a ni.

Tin, han let leh hlek ila, Social Welfare Department-ah hian Social Welfare leh an Tribal Affairs department a awm a... (**Dy. SPEAKER:** *Minute khat i la nei e*) .... Women & Child Development Department kan nei bawk a, an ni pahnih hi an tangkai hlein ka hria a. A bikin heng department pahnihte hi mipuite innghahna, nu rai lai atanga tar thlenga mi innghahna a ni. Heng department hian nasa takin hma a la a, kan bialah pawh nasa takin hma min lak sak a, nasa lehzuala hma min lakchhoh sak zel te pawh kan beisei a ni.

Aw le, Pu Dy. Speaker, Minister zahawm tak te Demand hi a tha hlein ka hria a, kan pass turah hian kum lo kal turah hian hmasawnna nasa takin min thlen ka beisei a; tin, department duhthusama sum tuna lang rihlo te hnenah pawh hian hmasawnna major works emaw, hmasawnna hna tam zawkha thawnha tur sum pek anih te pawh ka beisei a ni. Chumi hmang chuan keini bialah pawh hna tam zawk kan thawk ang, hmasawnna tam zawk kan hmu ang tih kha kan lo beisei a ni. Heng Minister zahawm takte Demand hi phur takin pawm ang u tiin ka rawn thlawp a ni e. Ka lawm e.

**DEPUTY SPEAKER :** Aw le, a lawmawm e. Tunah chuan Pu Lalrindika Ralte, Member zahawm tak ka sawm ang a, a niin a sawi zawk hian Dr. K. Pachhunga, Member zahawm tak alo inring dawn nia.

**PU LALRINDIKA RALTE :** Pu Dy. Speaker, ka lawm e. Demand No. 7 Excise & Narcotics hi sawi hmasak ka duh a. Kan bial khu Inter-State Boundary a ni a, Tripura leh Assam ramri-a awm kan ni a, kan ramri-ah khuan Excise check-gate te kan nei ve lova, heng hi min ngaihtuah sak thei se tih kha ka sawi duh a. Tin, a pahnihnaah chuan, Excise Force hi lak tum mek a ni a, physical test te pawh kha neih tawh niin ka hria a, mi 45 tan. Khang kha lak fel hnaih tum tawh a ni em tih te zawnha ang reng deuhin ka sawi tel duh bawk a ni.

Tin, Demand No. 23, Art & Culture hi, Art & Culture sawi dawn hian ka rilru a awm, ka inbuatsaih deuh hlek a kan khuate pawh sawirik tel ka duh a ni.

Kan tleirawl ve lai deuhin Aizawl atangin kan haw thla a, kan khua hi Kawrtethawveng a ni a, khang hunlai kha tlema kan intihchangkan hunlai deuh kha emaw ni, kawngka luchunga “.. & Sons” tih tar kan uar vel lai kha a ni. Kan khawpa pakhat hian, ‘sawtiang kawngka luchunga ziak reng reng Inah saw chuan ka leng dawn lo’ a ti a. Engatinge ka ti a, ‘pa kil kara sazu ek tla ri rek thleng hian Mizo tawngin a ziah theih a, chuvang chuan sawng ho Inah saw chuan ka leng dawn lo reng reng’ tiin min lo hrilh a. Chu chu a rei tawh khawp mai a, min hrilhna hi kan tleirawl lai a ni a ka rilruah hian a awm reng mai a, tun thleng hian ka ngaihtuah a; a Mizo-na thinlung kha a ngaihhlut awmin ka hria a, chu chu ka han sawi ri tel duh a. Tin, kan khawpa bawk hian khang hunlai bawk khan, a ngei ve tho a ni ang chu, a kawngka luchungah hian ‘Hei hi kan In a ni’ tiin a hming a ziak phei tawp bawk a ni. Chuvang chuan kan khaw chanchin kha tlem han sawi ve hrim hrim ka duh a, an ropui ka ti a, Mizo hnam kha an zahpui lova, anmahni a tutu kha a ngaihsanawmin ka hria a, chung chu sawi rik ve hrim hrim ka duh a ni.

Tin, hnama min dintu hi Pathian a ni a, chu hnama min dinna a nemnghehna chu kan tawng hi a ni. Chuvang chuan Mizo tawng kan uar hi a pawimawhin ka hria a, a bik takin tun Covid chungchangah phei hi chuan ka ngaihtuah thin a, Mizo tawng hi a awm mang lo reng reng a. Hei hi ka rilruah ka lo vei ve a, a theih hram chuan Mizo tawng hi kan uara kan humhalh a thain ka hria a, chutiang tur chuan hma kan lak pawh hi a pawimawhin ka hria a ni.

Kum 1940 vela published, ‘Pu Buanga Dictionary’ kan tih mai, kha dictionary kha a tha khawpin ka hria a. Kha kha Mizo tawng zirnan a thain ka hria a, Art & Culture hian chhutchhuah leh a, a quality tha zawk tea kha dictionary kha chhutnawn leh hi a thain ka hria a. Mizo tawng zirnan a pawimawh em emin ka hria a, chungte pawh chu kan Minister hian min lo hriatsak se ka ti a.

Tichuan, Mizo tawng hi kan uar a pawimawh a, thangharte pawh hian Mizo tawng hi kan uar a, kan zir te pawh a ngaiin ka hria a. Ka rilruah hei hi a awm reng a. Vawiinniah hian kawr tial ha ve chiah lo mah ila emaw, kha lampangah khan thu ve chiah lo mah ila, *hnam nihna-ah* hi chuan Pathian-in hnam min dinna hi a zahawm a, a ropui a, chu chu vawn nun hi a tha ka ti a. Tin, Biakina kan zainaah te pawh hian, kei ka duh dan hi lalber dawn se chuan, ‘khuang hnih’ kan tih ngei hian zai hi ka duh a, solfa te hi kan uar a, a that rual rualin Mizo tan hi chuan khuang hnih, ‘lengkhawm zai’ kan tih hi kan mizo nun leh kan ngaihtuahna hrim hrim nen pawh hian a inremin ka hria a, heng hi uar pawh a thain ka hria a, kan social life te pawh a tihdanglam theih hial ka ring a ni kei chuan, chu chu ka han sawi duh a.

Demand No. 39, P&E hi, kan bial khuan mamawhte chu kan nei ve a, mahse kan mamawh te chu chu office lamah te kan rawn sawi ang a, a changtupa hi, a lo awm tawhna party ten a zir bawk a a che tha khawpin ka hria a, chuvang chuanin a department-ah hi chuan engemaw han sawi nawi tur ang thil pawh kha a awm lemin ka hre lova, a lawmawm khawpin ka hria a. Nakinah kan bial mamawhte a bulah kan la rawn thlen ve ang a, min ngaihpawimawh sak chuan kan lawm ngawt ang tih kha ka sawi ve duh a ni e. Ka lawm e.

**DEPUTY SPEAKER :** Awle, a lawmawm e. Tunah chuan Member zahawm tak Dr. K. Pachhunga ka sawm ang a, anuin a sawi zawh hian Er. H. Lalzirliana, Member zahawm tak kha a lo inring dawn nia.

**DR. K. PACHHUNGA :** Pu Dy. Speaker, ka lawm e. Demand No. 34, AH & Vety hi kan hriat theuh angin, Saa intodelhna kan sorkar thupui a ni a, SEDP-ah family 1020 ngawt mai Vawk leh Ar vulh turin kan han thlang a, hma an han la te hi ropui ka ti a. Vawk-ah nuai 3 leh Ar-ah nuai 1 sing 5 ka bialah te pawh kan dawng ve a kan lawm takzet a. Sum tam zawk han nei thei zel sela kan duh hle mai tih kha ka sawi tel duh a. Tin, kan sa duh ber, Vawksa kan duh em em a, Vawk vulhtute kan tang nasa em em a, a production pawh a sang a, a hmelman ber a pul hri PRRS leh African Swine Fever te, tun hmain Vawk a pul nasa em em a, kan sorkar hnu hian kan Minister leh a department hmalaknain a pul hri laka kan him theih nan boundary-ah te ‘animal check-in’ te neia vawiin tlenga kan him te hi a lawmawm ka ti a. Tin, district parukah Dispensary atangin Hospital-a upgrade a ni te, chutiangin ‘Rural Animal Health Centre’ kan tih RAHC 35 pawh siam ani a.

Tin, Arsaa leh artui-a intodelh turin a awp keuna hmun hnihilian deuh deuh mai, a sing bia awp keuna kan han nei te hi a lawmawm a, Lunglei lamah pawh kan nei a, a hmun te pawh kan tlawh thin a hmuhnawm ka ti a, hmasawnna ropui tak a ni. A sing biin Ar a awp keu thei dawn tan a ni kha ka han report ve duh hrim hrim a. Tin, ka bial bikah Vety hi hmuntinah kan tui a, Vawk leh Ar, Ui-te pawh kan hmangaih em em a, dispensary emaw RAHC emaw te hi a building a tlabel em em mai a, a changtu Minister khan min han chhinchhiah sak thei sela, ka bial khaw lian deuh deuhah te khian kan mamawh ve hle mai tih kha ka han sawi tel duh a.

Tin, Social Welfare kan hria a, department chhenfakawm tak a ni a, kan sorkar hnu kum hnihil lekah hian PMRS 11 ngawt mai approval leh phalna te tan a ni te hi ropui ka ti a. Tin, Mizo hmeichhia pasaltha British pawh do ngam leh tlawm ve lo hminga Ropuiliani Museum ngaiantuah chhuah nachang a hria te hi ropui ka ti a. Nuai 800 ngawt mai Kelsih-ah hma an han la te hi ropui ka ti a, kan sorkar leh kan party hian Mizo hmeichhiate kan ngaisang a ni tih pawh hi a chiangin ka hria, Pu Dy. Speaker. Mizo hmeichhia te ropuizia kan hmu zel a, sawi tur tam tak a awm zel a, heng kan culture leh kan silh leh fen zawng zawng pawh hi kan hmeichhiate kutchhuak vek a ni a, chu chu kan Minister-in a ngaihna a hria a, Museum tha tak mai sak tur hi a ropui ka ti takzet a, a fakawm ka ti a ni.

Tin, Article 275-ah project 105 ngawt mai approve tawhte hi a ropui ka ti a, ka ngen duh chu, heng Article project-te hi bial hrang hrangah han sem zai ila keini pawhin kan bial atangin kan rawn ti ve zel a, kan hmuh pawh kan beisei a ni.

Demand No. 41, Sericulture Departmen-ah hian, SEDP project based-ah hian farmers 900 ngawt mai farm puitling tura tanpuina pek te hi a ropui ka ti a. Member dangte pawhin an sawi tawh a, kan ram hi *muga* chin theihna a ni a, ram tinah a chin theih lova, tin, silk zawng zawngah a man to ber, mi hausa te chuan *muga silk sari* te emaw neih kha an intodelhna a ni a an inelna a ni a, a nuai tel man a ni a, chu chu kan ramah production potential kan nei a ni tih kha ka sawi tel duh a.

Tin Demand No. 7, Excise & Narcotics hi, kan hriat angin ruihhlo-ah Mizoram hi a location-in a zir lova kan thenawm ram atangin *golden triangle* atangin engkim a rawn lut a, NGO leh sorkarin theih tawp chhuah mah ila duh ang chuan kan dang lo nain mahse sorkarin total prohibition an puau takah chuan khawlai tibaltu leh kan nun titawp tu ‘Zu’ chu a han kiam ta phawt a, nun pawh a nuam a, nu naute pawh an hlumin kan zalen a, kan hlawhtling takzeten ka hria a ni.

Tin, Demand No. 39, Power & Electricity-ah hian ka bialah lawmthu sawi duhna ka nei a. Hun kal ta zawng zawnga electric current la nei ngai miah lo khaw paruk kan term chhungin kan eng ve a kan lawm takzet a ni. Tin, transformer hmun tinah a chhia a, department-ah kan han thlen a rang takin min han thlak sak thin te hi kan lawm takzet a, Minister leh department thawkute chungah lawmthu ka sawi a. Chutihlai chuan a line chhia neuh neuh enkawltu linesman te an lo pension zel a, a then an thi a, thawktu indaihlohma a nasa em em a. Ka bialah khaw pali, panga enkawl, cheng 4,000/- vela an chhawrte pawh an awm a. Department hian MR te hi han lak belh leh theih se kan duh tak zet a, min hriatpui pawh ka duh a ni.

Tin, Chhimlam tana Power Supply kan harsatna sutkian nan 132 kV line commission a ni te a ropui ka ti a, hmalakna tam tak an nei a. Tin, ka bial bik khawpui chhung Hrangchalkawn-a veng pakhat ‘Bethel Veng’ an tih saw veng thar a ni a, In 30 bawr vel awmna saw power line an la nei lova, department-ah kan thlen a, a Minister-in min chhinchhiah sak se ka duh tak zet a ni.

Tin, Demand No. 23, Art & Culture hi Member zahawmtak Pu Thangmawia khan a bial kha ‘Samdala chettlatna bial’ a ti a. kei ka bial Theiriat hi ‘Mualzavata sulhnu’ awmna a ni a. Art & Culture Deptt. hi a ropui takzet a, kan culture kan tu leh fa ten an hriat zel theih nan tiin lehkhabu ziakte leh history lo preserve te, tin, a takin thawmhaw Mizo incheina te leh culture lampanga hmalakna, intawh khawmna te kan han neite a ropui ka ti a. Chutiang chuan museum hmun hrang hrang leh district-ah te pawh kan nei dawn a, Lunglei-ah pawh min rawn hlui dawn a, kan lawm takzet a. A Minister-in min lo chhinchhiah sak se ka duh

chu, MNF Freedom Movement hi Art & Culture history-ah a lem, pictorial hi eng emaw chen chu dah ve hi tha riauin ka hria.

Museum hi visitor outsider ten an tlawh thin a ni a, Mizote hi engnge kan nih, engnge an tih thin tih an hmuhna chu Museum-ah a ni a. Khawvel ram zawng zawngin zalenna an sual a, mi zawng zawngin an ngaihsan chu freedom movement a ni a. Pu Dy. Speaker, MNF freedom movement hi khawvel lo awm zel tur leh hnamdang te pawhina an hmuh duh leh an ngaihsan hi museum-ah hian awmve ngei se tih hi ka sawi tel duh hrim hrim a.

Demand 33, Land Resources, Soil & Water Conservation-ah hian kan hriat angin SEDP hmangin Kuhva ah te tanpuina te pawh pek a lo ni tawh thin a. Kuhva hi central project-ah a haichhuah theih lova, central sorkar-in kuhva hi a permit lem lo, a feasible lo a, amaherawh chu a hlawkin kan ramah a tha bawk si a tih member tamtakin an sawi tawh angin, kan sumpai lakluhna tha a ni a, SEDP emaw, source engemaw tia sorkarin kan ngaihven lehzual a tha tak zet a.

Tin, Rubber Scheme-ah hian kan Minister-in a sawi thin a, SEDP rubber tha deuh nuai 3 thleng scheme lian deuh mai a nei dawn a. Ka bial Western belt, Chawngte tlangdungah khuan rubber ching duh kan tam hle mai a, min lo chhinchhiah sak se ka duh takzet a ni.

Tin, Demand No. 27, District Council & Minority Affairs-ah hian, kha kanin hnial laih laih a...**(Dy. SPEAKER: I hun a tawp e)** Ka zo tep e. Pu Dy. Speaker, Minority ka bial khawthlanglam bik Lungsen RD Block-ah khaw 14 a awm a, an development scheme hrang hrangte pawh kan rawn thehlut a. Minister pawhin min lo hriatsak sela, min lo chhinchhiah sakin, kan hmuh ve ngei theih nan project te pawh kan rawn dahlut e tih kha ka sawi theih ni sela. A zavai hian kan demand hi Mizoram leh hnam hmasawnna tur hlir ruahmannna budget anih avangin pass ngei i la tih kha ka sawi duh a ni e. Ka lawm e.

**DEPUTY SPEAKER :** Awle, Member zahawmtak Er. H. Lalzirliana ka sawm ang a, anuin a sawi zawh hian Member zahawmtak Dr. ZR Thiamsanga a lo inring nghal dawn nia.

**ER. H. LALZIRLIANA :** Pu Dy. Speaker, ka lawm e. Tuntum chu min rawn hmu fuh ve nalh mai a, i hunah hian sawi hram ka tum thin a, hun ka bawhpelh ngailoh kha kei chu. Minister-te pahnih Dr. K. Beichhua leh Pu R. Lalzirliana te Demand sawi theia ka awm hi ka lawm hle a, Demand based a tawp atang hian kan tan ang a.

Pakhatnaah chuan P & E Deptt., Demand No. 39 atang hian sawi ka duh a. Ka bial chu i hria a, aspiration-a awm kan ni a, session liam taa ka sawi ang khan kan bialah chuan thil tam ber chu, ‘a awm lo’ tih a ni ka tih kha. Lawmthu sawina tur ka nei a, tunah hian 132 kV Bairabi - West Phaileng via Mamit construction a kal mup mup a, ban 3 phun ringawt

nilo, tower a ding ve ta thup mai a, MLA ho hoin background-ah te hmangin thlate kan va lakpui a ni. District capital-ah chuan tower awmlohma area kan ni rei hle a, tunah kan han nei ve dawn hi kan lawm khawp a. Hei, fur an thaw leh dawn a, kan huphur hle sa nghal a ni. Hei hi engtikah nge kan zagh theih ang, hna chu a kal chak viauin kan hria a, thawkutte pawh a lawmawm kan ti. Amaherawh chu tuna kan neih lai 33 kV hi W. Phaileng - Mamit a ni a, ngaw hnuaih hrui hniam tein a kal a, ruah a sur dawna thli a thawt vuk vuk te hian kan mit leh nghal hmak thin a. Mamit khawpui tihtakah kan mit leh dawn anih hi tiin kan lo in ring lawk thin a. 132 kV kan neih hunah chuan khangte kha a bo tawh dawn niin ka hria a.

Tin, ka fak duh leh lawmthu ka sawi duhna chu, Mamit Division hnuaih P&E Department hnuaih hnathawkte khu fak an phu hlein ka hria a, kan line a mumal loh avangin leh a hlui tawh avangin sawi ang khan khawilaiah emaw harsatna a thleng hman zel a. Thimah zan leh chhun pawh sawiloin an feh chhuak a, khulai district harsatna theih ang tawkin sut kian an duh a, department zawng zawngh chuan a thawkrim ber leh hah ber an ni ang tih ka sawi duh a, an chungah lawmthu ka sawi a, ka fak duh bawk a ni.

Tin, improvement hrang hrang a awm a, Northeastern Power System Improvement Project hnuaih te, Northeastern Special Infrastructure development scheme hnuaih te, hemi 33 kV line Mamit - W. Phaileng te, W. Phaileng - Rawpuichhip te, 33 kV line Mamit - Zamuang heng te pawh hi kan han khawih a, line kan han improve a, chungah chuan tunhma te ngaihtuah chuan, tun dinhmunah chuan zia tawh tak kan ni.

Chutih laia ka sawi tel duh chu, West Serhmun kha Forest-in an ram zawng zawng a lak tak avangin sanctuary area atan an rin luh duh avangin khua an rauhsan a ngai a, Mamit-ah khuan In 80 vel an rawn pem a ni. In hmun leh ram kan lo ngaihtuahpui a, veng lian deuh mai an din a. Kan beisei ai leh rin aia hma in power department ten line an thlun sak a. Transformer pahnih, pakhat an dah zo tawh a, pakhat hi an dah zo tawh em aw ka hre lo a. Chutiangin eng min han pe nghal zat mai a, vannei pawh an inti a. Department chungah kan lawm takzet a ni tih kha ka sawi duh a ni.

Chutih ruala ka demand duh chu, district khawpui thanglai kan ni a, eastern leh western side-ah khuan link road kan nei ve a, kawng chu la tha chiah lo mahsela mi tam takin an bawh tawh a. In a pung zel a, hengah hian consumer te tan connection min pek theih dan awm sela tih kha ka demand a ni. Lineman MR hi kan mamawh hle mai a, Lengte area-ten an rawn sawi a, hotute kan dawr a, tih dan a awm hlei thei awm si lova. Rajiv Nagar lamah te an rawn ti a, mahse vawiin thlengin pek kan la ni lo a. Khungah te khuan min ngaihtuahpui theih chuan ka lawm hle ang.

Art & Culture leh District Council Affairs hi ka sawi pawlh mai ang a. Ka bial khu hnam chi hrang hrang awm khawmna a ni a, Dr. BD Chakma kha ka thlawp khawp a, kan bialah te hian Bru te, Chakma te an awm a, Bru phei chu kan area-ah majority an ni a. Dampa

Rengpui-ah In 700 bawr vel, Tupuibari-ah In 700-800 bawr vel a kaihhnawih neuh neuh nen, Bru khawpui kan ni a. Festival *Hojagiri*, 2019 khan an nei ve a, kan Sports Minister khi Chief Guest-ah kan hmang a, chutah chuan Tripura MLA, Pradeep Ryang pawh a rawn tel a ni. Hengho tana fund mumal tak an neih ve thei hi kan duh khawp mai, anih loh chuan hman ve ngei an duh thin bawk si a. Kan Chakma unaute pawhin *Biju* an nei a, khel loin an hmang thin a, chuta a tuartu chu bialtu MLA-te kha kan ni lo thei thin lo a. Hengte hi mumal deuha Art & Culture lam hian fund a tam emaw, a tlem emaw a hminga dah sak ve hi an phu hle lawm ni tihte ka sawi duh a.

Land Resources, Siol & Water Conservation hi tuna kan SEDP project-ah phei chuan nodal department tur a ni a. Kan area khu kuhva te, rubber te that duhna a ni tih hi min chhichhiah sak ula, in hre tawh thoin ka ring a, tam takin eizawnna atan an hmang a, nuai tam tak kum khatah an lalut thin a ni. Heng thingtlang kuthnathawktute hi kan SEDP hnuaiah hian chhawmdawl na NASA tak hmu ve se tih hi kan duh pui a, chutiang tur chuan min lo hriat sak se ka duh a ni.

Tin, Demand No. 34, kan Minister zahawm tak Dr. K. Beichhua chan Animal Husbandry & Veterinary hi han sawi ve leh ka duh a. Lengte, Nghalchawm, Lengpui, khulai khu clustered area vawk vulhna-ah min puan sak niin ka lo hria a. Lengte-ah phei khu chuan piggery farm lian tak tak, vawk sang khat dawn dawn vulhna farm nei mi engemaw zat an awm a ni. Khumi farm lian mai piah lamah khuan khaw mipui ten khumi denchhen khuan in tin deuhthaw khuan vawk, pui sawm te, sawm panga te an lo nei ve a. Ka han sawi duh chu Lengte khua bikah khuan Vety Department hian clinic emaw tal min dah sak sela, doctor-te chu a theih loh anih pawhin VHF, a vil reng tur awm thei sela tih hi kan duhthusam a ni.

Tin, Lengpui ramah khuan, ‘nucleus breeding station’ an ti a, vawkpa chi lakna tunah hian project kan kalpui mek niin ka hria a, a lawmawm kan ti a. Hei hi chak zawka hmatak ni thei sela ka ti a, hmun dang atanga lakluh ngai loin kan ram chhung hi vawkah chuan kan intodelh thei ang tih a rinawm a ni. Kan farm lian te hmunhma leh an hmatakna te han hmu hian a lungawithlak viau a, NASA zawka kan sawrkar scheme hrang hrang atanga tanpuina leh state project-a kan neiha kan tuam hlawm chuan Mizoram pumpui hi kan supply thei ang tih hi kan inring tlat a ni.

Tin, Social Welfare leh Excise hi a lungchhiait tlak ang reng a. Kan bialah khuan office pawh an la nei lova, chuvang chuan nasa taka perform tura beisei theih pawh an ni lova. Mi in luahin fimkhur takin an awm a, hei hi min lo hriat sak se, Social Welfare pawh hian hmunhma an la nei lova, khuti khuan an inkawr tit tet a, kan beisei ang leh kan tum ram kan la tleng thei hrih lo a ni. A hmasa berah chuan office kan mamawh a, chutiang chiah Excise Department pawh mi in luahin an la awm a. Ka hrethiam tho a kan Minister hi, khulam khu a la rawn kal tlem em mai a, hmanniah a hovin kan kal kha a vawi khat kalna

a ni ve chauh a, a mitthla thiam lutuk lo mai thei a. Engpawh nisela khulaiah khuan potential kan nei a, mamawh tam tak kan nei ve bawk a ni.

Tin, AMRS hi amah nena kan titina zulzuite pawh a ni ang a, block tina dah tur an tih chuan ka bial chu kan kawt chu a ni nghal mai a. RD Block pali enkawl e ti loin ka bial chhungah RD Block pakhatmah a awm lo a. Chuvangin Reiek RD Block hnuiah Rawpuichhip-ah khuan min dah sak ve thei sela tih kha amah nena kan sawi dun tawh te kha a ni tih min lo hriat nawn sak leh sela tih kha ka duh a ni. RD Block wise-a an tih chuan keini chu ka kawt leh mai dawn a ni a, chuvangin min lo hriatsak se tih kha ka sawi duh a ni e. Vawiina Pu R. Lalziriana leh Dr. K. Beichhua demand hi ka thlawp a, memberpuite pawhin thlawp turin ka ngen bawk a ni. Ka lawm e.

**DEPUTY SPEAKER :** Tunah chuan Member zahawm tak Dr. ZR Thiamsanga ka sawm ang a, a niin a sawi zawh hian Member zahawm tak Dr. Vanlalthlana a lo inring dawn nia.

**DR. ZR. THIAMSANGA :** Pu Deputy Speaker, ka lawm e. I phalnain demand ka sawi hmain Myanmar-a kan Zo-hnathlak unaute, khilam pang bialtu ka nihna ang pawhin sawi lo thei loin ka inngai a ni. Nu nau pawi sawilo tam tak, raipuar hial ten nunna an chan ta mai a, a hrehawm khawp mai a. Anni hi Mizoram-a an unaute hian kan hre reng a ni. Kan theih tawkin leh kan thiam ang tawkin an tan kan thawk zel dawn tih kha ka sawi duh a. Tin, hemi kawnga kan CM zahawm takin a hmalakna hi kan Zo-hnahthlak unaute'n an thlamuanpui hle a, a lawmawm hle a ni. Kha kha thuhmaah han sawi ve lawk ka duh a ni.

Kan Minister zahawm takte pahnih Demand kan han sawiho a, a lawmawm hle mai a. A hmasaah chuan Pu R. Lalziriana Demand, Power & Electricity Department hi sawi hmasak ka duh a.

Hei hi a pawimawh khawp mai a, tunlaiah chuan Power Supply awm lo chuan engmah a thawh theih tawh lova. Industry te emaw, a lian emaw, engkimah hian power supply tel lo chuan kan ti hleithei tawh lova. Chuvang chuan hun harsa tak Covid-19 karah pawh kan Minister te hmalakna a lawmawm hle a. Kan thim khat khawpin ka hria a, sawrkar hmasate ai kha chuan. Eng a awmloh hi chuan kan phun nasa a, department-te kan han dem ngawt zel a, amaherawhchu, an thawk nasa hle a ni, staff indaih lo chung chung pawhin. Nichinah khan kan sawi tawh a, khawi hmunah pawh linesman te an indaihlo a, kan hria a, ramhnuiah hmun harsa tak takah te an kal thin a ni. Tin, a line han check te pawh hi a harsain a buaithlak a, mi thenkhatte phei chuan nunna hial an chan thin anih kha. Chuvang chuan hei hi pawimawh tak a ni a, chutiang hun khirh tak karah pawh kan Minister ten hmalakna an nei chho a.

Mahni bial hi sawilo thei kan ni lo a. Champhai leh khawchhak lamin tuna kan tlan ber chu Saitual-Khawzawl 132 kV line hi a ni a, hei hi a rei tawh bakah a hlui tawh khawp

mai a. Khilaia an insulator hman khi ‘Brominated Insulant’, technical mi kan ni lova, a dik lo mai thei a, kha kha a *insulation value* hi a hniam tawh avangin 132 kV line-a an hman thin ang polymer disc insulator thara an rawn tlak theih chuan a lawmawm ngawt ang. Kan Minister zahawm tak pawhin min lo chhinchhiah sak se.

Tin, Saitual - Khawzawl hi teak hmun te a karah hian a lo awm a, teak an han lak te hian line tihchhiat te a awm fo mai a, khawl a hlui tawh piahlamah. Chuvang chuan power supply hi kan chhe fo mai a. Khawngaihin 132 kV kan hman thin kha min repair sak sela kan duh a ni. Kan mamawh khawp mai.

Tin, lawmawm ka tih em em chu East Lungdar lampang atang sawn 132 kV line buatsaih a ni a. a khawl te pawh bun tawh niin kan hria a. Saw saw function thei turin chak zawkin hma min lak sak thei em aw? Hei hi kan neih chuan East Lungdar atang sawn Khawzawl, Champhai leh khawchhak lam zawng zawng tan hian thil hlu tak a ni dawn a. Chu chu tunah hian ka sawi hmasa duh a.

Kan bial chhung hmalaknaah te khian lawmthu sawina tur tam tak a awm a. ‘Transformer a chhia’ te kan han ti leh ringawt thin a, theih ang tawkin harsa tak karah Rabung leh Vapar lamah te pawh kan nei lova, min han tlak sak a, a lawmawm khawp mai a. Tunah hian ka bial chhunga khaw thenkhat ah hian PMJSY kawngin an rawn ti chho a. Kan line thenkhat a bik takin Tualpui te khi Rabung in an la a, tunah hian Khawzawl atangin PMJSY kawng tha tak mai a awm a, a line te pawh a theih chuan min tlak sak se kan ti khawp mai a ni. Chutiang chuan kan bialchhung hmun hrang hrang-ah Power & Electricity Department-ah pawh hian hmasawnna tam tak kan nei a, lawmthu ka han sawi a.

Tin, Art & Culture-a ‘Smart City’ hnuaih hian Music City-te kan han din dawn a, hei hi UD&PA hnuai chu ni mahse Art & Culture nen a in tlun zawm tlat a, hengte hi a lawmawm khawp mai a. Kan ram kan hnam dinchhuahna tur chuan kan culture hi kan humhalh that reng a ngai a, kan tawng tleng hian engkim mai hi. Chu chu Mizo-te kan inpho chhuahna pawimawh tak a ni a, kan culture hi a rala hnam dang culture-te kan chhawm zel chuan kha kha kan hnam boralna tur a ni a. Chuvang chuan hmanah khan sorkar hmasa te khan Cheraw World Record-te kan han siam a, a ropui khawp mai a. Khatiang deuh khan ‘guitars assemble’ an han ti a, khawvela *largest guitar assemble* chu May Ni 1, 2009 khan Poland ramah neih a ni a, an record chu 1346 a ni. Tichuan, World’s largest electric guitar assemble hi Nagaland-ah khian record a awm a, Dimapur-ah, January Ni 12, 2013 khan, khatah khan 368 lek a ni. Mizoram-ah hian nikumah khan Covid-19 awm lo sela chu acoustic guitar assemble buatsaih tum a ni a, amaherawhchu kan ti thei ta lo a. Khangte pawh kha Covid-te a han reh dawn tawh bawk a tih theih ve lawm ni tih ka rawt a. Kha kha MZI (Mizo Zaimi Inzawmkhawm) Pawl leh Art & Culture tena an buatsaih kha a niin ka hria a. Tunah pawh hian kha project kha a la awm reng a, hei hi kan Minister zahawm tak khan min lo hriatsak se ka duh a.

Thil pawimawh deuh chu tunah hian Zofate kan inpawha kan inzawmkhawm deuh deuh hi a ngai a. Chuvang chuan Kan Minister mai pawh nilo kan House Leader pawh hian a ngaihpawimawh ber pawlte zinga mi anih ka ring a. Khawvel puma Zofa-te intawhkhawmna hun hi min siamsak thei lawm ni ka ti a ni. Khawvel puma Mizo zawng zawngte intawhkhawmna hun kha han siam ta se la a van ropui awm dawn awm e aw ka ti a, kha kha min lo hriatsak se la.

Tichuan, nichina acoustic guitar assemble ka tih kha, *acoustic* mai ni loin *musicians assemble* kha ni ta se la tih rilruah chuan a awm a. Chutah chuan guitar, hawaiin tih angte leh eng eng pawh tam tak a awm ang chu, keyboard tih ang chite pawh a ni ang a, drums tihte pawh a ni ang a. Kan tawtawrawt-te, kan phaiphuleng-te, kan bur tingtang-te pawh khan han ti vel i la a that ka ring a. Kan culture reng reng, hmanlaia kan bur tingtang-te pawh kha naupangte pawhin han hre chho se kan culture humhalh nan a va han pawimawh dawn em tih kha ka han sawi bawk a ni. Sawi tur hi a tam khawp mai a, kha kha ni mai se.

Land Resources, Soil & Water Conservation kha chu an sawi nual tawh a, a pawimawh khawp mai a hei hi. Mizoram hi potential area a ni tih kan hria a, khangte erawh kha chu kan thiante sawi kha ka rawn ring tawh mai ang a. A dang hi, Vety lamah hian ka han sawiloh chuan hmalakna hi an nei tam ropui si a kan Minister-te hian.

A hmasa berah chuan Excise & Narcotics chungchangah hian lawmthu sawi tur hi a tam hle mai a ni. Tun hmain zu kha kan han zuar a, chuvanga nunna chan tam tak kha an awm phah a ni. Alcohol related disease te kha a tam a, tunah hi chuan Civil Hospital-ah te sawn a tam vak tawh lo a, kan hrisel phah ta a, accident pawh a tlem a, a lawmam hlein ka hria a. Amaherawhchu, kan sawi tawh ang khan Excise Force hi an tlem em em mai a, Excise Constable-te pawh indaih lo chung chung hian theih tawp an chhuah a. Rangvamual pawh khu tunah chuan a danglam tawh a, tun hma kum 10 vel ai kha chuan a danglam hle tawh a ni (**Dy. SPEAKER:** *Minute khat i la nei e*) Chuvangin Excise Force-te pawh hi ti tam deuh hlek i la.

A bikin keimahni bial lamah Champhai pawh khi drugs tawlhma hmunpui, drugs rawn luhna hmun tam tak a awm a. Excise-te an indaih lo hle na chung hian nikum chhung pawh khan tum 5 tum 6 vel kha case lian, damdawi tam takte pawh kha an man a ni. Chuvang chuan Excise force an tlem nain Champhai vela thawkte pawh khi an fakawm khawp mai a. Amaherawhchu, kan quarter-te, kan building-te khi kum 25 chuang a ni tawh a, khingte khi sak that chu a hun tawh a, mi 52 vel staff kan nei a, an leng lo a ni. Kha kha ni mai se Excise lamah kha chuan.

Vety lamah hian kha kan ngaithla tam tawh a. Kan Minister hmalakna kha a turu khawp mai a. District Hospital thar te, khatiang khan thil tam tak kan han nei chho a. Tichuan African Swine Flu, khang ran natna ang chi te pawh kha tunah hi chuan a bo duak ta mai te hi ran vulhtu, ar leh vawk vulhtute tan pawh hian a thlamuan tlak tawh hle a ni.

Champhai-ah khian thil lawmawm deuh mai chu, Sial an vulh nasa a khing laiah khian. Champhai District hmun 8 lai mai ah sial han vulhna turte pawh min han buatsaih sak a. “Mithun Shelter Committee Level & Water Supply Facility for Grazing Area” an ti a, Champhai North bikah pawh khian pahnih lai an rawn ti chho ta khi a lawmawm khawp mai a. Sial te hi kan Mizo-naa bet tlat a ni a, a sa a tui emaw tui lo emaw lam ni lovin Sial hi a bet tlat a. Chuvang chuan hetiang ang project lian tak min rawn tih sak te hi kan lawm khawp mai a.

A tawp nan tak tak chuan Pu Dy. Speaker, hei kan Mizo pi pute hun atanga kan mi pawimawh ang chi ....

(...*interruption...*)

**DEPUTY SPEAKER :** Ngawi lawk rawh aw. Dar 4 a ri a, dar 5-ah khan kan chawl thin a. House ngaihdan la ila, dar 5-ah khan kan chawl leh mai dawn em ni? A nih leh dar 5-ah chuan i chawl leh mai ang aw. Eng nge i sawi zo dawn tawh em? Pu Thiamsanga, chhunzawm rawh le

**DR. ZR. THIAMSANGA:** Ka sawi zo dawn e, minute 1 chiah a ni ang. Kan pi pu sulhnute leh kan Mizo Culture humhalhna atan hian kan mi hlui, mi pawimawh ho hriatrengna lung te kan han ti thin a, a pawimawh khawp mai a. ‘Zokhua’ kan han ti a, thangthar tan zel pawh a pawimawh a. Aizawl khawpui mai ni lo district tinah hian Zokhua te hi siam ang u, kha kha kan Minister-in min hriatpui se. District tinah hian zokhua sak te pawh hi a hautakin ka ring lo a, khangte kha han tih ni ta se. Tin, mi pawimawh tak tak, kha Lengteng bialtu MLA zahawm takin a rawn sawi ‘Samdala’ han tih te pawh kha a pawimawh ang reng khawp mai a, Sialkaltlang-ah a awm a. Tin, Vananpa te pawh Champhai North bial chhunga awm a ni a, khatiang an mahni hriatrengna tur ang chi han tih te pawh kha a pawimawh khawp mai.

Sawi tur tam tak awm mahse hun a tawp tawh a, sawibelhna hun tlem te min pe kha ka lawm a. Tichuan kan Minister pahnih te Demand hi pass ngei turin ka thlawp tlat a ni e. Ka lawm e.

**DEPUTY SPEAKER :** Tunah chuan Member zahawm tak Dr. Vanlalthlana ka sawm ang a. Aniin a sawi zagh hian Member zahawm tak Pu Nihar Kanti Chakma a lo inring dawn nia.

**DR. VANLALTHLANA :** Pu Dy. Speaker, ka lawm e. Pu R. Lalzirliana department chanah khan han lut nghal phawt mai ila. Demand No. 39, Power & Electricity Department-ah khan.

A hmasain kan hnathawk te ho hnенah lawmthu kan sawi duh a. Keini bialah sawn Whatsapps Group te an siam a, current awm loh veleh group kan en nghal a, an rawn report

a ti khan. A nih loh pawhin khawilai emawa electric ban tlu tur ang deuh te kan han puiin kan han report a, an rawn ngaihven nghal thin a. Zanah te pawh an thawk nghal a, an tlan lawp lawp mai a. Hei, fur te pawh kan han nang chho leh ang a, an che nasa leh dawn a, Minister leh a naute ho (ti tawh mai ang) hnenah lawmthu kan sawi a ni.

P&E hi sawi tur a tam em em bik mai a, a dang hi ka ngai pawimawh lo ni lovin, tam thei ang ber sawi ka duh a. Hei P&E Department hi Mizoram sawrkar sum tidanglam theitu tur a ni. Kan budget-ah pawh hian a rawn la hnem khawp mai a, budget hi ‘percentage’ tih vela sawi hi ka peih vak lo a, tun tum chu a ho deuh a, hlawh hi kan sawi a ni deuh zel mai a. Amaherawhchu, SEDP lehkhabu hi tunlai chu ka keu deuh reng mai a, a hun tawh tan bawk si a. Bung 2-na, phek 39-ah khan power-a intodelh chungchang a rawn lang ta a. Chutah chuan kan sawrkar, MNF sawrkar awm hnuah hian 15<sup>th</sup> Finance Commission-ah State Specific Needs, State in an mamawh bik central lampanga an dil naah khan power a intodelhna tur engmah a lang ta lo a. Amaherawhchu session-ah kan han zawt a, ‘hma lak tum a ni e,’ chu an ti ve leh si a, engnge chu ka hrethiam tawh lo.

Tin, 25.3.2019 ah 15<sup>th</sup> Finance Commission member te an lo kal a, Aizawl Club ah, chutah chuan kan Chief Minister-in pawimawh a tihte a rawn tarlang ta a, chutah chuan Power a lang lo leh a, rilru hi chu a hrehawm duh viau. Kum 2019 - 20 ah kan hman tak tak kha nuai hlirin 51,000 chuang a ni, power kan leinaah. Kumin budget-ah erawh hian cheng nuai 30,000 bawr vel an rawn dah leh tlang mai a, hei chu a fuhlo deuhin ka hria, vaibelchhe 200 vel han sawt nghal ngawt mai hi.

Ka sawi fo ang khan budget discussion hi ka peih lohna chhan pakhat a awm a. Revenue expenditure tih thlak tum vangin budget-ah kan hman tur reng si kan mamawh reng tur si kan tihiang vak vak mai a, khatiang anih te chuan capital expenditure, hma kan lakna tur hmasawnna lampanga kha han tihsan te chu a awl ve ang a, amaherawhchu meng leh meng inbum kan tum a, a tih theih tak tak si loh a, a ninawm deuh hlek thin, a chang phei chuan. Mipuite hi min hmu hniam a, min zahlo tak zet anih hi a, tih rilru te a awm vang vang thin a, kan budget kan ngaihtuah hi chuan. (*Er. H. LALZIRIANA: Pu Deputy Speaker, revenue expenditure-a hi, hmasawnna tam tak kha tah khan a kal dawn tho alawm*) Kha kha chu nakin kan duh leh debate kan ti dawn nia. Pu Deputy Speaker, budget lam kha chu han sawi tawh lo deuh mai ila, ni e, a peihawm loh deuh hlek a ni. Patling 40 rualin kar hnii vel kan han chai ve a, kan inbawl deuh tan chu ni deuhin ka hria a.

Tin, September, 2020-a unstarred Question ka zawhnaah khan ₹5.20/- in power kan lei a, kan hrall lehna, IEX kan tih mai, Indian Energy Exchange-a kan hrall lehna hi ₹4.07/- a ni, a tawi zawngin han ti ila, kan chhut neuh neuh a. Chuta kan hloh chu thlatin vaibelchhe 5 dawn a ni a, keini ang State te tan chuan a nasa mah mahin ka hria a. Tin, hei chu a hlui deuh hlek tawh nain a thar ber a ni si, tuna Finance Commission-in kumin kum tira State hrang hrang hoin pawisa an dawn tur report a rawn pekah khan 2017-18 ah khan power-a kan hloh hi vaibelchhe 121 a ni a, chuti anih phei chuan, thlatin vaibelchhe 10 chuang kan

hloh tihna a ni. Kan chhut chian a ngai khawpin ka hria. Hei NTPC-in Himachal Pradesh ah power project an ti dawn a, chutah chuan mega watt 1-ah hian vaibelchhe 9.83/- vel a ngai angin an sawi a, chuti anih chuan khami kuma kan pawisa hmuha kha kan hloh anih zawk chu, megawatt 12 vel hydel project siam theihna te a lo ni reng mai a.

Tin, tun session chhung ngei, Ni 3.3.2021-a Pu Andrew H. Thangliana unstarred Question chhannaah khan, hei ka han zir chiang a, 2019-20 chhunga power-a kan sum sena kha State pawn atanga kan leite ka han chhut a, ₹4.79/- per unit a ni a, state chhunga kan siam nen khan ka han chhut a, kan ti kan ti a, ka tisual loin ka hria a, tukin zing dar thum thleng khan ka chai ve a ni, he thil hi. State chhung atang kan unit leina hi an mahni report hi a dik lo anih chuan a diklo a ni ang a, ka chawh chhuah hi chu a dik a ni. State chhung atanga kan leina rate a hi ₹18.26/- a ni. Ava tam em! Chuvang chuan report kan peka kan financial hi a dik lo anih loh chuan kan power leina hi enfiah a ngaiin ka hria.

Tin, economic survey tuna kan neih mek 2021 ah hian energy exchange a kan hraltha kha tarlan a ni bawk a, a chawh rualin unit khatah ₹2.72/- in kan hralth chhuak leh a, kan leina kha chu ₹5/- bawr vel a ni thin a, chutiang anih chuan chhut vang vanga pakla hisapa han tih pawhin vaibelchhe 400 vel chu a ral dahi a ni, kan lei leh kan hralth inkarах hian, chu pawh chu hralth chhuah leh kan hman loh kan hralth chhuah leh inkarах hian.

Chuvang chuan, power chung changah hian sum hi kan ngaiantuah a ngai ka ti a, mipuite eng chhit man thla khat kan pek lohin, ‘cut in ni ang’ tiin hrui phelh saka vauna *red notice* kan dawng thin a, amaherawhchu kan sawrkarin a lo khawn khawm a, khawiah emaw alo dah tha leh a, tunah hian vaibelchhe 171 hi Finance kutah a awm a, P&E Deparment hian kan eng chhit man pek hi an duh tawh a, amaherawhchu Finance Department kutah ala awm si a, hei te pawh hi kan hriat a ngaiin ka hria a. Power lama intodelh tumna a awmlo hi a pawi ka ti a, hetiang lamah hian hma kan lak a ngai takzeten ka hria a, tawngkama kan sawi mai nilo, a taka hma kan lak hi a ngaiin ka hria. Mipuite hnena sawi hi chu a awl a, amaherawhchu lekhabu te, budget te atang hian tum tak tak a hriat si a ni. Heng ho kher peih tak tak thalai an la rawn awm zel dawn, *kan thil tih tum leh kan sawi a inang nge, inang lo* tih hi a hriat dawn a ni. Hei kan electric bill te a rawn pung leh dawn, amaherawhchu industry kan thanna a sang leh dawn silo, budget kan han pharh leh ang a, kan GSDP a tang, tunah pawh 19-in kan ti a, chu pawh chu current price leh nghal, constant price ah chuan a hniam hret ang. Chutah chuan inti thei deuhin kan han sawi leh ang a, a punna tak erawh chu mipuite phurrit punna a ni tih kha kan sawi duh a ni.

Pu Deputy Speaker, Land Resources & Soil, Water Conservation-ah khan kan lut lawk ang a. Khawthlang lamah ka zin zeuh zeuh reng a, kuhva hi a tam tan deuh a, chu chu kan Minister hian min lo hriatsak sela ka duh khawp mai a, a thlalakte min rawn thawn a khulam pang hovin, hei, vual ang deuh pangang lian deuh te hi an hmu a, khu khu ensak a ngaiin ka hria a.

Tin, rubber lam, Pu Deputy Speaker, tlem ka han tih belh hlek ang e. A then khan minute 15 te an pel a, tun tum chu ka khat deuh a. Rubber plantation kan ti a, pawimawh tak tak erawh hi chu water conservation hi a ni tih ka sawi duh a. He department hmang hian water conservation lamah hian i lut ang u. Tin, cash crop development a tan ₹2,55,000/- chauh awma hi a pawi ka ti a, hei aia tam deuh hlek hi ngaihven dan awm se. SEDP Board te nuai 20 chuang hlawh an nei a, nuai 140 vel an han sem ve a, a sen leh eng ilo kha chu a inang lo viauin ka hria a.

Dr. K. Beihchhua department chan lamah han lut leh zuai ila. Demand No.29, Social Welfare hi mi harsa chawi kangtu, kum upa te, naupang chhum chhhia te, hmeichhia te khatiang zawng zawng buaipuitu a ni a, Minister mawhphurhna pawh a sang khawp mai. A tawi zawngin han ti tawh mai ila, tar chawmna, Old Age Home kan nei a, chumi bakah chuan tar ho inkawm hlimna hmun hi kan neih a ngai takzetur ka hria a, chu chu kan ngaihvena scheme kan siam tepawh a ngaiin ka hria. ICDS chung changah te hma kan lak belh a ngai viau a ni.

A dawtah, Excise & Narcotics chung chang hi tawitein ka lut ang a. Hetah hian a minister tan hian thil ka dil sak duh a, hnathawk ng het hi an tlem em em a, mi 124, Inspector chinah hnathawk tak tak tur an awm a, tichuan a ng het lo hi mi 361 chuang, 400 bawr vel an awm a, chung ho chuan mipui nuai 10 vel an han veng a ni a, chawhmeh chemte nena In sak tir tum ang deuhin ka chan a, chuvang chuan an tha tihchak a ngai a ni tih kha kan sawi duh a.

Tin, Demand No. 34, AH & Vety-ah hian kan lut leh lawk ang a. A pawimawh em em a, Mizo-te hi sa duh kan ni a. ka han sawi duhna chu, Agriculture-in ‘allied sector’ an ti a, chutah chuan GHDP kan thawh chhuah vel sawinaah hian Agriculture, Horticulture, Sericulture, Fisheries tih te, khatiang khan tuna ‘allied stock’ kan tih mai, ran vulhna lamah hian, khang ho lak khawmah khan allied stock bikah hian a chanve ai tam a hauh a ni, kan thawh chhuahah hian. Chuvang chuan hma lak a ngai takzet a, chumiah chuan, ran kan vulh tam dawn anih chuan an ei tur hi ngaihtuah tel a ngai tih kha ka han tarlang leh hlek duh a.

Tin, a tawpna berah Sericulture hi tawi tein ka sawi leh ang a. “Potential kan nei, kan tha, kan tha” kan tia, chutah chuan research kan tih a ngai, zir chiana kan tih a ngai a, market kan en a, a tihpun lam, a value addition, a hlutna tihpun hi hma kan lak a ngai takzet a ni tih te, hemi budget chung changa ka han tarlan ve duh te a ni e. Kalawm e.

**DEPUTY SPEAKER :** Tunah chuan, Member zahawm tak Pu Nihar Kanti Chakma ka sawm ang a, a niin a sawi zawh hian Pu H. Biakzaua, Member zahawm tak a lo inring dawn nia.

**PU NIHAR KANTI CHAKMA:** Pu Dy. Speaker ka lawm e. Vawiinah Minister pahnih demand kan sawiho mek a, tam tak sawi tur erawh chu ka nei miah lova, amaherawhchu ka

ngaihpawimawh deuh tawite ka tarlan duh chu, a hmasa berin Demand No. 33, Land Resources, Soil & Water Conservation hi.

Pu Dy. Speaker, he deptt. hi a pawimawh khawp mai a. Mizoram hi State a la upa vak lo a ni a, chuti chungin Soil & Water Conservation chungchangah, hmun hrang hrangah tui harstana a awm nual tawh a ni. Chu bakah kum tin hian soil erosion hi a nasa em em thin a, a bikin ka bial concern ka sawi lan duh chu, lui kama awm kan ni a, ka naupan laiin kan in piah lawka in awm ve thin ho kha soil erosion avangin tunah chuan a hmun chawpin a bo tawh a ni. Chuvangin kan sorkar, kan department hi hengah hian a fimkhur loh chuan soil erosion kan tuar zel dawn a ni. Ka bial khaw hrang hrang hi luikama awm te an ni a, kumtin hian soil erosion an tuar thin a hei hi kan dan loh chuan kum 50 emaw, kum 100 hnu ah phei chuan khaw tam tak hi a bo dawn a ni. Chuvangin, he department hi ka ngaih pawimawha kan tihchak a ngai a ni. Aizawl pawh hi tlang chhipa awm a ni a, kan tuihnar te pawh a kang nasa em em a, chuvangin tui hi conserve a ngai a, tui tel lo chuan mihring kan nung thei si lova. Pu Dy. Speaker, budget head hrang hrang hi ka han thlir ve a, mipui thleng tur hi a tam lo hle a ni. Tlangrama awm kan nih avangin nasa taka heti lama tan kan lak a ngaih tehlul nen.

Member zahawm tak tak ten an sawi a, kuhva, thing etc etc tih ang te, hengte hi chu secondary thing a ni, Pu Dy. Speaker. A pawimawh ber chu, engtin nge tui kan dah khawl ang. Kan hre vek a, tlang rama awm kan ni a, tui kan harsa em em a, kan area chu lui kama awm anih avangin harsatna kan nei lova. Khawthlang tuipui kan ring a, lui lian tak a ni a, kan naupan lai phei chuan sanghate pawh tam tak a awm thin a, mahse kum 20, 30 hnuah erawh chuan a kang nasa a, tunah chuan ke in a kai theih tawh a ni. Chuvangin, hei hi kan zavai mawhpfurhna a ni a, engtin nge tui hi kan humhalh ang tih hi kan rilru ah awm se a duhawm hle mai.

Pu Dy. Speaker, Demand No. 39-ah hian han lut ila. Covid hripui leng dona kawnga kan sorkar leh minister-te hmalakna a fakawm a, current min pe tha a, a lawmawm hle a ni. Mahse, covid hrileng tlema a ziaawm hnuah nitin dar 5 atanga dar 8 thleng, chawei lai chiah hi current awmloh hun a ni thin a, enge ni a chhan aw, ka ti a, kan Minister-in hei hi min react thei se ka duh khawp mai, Pu Dy. Speaker. Ka bial Tlabung hi a lum a, harsatna tam tak kan tawk a. Electric-ah JE enkawlna hnuaih kan awm a, thawktute an indaihlo nasa hle a. Fur a ni dawn a, reilo te ruah a sur chuan current a awmlo nghal a, engnge a chhan aw ka ti a, a thawktute pawhin phone call an dawng nasa thin khawp mai. Aizawlah chuan current lovin engemaw chen chu a awm theih a, a lum vak loh avangin. Tlabung erawh chu, khawlum laia current a han awmlo chu kan tuar nasa thin a ni. Chubakah chuan, hmun hrana kan electric ban te a tlu tep a, heng hi siam theih dan a awm em aw, kan Minister-in min chhinchhiah sak theih se ka duh khawp mai.

Tichuan, Demand No. 23 ah kal leh ila. Ka sawi ziah a, Tlabung hi Mizoroma khaw upa ber pakhat a ni a, thil hlui tam tak Tlabungah hian hmuh tur a la awm a, entirnan, Post

Office building tun thlenga la awm te, Thana building tun thlenga la ding te, hengte hi preserve theih dan a awm em? Art & Culture atangin emaw Post Office thar sak ni se, a building tuna la ding hi thangthar zelte hmuh ve ah preserve i la, chutiangin Thana leh Missionary Kai te, tun aia chei nahl ni se tih hi rilru ah a awm a ni. Post office building te phei chu a hlui hle tawh a, British hun laia sak a ni a, chutiang bawkin IB te pawh preserve ni se tih kha ka rawt duh a ni.

Awle, Demand No. 7, Excise & Narcotics hi. A lawmawm hle mai, hei Total Prohibition a kal mek a, a tha, kei pawhin ka support a ni; Zu vang hian nunna tam tak kan chan si a. Amaherawh chu, Pu Dy. Speaker, mahni theuh han inzawt ila, “total prohibition hi a hlawhtling tak tak em” tih hi. Nitin zu engemaw zah man a ni a, heng hi khawia tanga lo kal nge? Zu, drugs tumahin kan duh lova he dan hi kan support a ni. Amaherawh chu a enkawltu department hi tihchak a ni si lova, manpower a tlachham a, mahse budget-a kan hmuh erawh a tlem hle thung si a. Pu Dy. Speaker, tih takzeta hei hi tihpuitlin kan duh chuan manpower tha tawk department hian a mamawh a ni. Keini chu ramri depa awm kan ni a, eng thil te nge ram thenawm atanga rawn lut thin kan hre lo, check tu Narcotic department an awmloh avangin. Hetiang hian engtin nge kan hlawhtlin ang ka ti thin a, hlawhtlin ngaihna a awm thlawt lo a ni. Chuvangin, a Minister leh department hotute kan tan leh zual a ngai hlein ka hria a ni. Ka lawm e.

**DEPUTY SPEAKER** : Tunah chuan Member zahawm tak, Pu H. Biakzaua ilo sawm ang.

**PU H. BIAKZAU** : Pu Dy. Speaker, ka lawm e. Vawiina kan Minister zahawm tak tak te pahnih, Dr. K. Beichhua leh Pu R. Lalzirliana te Demand kan han sawi thei hi lawmawm ka ti khawp a, department pawimawh takte anni bawk a. Hmalamah khan thu pawimawh tak tak kan ngaithla nual a, kei pawhin ka han sawi duh chu Demand No.7, Excise & Narcotics Department ah hian.

Hei hi department pawimawh tak, mahse enforcement lam indaih vak silo niin ka hria a, hna erawhchu an thawk tha khawp mai a, kan hriat angin zu leh ruihhlo te pawh an man tha hle thin a. Zu an tihchhiat laite pawh kan hmu fo a, hei ai hian enforcement lam hi tihchak leh tih changtlun ni ta se Pu Dy. Speaker, hna tam zawk an thawk thei dawn niin ka hria a, kan thalaite nasa takin he department hian a venghim tel niin ka hria a. a pawimawh hlein ka hria a ni. Hetiang anih tak avang hian kei pawhin nasa takin Lawngtlaiah District Infrusturcture a awm loh avangin Excise & Narcotic Department hi min dahsak ve turin ka ngen a, kan Chief Minster zahawm tak leh a changtu Minister zahawm tak ten min dahsak a, kan hawng tawh a. Amaherawhchu Excise Office hi a la phuisilo hle mai a, a thawktu pawh an awm mumal lo han ti ila, an tlem khawp mai a. Tin, a hmun tur hi ka sawi tawh thin a, ram pass tha deuh mai kan nei tawh a, a office building leh staff quarter-te sak hma ve theih nisela a lawmawm hle dawnin ka hria a. He department hi tun aia phuisui zawka thuam thata tihchak a tul hlein ka hria a ni.

Demand No. 29, Social Welfare-ah hian kal nghal mai ila. Child Welfare atanga old age pension thleng huam department anih avangin mihring dama awm zawng zawng hi min huam vek a ni mai awm e tih turin he department hian a huam zau a. Chuvang chuan a enkawltu Minister pawhin tan a la viau thin niin ka hre bawk a, hna tam tak he department hnuaih hian an thawk niin ka hria. Kum hnih chhung emaw lek sorkar kan kal chhungin department hian hnathawh achievement a ngah hman hlein ka hria a. Kan hriat angin Jordan Centre Sethawn ami te pawh khu ruihhlo ngaite awmna tur, mi 1000 lai awm theihna tura buatsaih a ni a, hei hi inthlan lai pawha policy atana kan tlangzarh kha a ni a. Kan Hon. Chief Minister leh a changtu Minister pawh hian an ngai pawimawh hle niin ka hria a, hna pawh a kal chak viau a, a lawmawm ka ti khawp mai.

Tin Eklavya Model Residential School hi Mizoram-ah hmun tlemte-ah kan nei a, hawn theih tura buaipui lai mek eng emaw zat a awm a, block zawng zawnga nei thei tura quidelines te pawh a awm avangin, ka bial Sangau RD Block-ah kan mamawh ve khawp mai a, kan Minister zahawm tak pawhin hei hi min react sak sela ka duh khawp mai a, sawlai saw zirna lamah harsa tak tak kan nih avangin heng School tha sorkarin a enkawl leh a chawmna hnuai naupang han awmtir ve kha tha hle dawnin ka hria a. Eklavya Model Residential School, Sangau RD Block-ah kan mamawh takzet a ni tih kha ka han sawi duh a.

Tin, Anganwadi Centre ho hi an enkawl tha thawkhat viau a, hri len lai pawhin a repairna tur POSSAN atang tein eng emaw zat an hmu bawk a, Tribal Affairs lam atangin In thar sakna tur pawh kan hmu a, chutiang chuan Aganwadi lam hi nasa takin tunah hian tan lak mek niin ka hria a, a lawmawm pawh ka ti khawp mai. Tin, Article 275 hnuai atang hian project-te siama buaipui reng a ni a, heng atang hian project hrang hrang 105 lai 2020-2021 chhung hian *in principle approval* leh sanction te pawh a awm tawh a, a lawmawm ka ti khawp mai. Chung zingah chuan ka bial atang pawhin Bualpui Higher Secondary School a principle chuan pawm a ni tawh bawk a, PHC Quarter tur te pawh pawm a ni tawhin ka hria a, lawmthu vawiinh hian ka sawi tel bawk a ni.

Ka han sawi leh duh ka bial lam concerned-ah, Lawngtlai-ah sawn Social Welfare Office hi kan nei ve a, chhawng khat te takte a ni a. Social Welfare Department hi Directorate pahnih-ah an lo insem tawh bawk nen vertical extension tih theih ni se, a directorate pahnih hian sawlaiah thawktu building pakhatah awm thei mai tur an ni a, kan Minister hian min ngaih pawimawh sak se ka duh khawp mai. Hun a tawi avangin department achievement-a lawmthu sawi tur tam tak a awm rualin kan sawi vek seng lova, khami chin kha ni mai ta se.

Demand No. 34, Animal Husbandry and Veterinary ah hian kal leh ta ila. Kan ngaihthlak tawh ang khan, Dispensary eng emaw zat chu Hospital-ah tun kum hnih chhung lek hian kan Minister chak tak hian a hlangkai chho a. Tin, District 7 laiah Vety Hospital Building sak a ni a, a then chu an sa zo tawh a, a then hi sak mek a niin ka hria a. Rural

Animal Health Centre pariat lai sak zawh a ni a, heng zingah hian ka bialah pawh hawn than tur pakhat a awm a, ka lawm khawp mai a, Lungtian-ah RAH Centre kan sa a, mahse kan la hawng lova, zawh vek tawh a ni a, kan Minister zahawm tak a hma thei ang bera hei hi function tura min hawnsak tur pawhin vawiinah hian ka han ngen duh bawk a. Tin, Rural Animal Health Centre 35 lai Dispensary-ah hlankai a lo ni te a lawmawm hlein ka hria.

Tin, Mampui seeds farm, hei hi kan Minister nen pawh kan tlawh tawh a, tunah Ar keutirna te pawh tha takin a function tawh niin ka hria a, a hmasa-ah khan function leh function lohah khan kan buai rei ang reng khawp mai a. Chuvangin vawiina ka han sawi tel duh chu, kum 2 chhung lekin 1405 lai awpkeu tir a ni a, a lawmawm hlein ka hria a ni. Tin, border-ah Animal Check Post hmun tam takah sak thar a ni a, ka bialah pawh vawk leh ran an lo kalpui fonaah sak a ni a, hei hi a tangkai dawn khawpin ka hria a. Hei lo pawh hi gate pawimawh deuh mai a awm a, Myanmar lam atanga ran an rawn luhipuina tho Archhungkai-ah hian sak leh theih ni nghe se a tha hle dawnin ka hria a ni.

Tin, Covid-19 hri len zual lai khan animal leh meat lam supply kha siam a ni a, a tangkai hlein ka hria a. Sa kan nei thei dawn lo emaw tih lai leh harsatna kan tawh lai pawhin kan Minister zahawm tak hmalakna a chak em em a, buai lutuk lova kan awm thei kha a lawmawm ka ti khawp mai.

SEDP chungchanga tawite sawi ka duh chu, SEDP kan sem tawh kha pilot project a ni a, tlemin a khairual lo deuh hlek em aw ka ti a. Kan Minister zahawm tak hian min hriatsak se ka duh chu Lawngtlai District-ah khan chhungkaw 20-in kan dawng a, a tam lo ang reng hle a. Vuivaina lam pawh ni chuang lovin kan tih leh hunah chuan priority min han pe ve deuh hlek se, sawlaiah sawn MLA constituency 3 a awm a, hmun dang nen a khaikhinin a tlem deuh em aw ka ti a. A ruahmanna hi nang mahni siam nge ni a, khawilam atanga rawn irh chhuak nge ka hre chiah lova, chuvangin helai hi priority min pek sak deuh ka rawn beisei a ni tih ka rawn sawi tel duh bawk a ni.

Demand No. 27, District Council & Minority Affairs-ah hian lut ila. Allocation of Business Rules, 2019-ah khan Minority Scheme thenkhat te chu DC&MA-ah dah a ni a, hemi zulzui hian PMJVK pawh DC&MA hnuiah a lut a. PMJVK hnuia project thenkhat Education, Health, Sports, IT & Skill Development-te pawh hi tunhma Session kalta khan ‘engatinge a tel ve loh’ tih a tam viau a. Tumkhatah heng project zawng zawng hi a push through theih vek lo a ni tih a lang chiang hlein ka hria a. Keipawh state level committee-ah member ka ni ve a, project kan siamte hi helai Committee-in a approve khan thawnthlak a ni ta a. Chuvang chuan, a then a lo chhuak a, a then hemi scheme-in a huam la chhuak lo eng emaw zat a awm niin ka hria a, DC&MA changtu Minister zahawm tak hmalaknain he scheme hnuiah hian thil hrang hrang kan la hai chhuak thei turah beiseina ka nei a, a lawmawm ka ti khawp mai.

Pu Dy. Speaker, Demand No. 39, Power & Electricity hi tawi te ka han sawi leh lawk ang a. He department hi mihring thil hmuhchhuah leh siamchhuah zingah chuan department pawimawh ber leh, electric thahru hi thil tul ber leh pawimawh ber niin ka hria a, a changtu pawhin a ngai pawimawh a, tan a la nasa hle niin ka hria. Hemi ruala ka sawi tel duh chu, electric lamah hian kan phuisui loh zia kan hria a, 2008-2015 vel thleng khan company lian tak takte nen Mizoaram-ah Hydel Project siam tura MOA siam a ni a, chung zingah chuan Chhimtuipui Phase-II pawh a tel a, hmun hrang hrang kan sawi vek seng lo ang a, khang ho kha an thawk chuang si lova, tunah hian hma lak thara tender chhuah that leha, a chhang duh leh a thawk thei an awm chuan zawn hma a tul hlein ka hria. Pu Dy. Speaker, chutiang anih loh chuan khang MOA kha thawh loha a hlamzuih mai si chuan cancel fel veka a thara hmalak tum hi he sorkar chak tak leh kan Minister hian hma la se tih hi ka duh khawp mai.

Chutiang anih rual chuan ka bial Siachangkawn atanga Vawmbuk inkar hi kum 20 chuang kalkawng an let avangin motor kawng atanga hla tak, luidung hniam takah power line a kal a. Rua, thing leh mau hmun a ni a, line fault a awm reng mai a, chuvangin kawngpui dungah a hnai zawk bawk a sawn ni thei se tih hmanah ka sawi tawh a. Sum a awm thei lova, fur laiin current a awm hlei thei lo a ni, kawng an thlak avangin. Chutiang chuan ramhnuaih thui tak a kal a, rua leh mau hmun a paltlang a, clearance tih sen a ni lo reng reng a, hei hi kan Minister zahawm tak hian min hriatsak se. Tin, Lungtian khaw chung zawn takah electric hrui lian a kal a, a hlauhawm khawp mai a, daipawn lamah a helna zawn anih loh chuan a hlauhawm tak meuh a. Chuvangin line kalna dik lo hi min hriatsaka, sawn ngai ang chi te pawh min hriatsak a tul hle a, ka rawn ngen duh a ni. Ka lawm e.

**DEPUTY SPEAKER :** A lawmawm e. Tunah chuan Member zahawm tak Pu C. Ngunlianchunga i lo sawm ang.

**PU C. NGUNLIANCHUNGA:** Pu Dy. Speaker, ka lawm e. Demand-a ka luh hmain, he House-a fiamthu thawh nan angreng deuh a sorkar hmasa lam thil kan sawi fo hi sawisel thain ka hria a, ‘vawkte mawng ping’ tih chungchang kha Pu Dy. Speaker, document pawh hi House property-a dah tha ka ti a. December Ni 3, 2014-a AH & Vety officer, Kolasib report hi Pu Dy. Speaker i phalnain ka han chhiarchhuak ang e -

“District dang ang bawkin Kolasib District chhung khaw hrang hrangah RKVY hnuaia vawk note pahnih beneficiary sem a ni a, Bairabi khuaah pawh vawk note sem zingah hian a mawng ping awm nia Mizoram Budget Session-a sawichhuah anih avangin November Ni 24, 2014 khan thil awmzia enfiahin Bairabi-ah ka zuk kal a, hetiang hi thil awm dan a ni-

Verification Report:

Date of Verification Report : 21<sup>st</sup> Nov, 2014 at Bairabi.

Name of Beneficiary - Pi Lalkimi, Bairabi.

Pi Lakkimi hian vawk note pahnih RKVY hnuiah a dawng a, vawkte pakhat zawk hi a mawnga pem a awm avangin a pan zui a, State Vety Dispensary, Bairabi-ah enkawl niin, a pem pan pawh enkawl dam a ni. Amaherawhchu, a hnuah pawh he vawkte hi natna dang avangin a thizui tih hriat a ni a, he vawk note hi a mawng ping ni lovin a pan zawk a ni. Bairabi khuaah hian RKVY Piglet Bennificiary sawmpakhat (11) hnenah vawk note pahnih theuh pek an ni a, heng vawkte te hi natna dangin a tlakbuak zui a, Vety Dispensary-a thawk ten uluk taka enkawl zuiin Beneficiary pali (4) te vawk chu damchhuaka report a ni. Vety Dispensary-a kan staff te sawi danin, hetih hun laia natna hi Swine Fever niin an ngai. RKVY hnuiaia Vawk note hi pek chhuah ni lovin tualchhung vawk dang pawhin an veiin eng emaw zatin an thih phah a ni. (*Dr. K. PACHHUNGA: Pu Deputy Speaker, Vawkte mawng ping kha keini sawi chauh ni lovin he House-ah ngei hian Pu Zoram Sangliana sawi a ni e.*) Pi Lakkimi hi a lo awm loh avangin Pu Lalchhuanawma (Papua) Bairabi VCP kawmin a hnen atanga thu kan lak a ni. Kolasib District chhungah hian RKVY hnuiaia beneficiaries 125 hnenah vawk note pahnih (2) theuh pek an ni a, vawkte mawng ping natna dangin a tlakbuak lo a ni.

Yours faithfully,

Dr. C. Lalrintluanga,  
District AH & Vety Officer,  
Kolasib

tih a ni a, Pu Deputy Speaker. Hei hi khawngaitakin, kha tunah pawh khan an rawn sawi leh a, he document hi a awm a, hon. Member zahawmtak te, helai hi fiamthu thawhna House a ni lova, thudik sawi a tha. Khawngaitakin House Property atan kan pe ang e.

Pu Deputy Speaker, zirtawpni a Private Member Resolution kan sawi chungchangah khan, Chanchinbu leh media-a kan thil hmuhte kan sawi vea kha voice record hial te demand a ni a, voice record kha, kha hunah khan ka nei ka ti lo a. Amaherawhchu, Party pakhatina Press Release June Ni 1-a an siam..

*(Interruption)*

**PU TJ. LALNUNTLUANGA, MINISTER:** Pu Deputy Speaker, khami a rawn sawi leh dawn kha chuan amah hian rawn finfiah rawh se. Hetianga midang mithmuha thil a tih fo mai hi he House zahlohma a ni. Senior Member a ni a, kan zah thin a, vawiinah hian thu lawi loa *Vawkte mawng ping* chungchang a rawn sawi pawh kha ama cho chhuah anih avangin, Pu Deputy Speaker, he House ti zahawmlo zawnga a rawn sawi hi thil diklo tak mai a ni a, member senior anih avangin zah thin a ni. Amaherawhchu, amah ngeiin kan Senior Member tam tak pawh kan senior Leader, kan House Leader-te ngei pawh zah lo tak takin thil a sawi thin a. Chuvangin, senior Member ni ve si hian House zahawmna hi rawn vawng ve tawh rawh se tih ka chah duh a ni.

**PU C. NGUNLIANCHUNGA:** Pu Dy. Speaker, Ni 2-a Press Release Chanchinbu-a chhuak hi, thudik kan hriat tlanna atan hei pawh hi House Property atan kan pe ang e. Pu Deputy Speaker, vawiinah hian document a awm a, chu document awma chu, vawiin ni hian he House zahawm takah hian dawt thu ka sawi bawk lo a, thutak ka sawi a ni, Pu Deputy Speaker. Document kan neiha kha kan sawi chhuak mai a ni a, voice record-in ka nei ka ti lo a, Chanchinbu-a chhuak Ni 2 ami kha Minister hming lamin thu ka sawi lo a, tu minister emawin a sawi a ni tih thu ka sawi a, kha Document-a kha finfiahin a awm mai zawk a ni, Pu Deputy Speaker.

**PU TJ. LALNUNTLUANGA, MINISTER:** Pu Dy. Speaker, “dawt a sawi” ka ti lo a, ama rawn sawi chhuah a nih avangin, ‘proof rawh se’ ka ti mai a ni. ‘Tu Minister emawin’ atih chu he huna mi, Covid chungchang a sawina anih avangin kan zawt mai a ni. Chumia chu he House zahawm takah hian midang memberte zah lo taka thil a sawi avanga a cho chhuah kha amah pawh hian inhre ve sela tih hi ka sawi duh chu a ni.

**PU C. NGUNLIANCHUNGA:** Pu Deputy Speaker, member tumah zahloh ka nei lo, ka thusawi hi ka *Right* a ni. Pu Deputy Speaker, thusawina hun i pe em ni? I pekloh chuan Memberte zalenna min pekah khan, khatianga kan Law Minister meuhin atih kha chu House a zahawm loh ang e, Pu Deputy Speaker.

**PU TJ. LALNUNTLUANGA, MINISTER:** Parliamentary Affairs-ah Minister ka ni a, heliaiah Chief Whip ka ni a, chuvangin heliaia thil tul lo tak an sawi kha rawn khap theitu tur, a *whip* tu tur ka ni a, chuvang chuan kan tan zalenna a awm bawk a ni tih kha sawi a ni. Chuvang chuan, a thilsawi a diklo laia kha kan sawi lai chu a ni. Member senior a ni a, kan zah a, amaherawhchu, amahin a rawn sawi chhuah thil kan sawi avangin khalai kha chu a insiamthatna tur atan ka rawn inrawlh mai chauh a ni. Chuvang chuan, vawiiyah hian a duh duha rak mai tur bik a ni lo, Pu Deputy Speaker. Insawifiahna tura rak mai tur chuan he House zahawm tak hi i hmang lo ang u tiin ka rawn sawi a ni. Chief Whip ka nihna ang pawhin ka rawn inrawlh thiang a ni tih lai a kha, “he Ministry chhunga Minister-in a sawi a ni” a tih avangin, tu minister nge anih tih pawh tlang deuhin sawi mai se la. Chuvang chuan, a thil sawi dik lo avangin, midang provoke-na tur a rawn sawi avang khan kha thil kha ti ka ni; Senior Member a nihna angin rawn ti ve rawh se ka tihna a ni.

**PU C. NGUNLIANCHUNGA:** Pu Deputy Speaker, a whip-na tur ka ni lo, anmahni MNF Parliamentary-ah a whip ang a, he House-ah hian a whip tur ka ni lo. Pu Deputy Speaker, khawngaihtakin khalai a kha chu a document finfiahna heliaia kan sawi thin kha ka rawn pe mai a ni, he House hi. Keiina voice record emaw ka rawn pe ni lovin, document kha he House hi ka rawn pe mai a ni e. Pu Deputy Speaker, vawiinah hian he House-ah hian keini pawhin Whip kan nei a, kan Whip hnuaiah keini Legislature party kan awm a ni. Chuvangin, he laiah hian MNF Legislature Whip-in kan vaiin min control tur a ni lo. Chuvang chuan thusawina hun min pek hi min tibuai lo turin kha Deputy Speaker seat kha

a zahawmna min vawn sak rawh. Pu, Deputy Speaker, thusawina hun min pek angin ka thusawina hun a ni a.....

**PU TJ. LALNUNTLUANGA, MINISTER:** Chuvang chuan, he House zahawmtak hi khatiang zawnga a kal kual reng anih chuan awmzia a awm lo ang. A thusawi kal tluang lai kan tibuai lo a, midang provoke tumna kha ti tawh lo se ka ti a ni.

**PU C. NGUNLIANCHUNGA:** Pu Deputy Speaker, midang tumah provoke ka tum lo, ka thusawi a fiahna atan document ka rawn chhawp mai a ni. Pu Deputy Speaker, helaiah hian tumah zah loh ka nei lo, amaherawhchu, thusawina hun ka neih ve te, Member of Legislature ka nihna angin he House-ah hian thuneihna (Right) ka nei a, thusawina hun min pekah chuan khawngaihtakin.....

**PU TJ. LALNUNTLUANGA, MINISTER:** Pu Dy. Speaker, a provoke avanga khatianga rawn sawi zawk kha a ni a, midang a rawn cho chhuahna leh kan House Leader-te pawh zah lo tak taka thil a tih avanga rawn ding chhuak ve mai ka ni tih kha Pu Deputy Speaker, ka rawn sawi a ni. Thuneihna (Right) nei veka he hmuna thu hi kan ni a, House zahawmna kha vawng tlang ang u tih kha ka rawn dinchhuah chhan chu a ni.

**PU C. NGUNLIANCHUNGA:** Demand-ah kan lut ang a, Pu Deputy Speaker, engpawhnise khawngaihtakin helaiah hian .....

**PU TJ. LALNUNTLUANGA, MINISTER:** Pu Deputy Speaker, midangin an zah a duh chuan he House-ah hian zahawmtakin ti ve rawh se tih kha ka rawn dinchhuah chhan a ni.

**PU C. NGUNLIANCHUNGA:** Pu Deputy Speaker, tumah zah loh ka nei lo, member ka nihna angin he House-ah hian zawnha, zawn belhna, thusawina hun min pek angin hun ka hmang mai a ni. Chu chu ka Right a ni. Lawngtla West bial aiawha he House-a thu tura thlan ka ni, chutiang chuan thusawina hun pawh thusawi tura min pek angin ka nei a ni. He House-ah hian sawifiah ngai a awm chuan House-ah hian kan sawifiah tur pawh a ni a, chuvang chuan Pu Deputy Speaker, Demand-ah kan lut ang a. Pakhatnaah chuan, Excise & Narcotic chungchangah khan, kha kan hotute'n an sawi deuh tawh a, member dangin.....

**PU TJ. LALNUNTLUANGA, MINISTER:** Right kan hmang tlang vek, kan zalenna kan hmang tlang theuh. He House-ah Demand sawi hun a awm a, he House-ah Demand sawi baka midang kher zawnga a rawn ti foa hi Pu Deputy Speaker, a dik lo a ni. Clarification a sawi dawn chuan hun kha a siam pangngai tur a ni.

**PU C. NGUNLIANCHUNGA:** Demand-ah ka lut ang a. Pakhatnaah chuan Excise & Narcotics chungchangah khan, kan hotute'n an sawi deuh tawh a, member dangin, sawi ve ka duh chu tunah khan Sihhmuai-ah (**Dy. SPEAKER:** Minute 1 chiah i nei tawh) Kohhran thilah kan kal a... Pu Dy. Speaker, khatia min tibuai chhung kha, ti kha chuan a dik nang!

Thusawina hun min pekah khan thu min sawitir ta che. Khalai Speaker dawhkan atang khan House chu i control tur alawm! I thu vek a alawm! Chhuak rawh min tih chuan kan chhuak vek mai tur a ni a, i thu hnuiai awm vek kan ni. Chuvang chuan, Pu Dy. Speaker, niminah khulai Rangvamual te kan han kaltlang a, zu khapna danah hian Excise Deptt. hi thuam chak an van mamawh em! Tlai dar 4 velah kan lo thleng a, lirthei kal hlei thei lovin khulaiah khuan an inhawrkawm luai luai a, zawn an nei a, thil tih an nei niin a lang a, helai hi a ngaih pawimawh awm khawpin ka hria a.

Tin, Social Welfare Deptt. ah ka lut leh ang a, thui ka sawi lovang Pu Dy. Speaker. 2018-a Congress sorkar lai khan Pang Tribal Girls Hostel tur hi concept paper submit a ni a, Social Welfare Deptt. ah. Khawngaih takin kan Minister khan min react sak theih chuan, kha kha a chanchin eng nge ni ta tih kha ka sawi leh duh a. (**Dy. SPEAKER : I hun a tawp a**)

Tichuan, Animal & Husbandry chungchangah hian, ZPDS te, hei kan inhnuai pa, ka thianpa Lunglei Lungpuizawl-a Ar note awpkeuna tur kan han tih kha, kan hunlaia kan hmalakna vawiin niah a rah rawn thleng ta a, Lunglei phei chu hawn mai theih tur khawpa awm kha a ni a. Kum 2 chhunga, tun kan Minister hi a chak lo ka tihna a ni hauh lo a, kan Minister ina a hma sorkar hmasa lo lak a chhunzawmna rah ZPDS te leh Lungpuizawl-a ar note awpkeuna turte kha a ni tih lai kha ka sawi duh a ni.

Tin, Mampui Ar note awpkeu chungchangah khan, Congress sorkar lai khan Article 275(1) hmangin Ar note awpkeuna tur kha ruahman a ni a, vanduaithlak takin a awpkeuna tur khawl kha kan han ti dawn chauh a, a han chhia a, chumi replace-na tur atan chuan theihtawpin hmalak a ni a, kan sorkar hun khan a khawla kha thlak fel hman a ni chiah lo a, amaherawhchu Congress sorkarin hma a lo lak tawh a ni. Ar note kum 2 chhungin 1400 vel an awpkeu tir a, tam viau anga an han sawi kha chu a ni bik chiah lo a ni. Session hmasa pawn helaiah function leh function lo tihah sap tawng thiam ho pawh, “A function, tion lo” tih pawh thuthlukna siam a har khawp a, Department Minister lamin “function” a ti a, keiin, “engnge, a function chuan pakhat tal a awpkeu em” ka tia, a keu bawk silo a, tunah erawh chuan kan Minister-in a ngaihven zui a, 1000 leh tih lai a lo awpkeu a, a lawmawm ka ti khawp mai. Kha kha chu kar 1 chhung vel awpkeu thei tura ruahman deuh kha a ni a, engpawhnise hma la zui zel se a tha ka ti a ni.

Lunglei ‘E’ bialtu-ina ‘Lupan hnathawh’ a han tih chiah ang kha chu a ni lo deuh a ni ang, vawiin ah commission turin an inpeih sup sup mai a. Entirnan, khulaia Ramrikawn-a ran chaw herna ang chi te leh Hospital kan han tih ah te pawh kha tun kum 2 chhung mai chuan han sak ngaihna a awm lo a ni, sorkar hmasa hma lo lakna vek kha a ni tih ka sawi duh a ni.

Pu Dy. Speaker, pakhat chauh ka sawi tawh ang, tawi tein. District Council & Minority Affairs hi a vanduaithlak khawp mai ka ti a, a chhan chu Second State Finance

Commission din loh anih avangin District Council te chan tur, Local Bodies te chan tur sum ruahmantu tura kha Congress sorkar khan kum 5 tan a din a. Tichuan, kum 5 a ral hnuah chuan State Finance Commission kha din ve leh mai tur a ni a, a nih loh chuan Local Bodies te sum chan tura kha, anni kha a sem tu tur an ni a, tun hun thlenga din a la ni lova. Chuvang chuan, District Council te hian Lai District-ah 2019-2020 ah khan salary atan hian cheng nuai 17,581.2 a ni a, 2020-2021 ah khan cheng nuai 17,395.01 a ni a, 186-in a tlahniam a. Tichuan, chutianga tlahniam chuan pawisa an indaihlohma hi cheng nuai sang telin salary-ah hian an indaihlo a, chutiang chung chuan tun kumah hian cheng nuai 17,395.01 ngaiin a han kal a, District Council hotute'n mittui tla lek leka an lo thlir ve, kan pawisa indaihlohma kan RE te pawh tia sum tamtak an dil laiin cheng khat mah pek belh tur Lai-ah te, Mara-ah te, Chakma-ah te a awm lo a, a changtu Minister DC & MA Minister tan pawh hian a hawihai tlak awm mang e aw ka ti a. Hei hi chu kan sorkar hian State Finance Commission hi rang thei ang berin, a rang a rangin din sak sela. An chanvo tura hi ruahman sak anih loh chuan sorkar kalphung kan hria a, kumtinin sorkar hnathawk hlawh DA te a lo pung a, sorkar hnathawk hlawh a lo pung chho a, kum tawpah indaihlohma RE pawisa dil a ni thin a, chuta tanga pek an ni a, anni chu kum 2022 kal tura a hma aia a tlem zawka hi District Council tan chuan vawiina kan Demand sawi hi tahna leh lungngaihna mai a ni ang tih a va hlauhawm em tih kan sawi duh a.

A tawp berah pakhat chiah, Pu Dy. Speaker, min tihbua avang khan a khawlo zo vek a. (**Dy. SPEAKER:** Minute 2 lai i hmang tawh a nia) Hei, Tuorial Hydel Project hi High Court-ah zawnhna ka zawt a, a chhuak hman silo a, a mangan tlak khawp mai a. Pu Dy. Speaker, khawngaihtakin kam hnih khat chiah. Kan hriat danin High Court-ah hian ram neitute zawk khan thiam an chang niin ka hria a, lo chang ta sela, sorkar hian Court sang zawk ah kalpui a tum em? A tum lo anih chuan, cheng nuaih sangkhat chuanga kha compensation-a pek ngai tur niin a lang a, kan sorkar khan a pe thei dawn em ni? Chuvang chuan, engtia kalpui nge a tum tih kha khawngaih takin Power Minister chhan atan ka zawt a ni.

Tin, a tawp berah Vankal Solar Congress sorkar hunlaia vaibelchhe 21-a siam kha engnge a chanchin? Zawh theih a ni dawn tawh em tih kha ka zawt hram a ni e. Ka lawm e.

**DEPUTY SPEAKER :** Ni e, a lawmawm e. I thawl hawk dawn kha. Tunah chuan kan Opposition Group Leader lam kha tunge han sawi hmasa ang le? Nge ni, minute 5 kan la nei a. Pu Andrew-a, ilo phar har deuh a ni maw? A va zia lo ve. Pu Andrew H. Thangliana, Member zahawm tak kha ka lo hmu lo a, a zialo hle mai.

**PU ANDREW H. THANGLIANA:** Min lo hmu lo palh a ni ang e, Pu Dy. Speaker, ka lawm e.

House chhung zahawmna kan sawi a, ka hma lawka an han inhnial bawp bawp te, fiamthu thawh ang chi a tel zeuh zeuh te kha a relevant thoin ka hria a. Vawiinah Animal

Husbandry & Veterinary lam kan sawi a, ‘Vawkte mawng ping’ tih te pawh kha, hetah a chungah Art & Culture a awm a, kan culture vawn nan kan culture zinga thawnthu pawimawh deuh mai, ‘vawk mawng ping’ te pawh kan neih kha maw le; kha kha Chhura khan a verh pawp leh mai ang turah ngai ta ila, a relevant vekin ka hria a, a bengvar thlak a.

Kan Minister zahawm tak Pu R. Lalzirliana Demand hi ka han kal thla puat puat ang a, Power & Electricity, Demand No. 39 hi han sawi tam vak pawh ka tum lem lova, mahni bial han belh ve zawk ka duh a, bial dang harsatna pawh a ni ve tho ang a. Kan transformer chhe thinte, transmission line tuna kan neih ang chi hlui lutuk tawh ang chi hi kan harsatna a ni a, nakin lawkah fur a lo ni ang a, thingkung te hnime hnah te a to chho leh ang a, khang kha kan problem a ni leh dawn a ni tih lai kha kan Minister hian a hre tawh tho a, min hriat nawn sak leh se la, chu chu ram pum ang pawhin a vei awm hlein ka hria a.

Art & Culture-ah hian he department hi awm ve ringawt nge tih hi tam tak chuan kan hre kher lo ang a, mizo culture tih nun nan chuan Aizawl mi, thangtharte leh thingtlang lam mite pawh an ni ang, mizo culture hi kan hre tawh lo em em a. Kan tradition te, tunah hian YMA leh NGO hrang hrangte sorkar hmalakna zarah kan hnam, kan thawmhawte leh lam chi hrang hrangte hi chu kan hria a ni mai a. Amaherawhchu, culture tihnun nan hian ka sawi tak ang khan thil chi hrang hrang pawimawh a awm a, rimawi te, painting lam kan han tih, mita hmuh theih ‘visual’ kan tih te, heng hi kan hriat ve theih te chu an ni mai a. Ka lo ngaihtuah mai mai a, ‘Hnah tum’ tihte pawh hi kum 40 te kan lo kai chho ve ta a, ka piana hnu lamah hnah tum hi vawikhat chiah ka la witness ve a ni; mizopa-in tunhmaa lungleng taka an lo tum thin kha a ni a, kan fate phei chuan ‘hnah an tum thin em ni’ an ti vel mai mai tawh a ni. Khangte kha kan Minister hnenah Session hmasa lamah pawh ka sawi tawh a, Music & Fine Arts Department lamte pawh kan nei thin a, saw saw vawn nun a ngaiin ka hria, chung chu kan culture vawnhim nan, khang *Art* kan lo neih ve thin mizoin kan ta anga kan lo chawi nun thin thil chi hrang hrang kha vawn nun a pawimawh hlein ka hria a, chung chu ka han tarlang duh a.

Demand No. 33, Land Resources, Soil & Water Conservation, heng department-te pawh hi a nawlpui leh a hnuai department-a thawk ngei ngei te pawh hian, eng nge an department tum ber leh an thawh ber pawh hi kan hre mang lo a ni, a nihna takah chuan. A lan danah chuan kan member dangte pawhin an sawi tawh a, tui conserve kan mamawh zia te pawh an sawi tawh a, chutih rualin kan lei te pawh conserve a ngaih zia te pawh kan sawi a, a dik reng mai a. Power kan neih nan te loh theih lohin Hydel Project te kan ti a, a tulnaah chuan kan la tih ngei te a ngai dawn a, tui kan khuaha, khuah chin thlang lampanga nungchate leh tam takin an tawrh dan te kan sawi chamchi tawh a. Chutih rual chuan he department-in a ngaih pawimawh chu, lei resource hmang tangkaia sum chang thlai kan han tih te, tui pawngpaw lo khawl vak lam, tanky siam lam ai mah pawhin....(**Dy. SPEAKER:** *Ngawi lawk raw aw. Kan chawlh hun dar 5 a ri a, kan sawi zawh tir lawk dawn em ni? Awle, i sawi zawh tir ang aw*).. khang kha heng department lo din chhante pawh a ni a, rubber ching tur emaw ringawta ngai tawk te kha kan awm a, a ni lemlo a, sum chang thlai

tam tak kan tih theihna turin a project-ah chuan rubber leh hmunphiah te, coffee te a langsar zual deuh a, he department-in a khawih hi. Coffee lam hi chu sawi a ngai lovin ka hria a, kan hlawhtling lova, rubber bik hi chu hma kan sawn viauin ka hria a, tam tak tan eizawnna a lo awm a, kan lei conserve nan leh tui conserve nan, leihnuai tuite conserve nan thil tangkai tak a ni a. Hmunphiah hi ching uar ila, a market a tha em em tih kan hria a, kan sawi hnem tawh bawk a, chulai chu hemi demand bikah chuan ka duh tawk ang a.

District Council & Minority hi chu Pu C. Ngunlanchunga kutah khan ka dah deuh a, a sawi hnem tawh a.

Kan Minister zahawm tak Dr. K. Beichhua Demand Social Welfare Department hi tawite ka han sawi ve leh ang a. Social Welfare hnuaiah hian Disaster Management pawh hi a telin ka hria a, lui dunga khua awm ang chi, chhiat kan tawha khawtlang tibuai em em thin, tui tla an lo awm chang te pawhin ka bial chhungah pawh Khamrang te, a bik takin Sairang leh Bukpui te pawh an ni tel tho a, heng ho equip hi an pawimawhin ka hria a, ruang changin ‘torch light eng deuh bik’ tih ringawt pawh hi ka hnenah hian a rawn lut hnem ve a, sawi a tam thin a, khatiang neuh neuh te, scuba diving phei chu kan tlin kher lo mai thei a, amaherawhchu luidung vela khua kan tihbuaui thin te hi equip an ngai ka ti a.

Excise & Narcotics lamah hian report TV lamahte kan hmu thin a, kan prohibition hi engemaw chenah chuan 100% a ni lo nangin, Zu bik ngawr ngawrah hian kan dah deuh thin a prohibition hi, hetih lai hian kan man nasa a, engemaw chenah chuan kan khap dai viauin ka hria a. Amaherawhchu, hemi piah lamah hian tunlaiah khawtinah, vengtinah ‘No. 4’ kan tih *Heroine* hi a hluar em em a, sum a heh bawk si, chhungkaw mangang hi tam tak an awm a ni. Hemi atana suggestion ka neih ve chu, kan House Leader pawh a phur zawng tak anih ka ring a; thil detect thar a ni a, thil tlem te si, sum hek leh mihring tan pawha tha lo em em thil a hluar em em lai hi awlsam te a smuggle luh a lo ni a, kan ram chhungah chuan *heroine* han siamna tur poppy field te a hrampain a awm lemlo niin ka hria a, hmundang atanga rawn lut a ni tih hi a chiang a, ram changkang zawkin an tih ‘ui hnar fing’ ang chi te hi chu kan border area-ah hian an detect zung zung theih nan Excise lam te pawh hian hma han la zung zung thei sela chuan a tha ka ti khawp mai.

Animal Husbandry, Vawk leh Ar-ah hma kan sawn chho viau a, vawiinah ngei pawh keini MLA ho artui pum sangkhat vel kan Minister in min han hlui a, mizo tharchhuah ngei anih ka ring a, a lawmawm ka ti a. Vawk leh Ar-ah hian kan concentrate lutuk a, kan Governor’s Speech-ah khan, sa-a kan intodelh lohna kha 70% lai vel a la ni a, ka ngaih pawimawh pakhat leh hma min tanpui tura ka duh chu, bawng lam hi kan sawi tam lovin ka hria, a department pawh hian ngaihtuah ve ta sela, chawm hautak lo tak, a hnute ngawr ngawr oriented-a bawng vulh lam nilovin, kan eitur, consumption a tan hian bawng lam hi tan lak a ngaiin ka hria. Helamah pawh bul min tan sak se, Ar leh Vawk-ah pawh hlawhtlinna kan hmu mai bawkin ka ring a. Bawng-ah hian bul min tan sak sela, sorkar tharah chuan

kan tih hlawhtlin sak ngei ang tih kha ka han sawi tel duh bawk a ni. Ka duh tawk mai ang e. Ka lawm e.

**DEPUTY SPEAKER :** Awle, a lawmawm e. Tunah chuan, darkar chanve em ni kan chawl leh ang aw, Member zahawm takte engnge ni kan ngaihdante? Darkar chanve a tawk ang maw? Chuti chu, dar 5:35 PM-ah kan lut leh mai dawn nia.

**(5:35 PM)**

**SPEAKER :** Pu Andrew-an a sawi hnuhnung ber a, tunah Member zahawm tak Pu Zodintluanga Ralte ka sawm e.

**PU ZODINTLUANGA RALTE:** Pu Speaker, ka lawm e. A hmaa kan sawi thin tawh angin tun tum kan Budget Session hi chu sawrkar salary leh wages hi a ni mai a, hmasawnna tur sawi tur tam tak pawh a awm lova, han discuss tur em em pawh tun tum hi chu a awm lova. Kumdangah chuan sawrkarin hma kan lakna turte budget-ah dah thin a ni a, mahse tun kumah chuan khang ang kha dah anih loh avangin han chai em em tur vak a awm lova. Thil kal tawh te leh duhthusam te sawi deuh mai mai anih avangin Pu Speaker, a hmasa berah Demand No. 39, Power & Electricity-ah hian ka lut ang a.

Pu Speaker, Congress sawrkar a lo pian khan power kan neih theihna tur atan nasa takin hma kan la nghal a. Tuirial Hydel Project, mi duham ten compensation dik lo taka lak an duh avangin hluihlawn tawh te kha rawn thar thawh lehin bul tan a ni a. Harsa taka dinin India Prime Minister hawn theih turin kan han din a ni a.

Tin, chumi piah lamah Tuirini Hydel Project tan turin BRICS atang tea loan lain thui tak leh nasa takin kalpui tawh a ni a. Tun sawrkar-ah hian bawhzui a ni lo leh ta a. Tin, Congress sawrkar, vawiina kan Power Minister tho anih lai khan nasa takin hma an la a, Vankal-ah pawh Solar Plant lian tak mai tunah pawh khian sak mup mup a ni a. Vawiinah sawrkar thar a lo piang a, MNF sawrkar-ah hian Pu Speaker, an hmang thiam ve ta lo em maw ni chu aw ka ti a, a thawm a reh riau mai a, tukinah pawh amah a vui a, “tun Session chhung zawngin zawhna pakhat chauh ka nei” a ti mai a, sawrkar hmasaa tha tak leh chak taka hma la thin kha tunah hian hma thar kan lak hi hmuh tur a vang ta em em mai a.

Tin, Pu Speaker, Power Minister-in a tawpna atana min react se ka duh chu, Lunglei Venglai Community Hall dinna tur sawn amah hian nasa takin Lunglei Venglai mipuite tan ram neilo chung chungin ram te a tih sak a, chung chu zawh thawkhat a ni a. Hmanni lawk khan Lunglei West bialtu Minister zahawm tak khan engati teh reng nge ni hmanhmawh tak khan a hawng a, a hawn niin rawng hnawih te pawh a la ro lo an ti a, electric leh tui te pawh a la awm lo a ni. Lunglei Venglai Community Hall saw a bultan tu min nih sak angin electric connection te a rang thei ang ber a min tihsakin a tawp min thlen leh turin ka rawn ngen nghal duh a. Kha kha min tih sak theih chuan a lawmawm hle in ka ring a.

Tin, power hi kan sawi a, engnge a chhan ni ang aw, Inrinni apianga current siam ngai ziah hi. Hetiang lo deuh permanent deuha kalpui dan awm thei sela. A chhan chu Inrinni chu holiday te a ni teh meuh mai sawrkar ang te pawhin. Amaherawhchu, mi tam tak electric hmanga eizawng printing press, mi chi hrang hrang khawl lama eizawng te an hna ngah ni ber hi a ni si a. Chungah te chuan hma min lak sak turin ka ngen duh a.

Tin, Member zahawm tak Pu VL Zaithanzama zawhnaah hian power kan hman loh kan hrall pawh hi a kalphung mi pangngai tan chuan hriathiam a har khawp mai a. Current kan harsa a, neihloh chang te pawh kan ngah viau a. Chutih rual chuan hlep ni lova a hloh zawnga kan hrall tlat mai hi kan sawrkar kalphung hi inenchian a thain ka hria. Kan hrall leh dawn anih chuan hlep neiin hrall tal ila. Zawhna leh Chhanna P&E Department-in min chhan dan chuan, power kan hrall leh chhawn naah hian 3.36 per unit hi hlawh a ni a. A zawhna hi a dik anih chuan khatianga a hloh zawnga hrall ai chuan hrall loh khan a tihdan a awm lawm ni tih kha Pu Speaker, P&E chungchangah ka rawn sawi theih a ni a.

Tin, Demand No.33, Land Resources, Soil & Water Conservation-ah hian, Pu Speaker, Soil Department hian ka bialah pawh hmunphiah chin theih turin hma an rawn la a, kum 4 kum 5 kal taah khan. Kan RO ten an awmchilh a, a phun dan an hrilh a, a thar pawh kan thar hnem a ni. Chutih lai chuan tun season-ah hian Forest lam atang hian ‘mahal’ an ti nge ni permit pek an nei a, sawrkar-in a chin tir, anmahni rama an tharchhuah te kha hrall chhuak lovin, a then phei chu invauna nen hrallchhuak thei lovin an siam a, tin, an duh duh *rate*-in a lo kal sak a. Heng te hi Soil Department changtu Minister hian a department kaltlanga, mipuite pawn eizawnna an lo neih te kalsanin huan tlhai leh serthlum te ching lovin hmuphiah ching tura an va hminte ina harsatna an neih hi min sut kian sak turin ka rawn ngen bawk a. A nihloh chuan, nakum lamah hian khatianga harsatna an tawh chuan an hmunphiah hmun pawh kha an enkawl loh phah thei a. Khatianga khawpa Department-in thahnemngai tako a han kalpui khan harsatna an neih te hi lo enpui turin ka rawn ngen duh bawk a.

Tin, Demand No .29, Social Welfare Department-ah hian Pu Speaker, sawi tur a tam khawp mai a. A hmasa ber a ka sawi duh chu, *tar pension* hi central sawrkarin min bituk chin chiah hi pek an ni a. Kan hria a, kan sawrkarah SEDP, sum khawh lut zur zur te kan nei si a, heng atang hian central sawrkarin min pek bak tar pension benefit la thei mi tam tak awm te hi *kumkhatah* an thei lo anih pawhin, tun kum aia tam deuh pawhin increase theih a niin ka hria a. Heng te hi han ti thei se chuan, *upa* ve tawh, central sawrkarin a rawn bituk bak dawng ve pha lo te tan khan a tha dawn em a tih kha ka rawn sawi duh a.

Hei, a subject chiah chu a ni lo a, General Administration Department chan a ni a. CM sawi huna sawi awm tak a ni a, mahse a inhkeh tho a. Social Welfare leh District Council & Minority Affairs chungchang hi a ni a. Pu Speaker, Answer & Question Hour-a ka zawhnaah hian, “Tribal & Minority Affairs hi eng department hnuaih nge a awm” tih a ni a. Minority Communities chungchang chu District Council & Minority Affairs

Department-in a enkawl a, Schedule Tribe/Caste chungchang chu Home Department, Social Welfare & Tribal Affairs Department-ah a awm tih a ni a. Hetiang teh nuai maia central-a Ministry dawrtu tur department hrang hranga kan sem darh hi a fuh loin ka hria a. A ti tur, hemi department-a hma lo zu la tur hi pakhat awm thei sela chu a awlsam zawkin ka ring a. Entirnan, a hma chuan Social Welfare Department-ah a awm thin a, anni hi chu kan hriat theuh angin thingtlang Minorities Area block tinah CDPO-te neiin thingtlang khaw kilkhawr berah pawh Anganwadi nen an bial chhung an hre em em a ni. Amaherawhchu, Home Deptt.-in a an han enkawl hi chuan, khang ho minorities hmalakna tur, anmahni hamthatna turte kha anmahni Law & Order kengkawhtu tan chuan khatiang lam kha an ngaihtuah hman si lo a.

Tin, District Council & Minority Affairs pawh helai Aizawl-ah an inbun a ni mai a, hetah thingtlang minority area-ah te department officer-te an nei si lova, a hotu tur dik tak chu Social Welfare Department hi a ni lawm ni tih hi ka rawn sawi duh a. Hei hi nakinah kan House Leader pawh GAD changtu a ni a, a demand chan hunah pawh kan la sawi leh tho ang a. Hetianga central atanga tanpuina awm tur department hrang hranga a titu tur an awm hian hmasawnna hi a ti thuanawpin ka hria a, kha kha ka rawn sawi duh a ni.

Tin, District Council & Minority Affairs-ah hian, hei kum tin budget a awm hi chuan kan budget hi Mizoram-ah pawh, Interim Budget kan neih pawhin a pungin kan kal thin a, vawiin niah District Council area LADC, MADC leh CADC-ah chuan an Budget 2020-2021 ang chiah chiah maia budget kan han dah ringawt mai hi chu ngaihtuah that leh a ngaiin ka hria a. Anih loh chuan sorkar kalphungah, anmahniah pawh kumthar a lo nih chuan expenditure thar te, khatiang ang kha neih theih a ni a, chuvang chuan hengte hi ‘minority’ kan tih kan District Council area te budget tipung miah loa a awm hi chu a fuh loin ka hria a, kha kha ka rawn sawi tel duh a ni.

Tin, Excise & Narcotics Demand No. 7-a ka rawn sawi duh chu, kan sorkar hmalak, an sorkar tirkhan *Total Prohibition* puan nghal a ni a. A bik takin kan Excise Minister phei chu a phur khawp a, Rangvamual-ah te ama hoin an duty a. Chanchinbua kan loh hmuh dan chuan Drone an lei thar a, Drone hmanga zu tihrem dan te kha an ngaihtuah chhuak kha a ni a. Amaherawhchu, tun, a kum 3-na kan han thleng a hmasawnna hmuh tur a awm lo reng reng a. Champhai North bialtu zahawm tak Dr. Thiamsanga’n a sawi, “tun sorkarah chuan Rangvamual pawh a danglam tawh khawp mai” a tih kha a dik khawp mai. Tun sorkarah chuan Rangvamual khu kal hleih theih loh khawpin a lun tawh mai a. Sorkar hmasa kha chuan khuti lama kal an tam lova, amaherawhchu, tunah chuan Rangvamual-ah traffic jam luih luih khawpin kan thalaite an zuk chhuk a, kha kha Dr. Thiamsanga sawi a danglamna kha chu a niin ka hria.

Tin, AH & Vety hi Pu Speaker, a pawimawh a. A hmasain sorkar hmasaah kan Minister chak takin hmasawnna tam tak a siam a, Aizawl khawpui chhungah ran chaw siamna khawlte an bun a, hmun hrang hrangah an siam a, Kel tha chi an tih te pawh kha a

hunlaia an lo chah kha a ni a, Thenzawl-a kel palian chi kha, ka tuipui ve khawp mai a, kel hi ka tluang lo na ka vulh ve thin a. Kan Minister zahawm takina min react tura ka duh chu, foreign atanga Vawk te man to, tun sorkara an chah thlen an tih Mizoram la tleng si lo, ‘Chandigarh vela quarantine period-a awm’ tih emaw ni hi pakhat cheng engzatin nge kan sorkar hian a lei tih leh, pakhat cheng engzatin nge a lo thlen dawn tih kha kan Minister zahawm tak hian min rawn react thei sela ka duh a ni.

Tin, a tawp ber nan chuan Demand No. 41, Sericulture hi Pu Speaker, eng sorkar pawh, sorkar hmasa te pawh a ni ang a, Sericulture pawimawhna hi kan pawh tawk lo em aw ka ti a. A chhan chu Sericulture hian pangang chaw ei duhna te, a chaw tur ang chi te hi Mizoram khawi khuaah pawh a tha duh vek mai a ni. Ka bial Changpui-ah sawn an ching ve a, an hlawhtling em em mai a. Hmun hrang hrangah an chinna hmunah hian a hlawhtling vek mai a ni; tin, an tharchhuah hralhnaah an buai miah lova, thingtlang Changpui atang pawhin Lunglei ah an han la chho a, Sericulture Department-in a pawisa pawh buaipui ngai lovin an lo pe nghal thei a ni. Chutiang anih chuan tun aia nasa zawka industry lian zawk leh Mizoram te pawh kan intodelh theihna tur thil a ni a, nasa lehzuala sorkar hian kan ngaihtuaha, kan thingtlang loneitute tan pawh a ram tichhe tawh si lo mahse eizawnna tha tak si, kan tharchhuah pawh tihralna buaipui ngai si lo a ni a. Hetah hian Pu Speaker, nasa taka tan la leh turin ka rawn sawi ve a ni e Ka lawm e.

**SPEAKER** : Member zahawm tak Pu Vanlalhlana kan sawm e.

**PU VANLALHLANA** : Pu Speaker, ka lawm e. Vawiinah hun tha tak kan Minister zahawm tak pahnih Pu R. Lalzirliana leh Dr. K. Beichhua Demand te sawihona hun kan nei a, ka sawi ve par par ang a. A hmasa bera ka sawi duh chu Power & Electricity chungchang hi a ni.

Tunlai khawvelah electric hi a pawimawh em em a, electric avang hian kan nung a ni deuh ber tawh mai a. Mihring nun min tihlimtu, kan nun min tinuamtu, khua a vawh deuh pawhin meilum kan ai thei a, khua a lum deuhin fan te, AC te electric hmangin boruak nuam tak te kan dawngsawng thei a. Tin, hmasawnna hi electric tel lo chuan a theih reng reng loh a ni ber mai a, chuvangin electric hi ka ngai pawimawh a, ‘ka priority sector’ ka ti ve a. Chaw tharchhuah a pawimawh em em a, a dawtah kawng, a dawt leh a electric power hi ka ngaih pawimawh chu a ni.

Hemi ka inbuatsaih dawn hian eng eng emaw ka chhiar ve a, information ka hriat thenkhat House-ah hian ka share duh a. Electricity hi Michael Faraday-in 1830 kuma a hmuhchhuah a ni a. Scientist hrang hrangten an develop chho a, tun hun hi kan tleng chho ta a ni. Tin, khawvelah hian electric siamchhuak tam ram pathum en ta ila, China-in a siamchhuak tam ber a, a dawt a USA, a dawt ah India. India hi power siamchhuak zingga pathumna kan ni a ni. Tin, chutiang bawkin a hmang tam ah pawh population tam na na na

chu kan hmang tam a, pathumna bawk kan hauh a ni. Tichuan, India ramah hian mega watt nuai 3,73,024 kan siamchhuak a, chu chu September, 2020-a kan dinhmun a ni a.

India rama power siamchhuah zawng zawng 65% hi thermal (lungalhthei) atanga siamchhuah a ni a, a dang 22% hi hydro electric (tui) atanga siamchhuah ani a, 10% hi solar leh wind atanga siamchhuah a ni. A bang 3% hi nuclear energy atanga siamchhuah a ni a, chung chu India ram kan power dinhmun a ni a. India hmarchhak kan thenawm state te hi han en leh ta ila, Nagaland khuan mega watt 53 tichhuak thei hydel project a nei a, a aia te deuh eng emaw zat an la nei bawk a. An mamawh ang mega watt 103 khu chu anmahni siamchhuah a ni. Doyang Project 75 mega watt tichhuak thei te an nei a. Tin, Meghalaya khuan Ganur project mega watt 25 te, Umiam project, stage 1 - 4, 60 mega watt te an nei bawk a. Tin, Manipur hian Loktak downstream te, Tipaimukh te 70 mega watt pechhuak thei an nei bawk a. Tripura chuan kan hriat angin gas base in electric an siamchhuak a, mega watt 600 vel an nei a ni. Chutiang chuan kan thenawm state te hi Arunachal leh Sikkim ka la sawi lova, anni pahnih phei hi chu India rama power house nih tum an ni a. Sikkim-in Tista lui an nei a, chhawng 4 chhawng 5-in an khuap tawh a, an hrallh chhuak nasa tawh a. Tin, tunah chuan Arunachal Pradesh chu an hausa em em a, Etalin Project, mega watt 3,097 pechhuak thei Dibong valley ami hi India rama hydel project lian ber tur a ni, tunah an la peih lo deuh a. Tin, power potential hrim hrim hi mega watt 57,000 an nei bawk a ni.

Chutiang chu kan thenawm state te dinhmun a ni a, keini Mizoram hi han thlir ve ta ila, Ni 14.3.2021 khan Mizoram-ah power kan mamawh tam lai ber lai, tlai dar 6:00 ah hian mega watt 105 kan hmang a ni. Tichuan, kan mamawh tlem lai ber zan dar 1 - 3 inkarah mega watt 40 kan mamawh thung a, chu chu power kan hman dan a ni a. Power kan nei tha em, nei tha lo em tih kha chu mimal ngaihdan ni ta sela, kan Governor hian House a address khan a sawi a, “ka ngaihpawimawh chu power siam chhuah” a ni a ti a. Tichuan, MNF party hian SEDP bu an siam a, chutah chuan power chungchanga an ngaihdan chu hetiang hian an tarlang a ni. Pu Speaker i phalnain ka han chhiarchhuak ang a –

“Mizoram-in power and electricity-a kan intodelh theih nan kawng hrang hranga tanlak a ni a. Kum 2030-ah chuan Mizoram hi power-a intodelh bakah hrallchhuah tham nei tura hmalak tum a ni. Chung atan chuan project lian heng Hydel Project te, natural gas atanga power siamchhuah te bakah hun reilo zawka tihhawhtlin theih, *short term project* leh India sorkar pawhin a tuipui ni zung leh thli chakna, *solar & wind energy* hmanga power siamchhuah lamah tanlak tum ani ang. Tin, ni zung leh thli chakna hmang kawp thei power plant, solar wind hybrid technology pawh sorkar office leh Zirna-In leh mimal In tan pawh tangkai zawka hman dan ngaihtuah ani ang. Tin, Mizoram-a electric la nei lo khuate eng pek vek tum a ni a, tin, chhungtinte eng pek vek tum a ni” tih kha SEDP-a electric siamchhuah chungchanga an ngaihdan chu a ni.

Tunah chuan Mizoram-a electric eng neilo khua an awm lova, department hian electric hi a pe vek tawhin ka hria a, a lawmawm khawp mai. Engpawhnise, SEDP-ah chuan

electric power hi an ngai pawimawh a ni tih kha a lang a, an manifesto hi han thlir ve leh thung ila - “Kawlphetha siamchhuah lamah tanlak a ni ang; District Hq zawng zawng hi solar city town-a siam tuma hmalak a ni ang” tih a ni. Chuvangin, SEDP leh Manifesto atanga kan en chuan MNF party hian electric siamchhuah hi a ngaipawimawh a ni tiin a ngaih theih awm e.

Tun tum session-ah khan, “Electric power-a intodelh turin sorkar dinglai hian eng angin nge hma a lak” tih ka zawa a, chutah chuan hetiang hian an hmalakna min hrilh a, “Tlawva Small Hydel Project mega watt 5 tichhuak thei, Tuiching Micro-Hydel Project 100 kW tichhuak thei, Tuirivai Micro-Hydel Project 150 kW tichhuak thei, Kawlzem Small Hydel Project 4 mW tichhuak thei, Tlunghel-ah solar hmang 2 mW tichhuak thei, Vankal 20 mW tichhuak thei, Keifang 10 mW tichhuak thei” tih kha sorkarin power a kan intodelhna tur atana an tih min hrilh a ni a. Pu Speaker, a bei tham deuhin ka hria a, chuvangin an manifesto-ah te, SEDP-ah te an tarlan ang chiah hian sorkar hian hma a la dawn lawm ni tih hi ka ngaiantuahnaah a awm a.

Tin, Mizoram-ah sorkar hmasa lamah te MoU siampuiin Company thenkhatte nen tui khuap turin tih an ni a, mahse pakhatmah khuah a ni lova. Heng Tuivai 210 mW pechhuak thei ang te, Kolodyne Phase I & II te, Bairabi 80 mW pechhuak thei te tin, Lungreng 815 mW pechhuak thei te, Bawinu 635 mW tichhuak thei ang teng te hi bawhzui a thain ka hria a. Mizoramah te tak te te hmun hrang hranga project siam ai chuan a liantham, ramin a chhawr tham, kan ram dinchhuahna ngei tur; tunah revenue kan nei lova kan pachhe em em a, chutihlai chuan electric hrallchhuah tham kan tharchhuak thei a ni tih hi a lang reng a, kumtinin vaibelchhe 100 dawn Electric Deptt. ah hian kan hloh thin ani tih hriat a ni a. Chumi avang chuan engnge a chhan tihte leh recommendation te siam tha turin Administrative Staff College of India, Bangalore te pawh rawih niin, anni chuan report te pawh an thehlut tawh a ni. An report-ah te pawh chuan “Mizoram-in Hydel Project potential tha tak in nei a pawisa tam tak power lei nan in hmang si a, heng hi engatinge in siam loh” tiin recommendation te pawh an siam a ni. Chuvangin kan sorkar hian Power chungchang hi ngai pawimawh se, Hydel Project siam tur hian hma han la se tih ka ngenna leh ka duhsakna tih te pawh a ni.

Tin, Mizoramah hian Power & Electricity Deptt. hi sorkar in a la enkawl a, heng ACSI Administrative College Staff of India ang te hi chuan an recommend-ah te pawh, then hranga co-operation a dah vek turin a recommend a ni. India ramah hian Mizoram, Sikkim leh Kerala deuh chiah hi sorkar-in a la enkawl a ni a, a dang zawng hi chu co-operation in a enkawl vek a ni. Distribution section a awm a, chu chu deptt. pakhatin a enkawl a, generation te transmission te khatiang khan hmun thumah inthenin he deptt. hi India ramah chuan an lo kalpui tawh dan a ni tih kha ka tarlang duh a. Chuvangin Power hi SEDP-ah te, Manifesto-ah te an intiam ang ngei hian ngai pawimawhin hma han la se tih kha ka tarlang duh a ni.

A dawt lehah chuan Sericulture hi ka han sawi ve ang a. Sericulture hi nikumah pawh kan sawi a sorkar te pawn a hria a, Minister te pawhin a hria a. Mizoramah chuan potential a tha em em a, Assam-a tha thei mang lo kha duhthusamin Mizoram-ah a tha a ni tih pawh member ten kan sawi a. Sorkar hian ka rin aiin a um chak lo a, deptt. dang te ai hian ngaih pawimawh tur a ni dawn lawm ni aw, sorkar hian mipuite pawh han zirtirin bul han tanpui tha se, hei hi chu Mizoram-in a hming kan chher vena tur, Assam pawhin India ram leh khawvelah hming an chherna chu an silk a ni, chutiang ang chiah chu kan nei theiin ka hria a. Chuvangin uar lehzualin pawisa pawh tunah vawk vulh nan leh ar vulh nan an sem ang hian hma a lak tan nan hmang sela ka duh hle mai tih kha ka sawi duh a ni.

A dawt lehah chuan, Animal Husbandry & Veterinary chungchangah hian kan sawi ang khan SEDP hmangin sorkar-in selection a siam a, mi 1,020 vel beneficiaries hnенah pawisa te pawh a sem tan a ni a. He beneficiaries hi eng angin nge ni, eng criteria hmangin nge ni a thlan aw, Party hmangin nge? An thlan dawn hian economic survey te an nei em tih te hi kan hre lem lo a, base line survey te pawh an nei lo nge an duh duh an thlang mai? Hmun thenkhata an thlan an hming chu tarlang lo ta ila, an veng nen, mi 4, 5 hi chu ti awm lo deuh deuh hi vawk vulh tur leh ar vulh tur hian an thlang a ni. Chuvangin a thlan dan lai a hi eng ang chiahin nge an thlan, base line survey awm si lova tawngpawng thlan em ni tih te kha ka han hre duh a.

Tin, Selesih te khi a ram ta hle mai; tun hmaa Vety hmunpui thina kha hmun ram tak a ni a, tun hma pawhin hulum takin an luah thin a, chuvangin Vety hian han ti hulum leh se, khilai hmun fal nuam tak mai Vety college tha tak mai awm bawk si nen, khilai an hmun tha tak mai khi han luah lum leh se tih kha ka tarlang ve duh a ni.

Tin, Excise chungchangah hian zu khapna dan kan nei thuai a, vawiin thleng hian a Rules hi kan la nei lo niin ka hria a, kan nei har hle mai a, a rules neih thuai a chakawm khawp mai. Tin, zu hi kan khap dawn anih chuan Excise Deptt. te pawh hi kan thuam chak a ngai a, Excise Police Constable te pawh kan lak thar a ngai a ni.

Tin, Social Welfare chungchangah hian, mi harsa te enkawltu a ni a, a Minister ka han hriattir duh mai mai chu, Anganwadi tam tak hi kan sa ve a ni MLA Fund atang te pawhin tih kha. Chu chu ka duh tawk mai ang e. Pu Speaker, ka lawm e.

**SPEAKER :** Sawi tur kan awm tawh lo maw? Tunah chuan Minister zahawm tak Dr. K. Beichhua kan sawihona te wind up turin ka sawm ang a. Tin, sawi fiah ngai a tih te rawn sawi fiahin, a demand te House ah pass rawn dil turin kan sawm e.

**DR. K. BEICHHUA, MINISTER:** Pu Speaker, ka lawm e. Ka Department hi Pu Speaker, han ngaihtuah chet chet a, a zau ang reng a. Rangvamual zu atanga Hnahlan wine leh scotch whisky zawng zawngte a ni a. Hetah Sericulture atanga Vety hi han ngaihtuah leh ta ila,

pangang atanga sial leh sai thleng a lo ni leh ta a. Social Welfare Deptt. hi han chhut chian chuan a lo zau ang reng khawp mai a, nausen a nu puma thla ruk anih atanga double pension tar thleng a lo ni a. Chutah tleirawl cher chhete ban lian deuh, ke lian deuh atanga hetah pastor upa lampang tawh thleng a lo ni bawk a. Tin, Anganwadi atanga University thleng a lo ni leh bawk a. Chutiang chu a ni a, han sawi dawn chuan thui tak sawi tur a awm ang a.

Mahse vawiinah hian lawmawm deuha ka hriat chu Pu Speaker, Member 25 ten ka Demand min rawn sawipui a, khatah khan chuti teh chiama han react tur leh a tha lo zawnga sawi kha tumah kan awm lo a. Fakna te, min hlut sakna thu hriat te a nuam ka ti a, lehlam takah chuan a inthlahrun awm zawk mah mah a. Suggestion tha tak tak leh hma lak dan tur tha tak takte an rawn sawi a. A lawmawm ka ti a ni, Pu Speaker.

Chutih lai chuan thiante thusawi eng eng emaw han react sak hi chu Member zahawm tak takte tih dan a ni a. A tlangpuia hmalakna sawi mai loin discussion ang deuh hleka Member ten discussion-a an rawn neih te kha kan sawiho turah ngai ila.

Demand No. 7, Excise & Narcotic chungchanga Pu VL Zaithanzama'n Excise & Narcotic salary a sawia kha, Pu Speaker, kum 2021-2022 budget-a Excise & Narcotic a Salary Head-a dah tlem anih chhan chu, Covid-19 vanga hnaruak Inspector, Sub-Inspector, EDC leh Constable te lak an nih tak loh vang a ni. Heng post ruak te hi hnawh khah anih hunah Salary Head-a dil belh a ni turah ka ngai a, RE anga nakina rawn tarlan turah ka han ngai a ni tih kha ka sawi fiahna ni ta se.

Sericulture kha Member tam tak te khan an sawi a, han react em em tur a awm lova. Chutah chuan Member zahawm tak Pu KT Rokhaw khan Samagra hnuia tuna Siaha district-a project an kalpui mek hi a bial lamah pe ve turin ngenna a rawn siam a. Siaha bial ai mahin Tipa bial lamah hian kan dah tam zawk emaw tih tur a ni a, a bik takin Chakhei-ah pawh mi 20 chuang kan select ve a, 'kan lo pe dawn a ni' tih kha kan inhrilh ni ta se.

Tin, Pu Lalchhuanthanga, Aizawl South-II MLA zahawm tak khan Muga chung chang kha a rawn sawi a, Muga potential area hi kan ni tak meuh a, Muga development project pawh department-in siamin central-ah an thehlut mek a ni. Nikum khan Covid-19 hri leng avangin approve hman loh a ni a, kum thar lamah chuan an approve ngei kan beisei a ni. Sericulture hi Memberte hian hetia en mai ai hian a hmunah min lo luh chilh ula, tun kan hma lak danah hi chuan thahnem kan ngai ve viau a ni, mi state te kan pha lo anih chuan thu dang ni se. Keimahni tawkah chuan project chi hrang hrang hlawhtling tak implement tawhte pawh kan nei a. Central-in Project Implement a thlannaah pawh North East state-te zingah chuan Best North East Region Textile Promotion Scheme, 2019-ah thlan kan ni. North East pumpuia ti tha ber kan ni tih kha ka rawn sawi chhuak duh a ni. Chumi award chu Delhi-ah kum 2019 khan kan zuk dawng ve a ni. Khalai kha kan member zahawm tak Pu Lalchhuanthanga khan min lo hriat sak se a tha ang e.

Social Welfare-ah khan Member tam takte khan tlem theuh in sawi a, han hrilhfiah mai theih te pawh a awm a. Naupang adoption kalpui chung changah khan Member zahawm tak Dr. Vanlaltanpuia khan a rawn sawi a. Adoption atana Mizoramin dan, act, rules, regulation kan hman mek hi “Juvenile Justice Care and Protectional Children Act, 2015” leh he Act-in hmang tura a tih chu “Adoption Regulation, 2017”, Ministry of Women & Child Development-in a duan hi a ni. Heng Dan te hi India ram pum hman tura tih anih avangin a hranpaa Mizoramin dan lo siam hi a rem lo a ni. Adoption hi Complete Online System-a tih a ni a, naupang adopt theih te leh adoption ti duh te hi dan hian criteria a siam vek a. Heng naupangte leh adopt ti duh te hi online-in all India registration tih sak vek an ni. Registration tih hmasak dan indawtin naupangte hi adopt theih an ni. Adoption ti duh te pawh registration ti hmasa apiang adoption ti thei tura kalpui a ni. Adoption ti duh ten awm hmun atanga online registration tiin faa an lak duhna state pathum an thlang thei a. Registration an tih zawhah an awmna state adoption agency-in fa la tlak an ni em tih a enfiah hnuah, fa la tlaka an ngaihte chu an lak duhna hmun state an thlanna apiangah fa lak theih, adoptable naupang la thei tur anga ngaih an ni.

Pu Speaker, secular state kan nih angin Govt. of India-in fa la tlak tehna a siama tlingte chu an sakhua avangin a hnawl thei lo a ni. Hei hi keimah ngei pawh hian ka vei ve thin khawp mai a, Memberte pawh hian kan vei tlan ka ring a. Kan ramah hian naupang 355 hi ‘inter-country’ leh ‘in country’ ah hian adopt an ni tawh a ni. Chutih lai chuan thenkhatte hi chu ESA-a inter-country-a an adopt ang chite hi chu an adopt hnu, an puitlin hnu mi tha tak tak pastor-a chhuakte pawh an awm a. Chutih rual chuan thenkhat chu an sakhuanna Hindu-a inlet ta mai te, Hindu-a puitling chho mai te, Muslim-a puitling chho maite han hmu hian rilru a na thin a. Chung avang chuan North-East pumpui atang pawh hian keimahni North-East tan bik hian a hranpaa rules insiam ve thei turin vawi hnih lai kan zuk dil tawh a ni. Mahse rem min tih sak lo a, chuti chung chuan kan hotute hian engtin nge kan tih ang tih hi chu an la ngaihtuah reng a ni tih kha min lo hriatsak se a tha ang e.

Tin, Dr. BD Chakma zawhna EMRS Kamalanagar, physical leh financial achievement a rawn zawh kha, physical achievement hi 70% a ni a, financial achievement hi 88% a ni. Kan hriat angin Chawngte hi hmun kilkhawra awm a ni a, Pu Speaker, kalkawngte pawh a tha lo a. EMRS hi nikum lama zo tura tih niin work order hmu hnu 36 months a zo tura tih a ni. Chuti lai chuan nikum lam dinhmunte pawh kan hria a, Covid-19 te a ni a, tin, Chawngte hrim hrim hi furah phei chuan motor a lut hlei thei mang lo a, Chawngte atanga EMRS inkar kawng pawh hi furah chuan kal theih loh tluk a ni. Chunga vang chuan hei pawh hi theihtawp chhuahin hma kan lo la ang a, chak thei ang bera hma lo lak kan tum ang a, 2021-2022 ah hi chuan zawh ngei kan lo tum ang tih kha ka chhanna ni se a tha ang e, Pu Speaker.

Tin, Article 275(1) hnuia grant chungchang a rawn sawi kha, article 275 clause 1 hnuia grant hmu thin hi sector hrang hrang hnuiaih hmu thin niin tun kum 2020-2021 atana hmu atang hian *Promotion of Sports* lamah pakhatmah hmu tur a awm lo, Sports

promotion atan hian Article atang hian pakhatmah 2020-2021-ah khan kan nei lo a ni. Kha lai kha chu sports promotion nan Article atang hian engmah nikum (kumin kum kal lai kan ti ang chu) lamah khan, Pu Speaker, engmah tih kan nei lo. Education sector-ah 14.93% a kal a, Health sector-ah 35.52% a kal bawk a, Agriculture & Allied sector-ah 34.1% a kal a, a bak zawng 15.54% hi committed liabilities-ah a kal a ni. Chu lai chu min lo hriat chian sak atan kan member zahawm tak Dr. BD Chakma pawh kha ka chah duh bawk a.

Tin, Pu Lalsawivunga khan, ‘budget tharah hmasawnna a awm lo’ a tih chhanna ‘Rehabilitation Home for person cure of mental illness’ tih hi, rilrua harsatna tawk, damdawi ina enkawl dam tawh discharge theih si, mahse hawna tur remchang neilo emaw, chhungkaw dinhmun-in a zirloh vanga in lama inenkawl chhunzawm lo te tana hmun remchang buatsaih turin hmalak mek a ni. He hmunah hian a tul anga doctor leh mithiam ten vil turin tunah hian Maumual-ah khuan hma kan la mek a, chu hma kan lakna chu state supreme court order a nihna angin state atanga sum hmuh a ni tih lai kha ‘Rehabilitation home for person cured of mental illness’ chungchang a rawn sawiah khan ka lo sawifiah ni ta se.

*Tar Pension* hi thingtlanga zin pawhin zawhna tam ber a ni thin a, keimahni Member-ah te pawh hian helai hi kan chian tlan hi a tha kan ti a, sawihonaa Memberte rawn sawi pawh kha a tha hlein ka hria. Helai MLA zahawm tak Pu VL. Zaithanzama rawn sawi, tar pension hun rei tak an account-a la thin ten tunhnaia an account a lut ve ta lo hi engnge a chhan” a ti lai kha, Kum 2019-2020 chhunga Mizoram Society for Social Audit Accountability and Transparency ten Aizawl District chhunga social audit an neihnaah tar pension la mekte list an neih atangin veng khata MUP lam ten beneficiary thenkhat chu an vengah an awm loh thu an sawi a. Hemi anih avang hian District Social Welfare Officer te chuan he pension dawngtu te hi an awm ngei a ni tih finfiahna a tan anmahni ngei Office-ah kala la turin an phut ta a ni. Chutiang list a awm lo te chu an pension hi sumfai in DSWO Office-ah an la ta hril a ni. Helai hi, ‘kan in register duh a, min register duh lo’ tih ang chi te, ‘tun hmain kan lo la tawh thin a, tunah kan la ta lo va’ tih ang chi te pawh hi a awm zauh zauh thin a.

Pu Speaker, helai hi Member ten kan hriatchian a tul ka tiha chu, 2012-2013 vel atang khan keimahni list leh central list khu a in mismatched ve deuh a ni. Chutichuan kan kal chho ve zel a, vawi khat laiah chuan kum 60 - 79-te chan tur min rawn pe tlem a, kum 80 chunglam kha surplus in min lo pe a ni. Chu surplus-a min rawn pek chu a hnuai lama daih lo atan khan Finance lam phalna dilin arrangement kan siam a, chutiang te chuan kan kal a. Tunah hi chuan central leh state mismatch chungchang pawh hi hma kan la chho mek zel a, a fel tep tawh a. Kumin Financial Year tharah chuan a list te pawh a thar felfai taka kan neih theih kan inbeisei a ni. Chu chu tar pension chungchang a kan inhrilfiahna ni ta se.

Pu L. Thangmawia, Lengte bialtu zahawm tak khan Ngopa EMRS session zawh lamah hawn theih a ni ang em tiin zawhna a rawn siam a. Pathianin rem a tiha kan dam

chuan session zawha kan hman veleh hawn theiha dah tawh a ni tih kha kan inchhanna a ni. Tin, Ephatha Special School, Vaivakawn te luah tur school building ngaihtuah sak theih a ni em tih kha, hei hi chu School Education lampang tih ve deuh turah kan ngai a, keini lam chuan hei hi chu kan lo ngaihven lem lo tih laia kha kan inhrilhfiahna ni ta se a tha ang e.

Pu Lalrinsanga Ralte, Serlui bialtu zahawm takin Article 275, clause 1 hi MLA bialtin a khai rual deuh zawka tih ni se, a rawn tih kha, Article 275, clause 1 scheme kalphung chu, DC tinte chair-na hnuaih district plan te an rawn siam thin a. Chu district plan an rawn siam chu department-ah, state-ah an rawn thehlut ta a, state-in a dik leh diklo a lo check thlap a, check hnuah chuan State Level Evaluation Committee hnenah kan thlen leh ta thin a, chumi hnua Ministry of Tribal Affairs-ah thehluh thin a ni. Chung avang chuan helai atanga a hrampaa lo siam mai nilo, keimahni duhdan anga lo siam ni lovin Article 275, clause 1 hi chu District tinin an proposal Deptt. of Social Welfare-ah an rawn thehlut thin a ni.

Construction of Tribal Cultural Centre, Bilkhawthlir hi SLEC approval dawn tawh a ni a, sanction a la ni lova. SLEC kuminah hian kan la thu lo a, nikum lama approve tawh anih chuan thudang ni ta se tih lai kha kan inhrilhfiahna ni ta se a tha ang e, Pu Speaker.

Tin, Anganwadi chungchang Pu K.T. Rokhaw Statement atanga han inhrilhfiah ka duhna lai chu – Anganwadi Centre Mizoram pumpuiah thuamthat a ngai a ti a, hetiang hian department-in Anganwadi thawmthat hna lo thawh tawh dan a ni –

Kum 2018-19-ah khan Anganwadi Centre 600 upgrade an ni a, chunga tan chuan nuai 2 theuh, nuai 1200 central atanga hmuh a ni. 2020-21-ah khan Anganwadi Centre 120 repair a ni leh bawk a, chu chu Poshan Award Funds cheng 1.5 crore-in kan repair a ni. Hei hi 2019, India ram pumpuia Poshan Abhiyan, Mizoram State Factory pahniha a pakhatna ve ve kan nihna lawmman atanga kan hma lakna a ni a, hemi piah lamah hian a toilet repairna atan te pawh kha kan hmang tel bawk tih laia kha ka sawi duh a. Kum 2020-21-ah khan Anganwadi Centre 44, *reconstructed and repaired* a ni ta a, chu chu Tribal Affairs Ministry atanga pawisa nuai 59.24 kan hmuh atanga tih a ni a. Kum 2020-21-ah pawh khan Anganwadi Centre upgrade-na turin Ministry lam, Women & Child Development-ah project proposal theh luh a ni a, hei pawh hi min pek mai beiseina sang tak kan nei a, Ministry-ah a la awm mek tih lai kha ka rawn sawi duh bawk a.

Tin, Pu V.L Zaithanzama statement, WCD hi department hranin awm thei se, Social Welfare & Tribal Affairs hnuai a awm lovin tiha kha, hei hi department chuan sawrkarah a thlen tawh a, ala puitling hrhlo a, engtik niah emaw chuan hengte pawh hi hlawhtling turah te pawh kan inngai a ni tih lai kha kan inhrilhfiahna ni ta se.

Tin, Pu Speaker, tarik Ni 9-a Member zahawm tak Pu Zodintluanga'n Starred Question No. 108 zawhbelhnaa a rawn zawh, "Champhai North biala Anganwadi eng emaw zat repair a ni a, cheng nuai 2 theuh an dawng a, mahse nuai khat sing nga chauh an hmang

a, nuai sarih vel hi hman lohin a awm a ni awm e” tih lai kha Pu Speaker, House-ah hian inchhang mai ila a thain ka hria a. Kum 2017-18 chhung khan Ministry of Women & Child Development Anganwadi upgrade-na tur sum a lo thleng a, Child Development Project Officer, CDPO-in Anganwadi Centre chhia leh repair ngaite an lo submit zul zuia pek an ni. Champhai RD Block huam chhungah hemi tum hian Anganwadi Centre 28 upgrade niin, cheng nuai 2 theuh Anganwadi Centre pakhat upgrade nan pek an ni. Anganwadi Centre kutthlak miah loh leh pawisa fai cheng nuai 7 hman loh a awm thu department hriatah report a awm lo a ni. Anganwadi Centre upgrade-na atana pawisa hi installment-a pek niin installment hniha pek an ni. First installment-ah cheng 1,20,000/- pek phawt niin, Child Development Project Officer ten a hmunah supervise-a endikin, thawk tha tawka hriat hnu ah chauh 2<sup>nd</sup> installment-a balance la awm cheng sing 8 hi pek leh chauh an ni. Tin, cheng nuai 7 hi Anganwadi Centre 14 te rawng hnawih nan leh beautification tana hman a ni a, chung Anganwadi Centre 14 te chu a hnuai mite ang, an hming chu ka rawn chhiar kher lo ang a, member zahawm tak te khan min lo hriaththiampui ula, hun a rei lutuk loh nan. Pu Lalmangaiha hian cheng nuai 7 lachhuakin heng Anganwadi Centre 14 thuamthatna atan hian cheng sing 5 theuh henga thawk tute hi pein, an ni hian a thuamthat hna an thawk a, cheng nuai 7 hman loh anga sawi hi ni lovin, Anganwadi Centre 14 thuamthatna tana pawisa lakchhuah cheng nuai 7 hi hman ngei a ni tih kha ka chhanna a ni e, Pu Speaker. Khang kha a tlangpuia Social Welfare chungchanga kan inchhan theih chu ni ta se.

AH & Vety-ah hian Member 25-in kan rawn sawi a, kan hmalakna tlawmte te pawh min han fak der a, inhlut a, a lawmawm a, hriat chianloh lai te pawh a awm bawk a. Pakhatnaah chuan, Opposition Group Leader Pu Zodintluanga'n UK atanga vawk lakluh chungchang a rawn zawh kha hetiang hi a ni -

Delhi hi 28.2.2020-ah a lo thleng a, tichuan vawk kan laka te chu Large white Yorkshire - a pa 7, a nu 16, a vaiin 23; Land race - a pa 7, a nu 15, a vaiin 22. A vaiin 45 a ni, 45 kan chan tur a ni a. Pu Speaker, i hriat angin March thla atang khan quarantine centre-ah awmin, hei hi a lo thlen veleh 28 February thla tawp ni chiah chiah, a tuk March a ni a, a lo thlen veleh quarantine nghal a ni a, kan doctor leh supervisor kan tir thla a, ni 40 vel quarantine ngai anih avangin quarantine centre ah kan dah ta a.

Tichuan ni 40 hnuah covid-19 a lo ni chho leh a, han inphurh chhoh ngaihna a awm lova, National lockdown te a lo ni a, train kal a awm lova, motor kal a awm lova chutiang chuan kan kal chho ta zel a. Hun eng emaw chen kan han kal chho a, a hnuah chuan kan Chief Minister zahawm tak pawh hian hei hi ngaihpawimawh sak khawp mai a, eng tin tin emaw phurh chhuah talh dan min ngaihtuah sak a ni. Chutianga phur chuak thei dinhmuna kan han awm khan Assam ah te, Meghalaya ah te, African swine fever a leng leh tlat mai a, chung avang chuan kan kalkawng a ni si a, central lam atangin phurh chhoh an remti ta lova, “Punjab ah kan lo dah ang a, kan lo thlahpun tir ang a, chutiang chuan a pungte pawh a tul dan ang zelin, Mizoram hi North East tan Nodal Deptt. in nihnaah nangmahnin in lo rel

dawn nia” an ti a, Punjab lamah transfer a ni. Ni 45 quarantine chhung khan a nu pakhat a thi hlauh mai a, 44 transfer a ni.

Tuna kan vawk la dama te Punjab a farm a la awm hi, a pa 5 leh a nu 15, Land race a pa 6, a nu 14, a vaiin 40 an ni a, Punjab farm-ah hian a pa 2 leh a nu 1, (a pa hi land race) an thi a ni. Punjab a vawk note piang kan chan tur hi North East pumpui insem tur kan nih avangin, Land race a pa 4 kan chang ang a, a nu 4 kan chang bawk dawn a ni. Tuna Mizoram a phurhluh theih maia awm chu, vawk puitling 40 leh a note 9 kha phurhluh theihin a awm mek a ni.

Tin, UK atanga kan lak luh senso hi hetiang hi a ni. Vawk note 41, extra 4 min pek belh nen 45 kan tih kha tunah chuan 40 a lo ni ta a, a note te nen khan lo ni ta se, Punjab atanga Mizoram kan lo phurh luh man hi chu Pu Speaker, chhut a la ni lova, hma kan la chho ang a. UK atanga kan lak dan erawh hi chu vawk note pakhat man hi Pound 1000, chu chu India pawisa chuan cheng 90,000/- ang a ni. Tin vawk note 41 man hi cheng 36,90,000/- a ni. Tin, a Expenditure upto Delhi tih ah hian cheng 28,40,877/- a ni tih kha kan inchhanna ni ta se. Punjab atangin Mizoram-ah kan transfer chho leh ang a, chu erawh chu engzat nge kan expenditure ni ang tih kan la hre lova, he vawk leina man hi National Life Stock Mission-in min pek a ni tih laia kha kan inhrilhfiahna ni ta se.

Tin, Member zahawm tak Pu KT Rokhaw khan Tipa Vety Dispensary chungchang kha a sawi a. Kan hriat angin National Highway 54-in a tihchhiat zingah khan a tel dawn avangin compensation hi cheng 29,40,052/- dawn a ni a, hei hi Sorkarah submit thlap a ni. Sorkarah hemi pawisa bawk hi a sakna tur atan kan dil chhuak leh ang tih kha kan inhrilhfiahna nise.

Tin, Member zahawm tak Dr. Laltanpuia zawhna Haulawng Vety Dispensary-ah Doctor leh VFA an awmlo tih kha, hei hi thawktu indaihlohma avangin Mualthuam VFA in a hmui tel a ni tih laia kha minlo hriatsak se, hun tha te kan la nei chho turah ngai ila, kan hri avanga sum harsatna te kan hmachhawn meka hi a lo reh ang a, hma kan sawn chho zel turah pawh ngai ila, chung hunah te chuan doctor-te pawh kan inpe thei turah beisei ila.

Tin, Member zahawm tak Pu C. Ngunlianchunga’n sawlai Lungpuizawl-a Poultry House Sorkar hmasaa hawn theih deuhthawa chhawpchhuah tawh a tih kha, thil nihna dik tak chu hetiang hi a ni –

NEDP pawisa atanga he project hi siam a ni a, project hming hi ‘Fabricated Poultry House at Lungpuizawl’ tih a ni. Work order hi July Ni 4, 2018-a issue a ni a, a contractor hi Arcon Infrastructure, Ghaziabad, Uttar Pradesh sorkar hmasa ina a lo thlan a ni a, a hnathawh tan erawh hi chu, khatiang khan a a han kal chho zel a, sorkar hmasa pawh khan a lo khawih hman lemlo a, inthlan te a lo tul si a. Kan han inthlang chho a, sorkar thar a piang a, an hna thawh tan erawh hi chu kum 2019 chawhnu lamah khan kan tan ve thei

chauh a ni a, hmun hmate pawh prepared chawp vek a ni a, hman theih nghal mai deuh thawh tura hmalakna em chu .....

(..Interuption..)

**PU C. NGUNLIANCHUNGA:** Pu Speaker, khalai kha a tawng ka hresual palh a ni mai thei, ‘tunah hawn theih maia awm’ tihah khan, ‘tuna a hawn theih mai’ tih zawkin a ni ka sawi, khalai kha kan hun laia hawn theih mai tur zawngin ka sawilo aw, a hresual palh a ni mai thei.

**DR. K. BEICHHUA, MINISTER:** Ni e, kan lo inhresual palh te pawh a ni ang a, mahse thil chiang zawk tikhan a langah ngai ila, a tha tho-ah ngai ang aw ..  
*(Pu C. NGUNLIANCHUNGA: A aia ring khan ti teh, mut a chhuak hman zel a)*

Tin, Er. H. Lalziriana zawhna, Lengte-ah VFA dah theih ni se a tih kha Pu Speaker, kan MLA zahawm tak Er. H. Lalziriana hian a bial hi a hre chianglo hle mai ka ti. Lengte hi Dispensary-ah kan upgrade daih tawh a, chuvang chuan ka lo kal leh chuan vawk pakhat tal chu i talh a ngai ang, tun dinhmunah hi chuan Lengpui atangin doctor in a hmui tel a, Pathian zara huntha kan neih hunah chuan khulai khu kan hmunpui sorkar hmasa, Pu C. Ngunlianchunga hmun thlan a ni a, ‘Khaw mawng ping’, PRRS tlanchhiatna hmun a ni a, PRRS atangin kan him ve thei mahna tia an tlanchhiatna hmun khu a lo tha phian mai a. Tunah chuan vawk khu khulaiah khuanin ‘Piggery Farm’ kan ti a, mi tam takin hma an la chho mek a ni. Chulai chu Dispensary in nei tawh e tih kha bialtu ka hriattir nghal e, Pu Speaker.

Tin, ‘Goat Breeding Farm Thenzawl’ tih laia kha, hei pawh hi sorkar hmasa NEDP atanga hmalak bawk a ni a, chutiang chuan a kal chho a, mahse a Kel zuk lak taka chu tun sorkar thara kan zu lak a ni. MP intlhanni ni chiah khan first batch kha a rawn tleng a, tunah chuan second batch pawh kan la leh tawh a. Tunah hian a puitling 113 leh a note 158 kan nei a ni. Hralhchhuah tawh zat hi 68 a ni a, thlasik khawvawt an ngamlo khawp mai a, a note te pawh an thi ve nual a ni.

Pu B.D. Chakma, Member zahawm takina Boraponsury RAE Centre dah a tih pawh kha, Boraponsury-ah khan kan lo dah reng tawh a lawm le, kha kha.... *(Pu B.D. CHAKMA: Pu Speaker, he Centre hi a la ding miah lo a nia, ka hmu miah lo)* A lo hmu lo palh anih chu, Boraponsury-ah RAE Centre kan nei reng e, tih kha kan inhrilh nawn leh ni se.

SEDP chungchang kha, ni e, Opposition Group Leader Pu Vanlalhlana khan chiang deuh hleka sawi tur khan min phutin ka hria a. SEDP hi kan hriat angin kan flagship programme pawimawh tak mai a ni a, hei hi kan Chief Minister zahawm tak hian a bik takin AH & Vety Department-ah hian kan ram tana hmathlir leh hmalak dan tur ngun taka a ngaihtuah hnuin Pilot Project-ah cheng nuai 1895 nge, (ka tihsual loh chuan) nuai 1800 leh tih a figure chiah ka lo en lova, chuti zat chu min pe ta a. Chu chuan SEDP Vety, Fishery &

Sericulture Board tiin kan din a, kei a Chairman ka ni a, Pu C. Lalmuanpuia, MLA zahawm tak hi Vice Chairman a ni bawk a. Chutiang chuan ngaihtuahna nasa takin kan seng a, kan Chief Minister zahawm takin min phurpui bawk a, Planning lam pawhin min phurpui a, Operational Guideline siamin State Board kan nei ta a.

State Board chuan district-ah Selection Board a siam leh ta a, district a Selection Board chu DC Chairman-na hnuiah AH & Vety concern a nih chuan DVO Member Secretary- a ni ang a, Sericulture anih chuan DSO Member Secretary-a ni ang a, Fishery anih chuan District Fishery Officer Member Secretary a ni se, an ni pathum hi member ni ta se, uluk takin survey an lo nei ang a, a ti tak tak duh tur tunge ni, ram zau tawk nei kan mamawh bawk a, sorkar atanga income source-a in depend lem lo mihring ni se tih a nib awk a. Tin, SEDP atang ringawta dam khawchhuah a, khang atang hmjakna ringawt ring lova anmahni sum leh pai pawh a theih chuan hmang thei mai tur bakah, intiamkamna ang chi zawng zawng tih vek ni se kan ti a.

Nichina kan Member zahawm tak ten an sawi ang khan, tunah hian beneficiary 1020 AH & Vety bikah hian ka thlang a, piglet multiplication-ah 20 units leh pig fattener-ah khan 200 kan thlang a, poultry farming-ah mi 800 kan thlang bawk a ni. Chung chu Techno Economic Parameter tha tak nena kan mithiamte'n an duan hnu ah vawk atan hian ₹3,00,000/- ni ta se, an tlin tawk a ni ang a, an din khawchhuah theihna a ni ang a. Tin, ar atan ₹1,50,000/- hi a tawk thawkhat viauin a lang e, chu pawh chu 1<sup>st</sup> leh 2<sup>nd</sup> installment angin kal tir ang kan ti zet a, mahse kan han kal chho zel a Finance lamin austerity measure-an lo lakte nen Finance lam atangin installment pathuma pek ni se an ti a. Tuna kan pek chinah hi chuan 2<sup>nd</sup> installment pawh kan pe tawh a, 3<sup>rd</sup> installment pawh tun atanga reiloteah kan inpek theih kan beisei a. Chu chu kan kalphung tlangpui a ni tih MLA zahawm tak Pu Vanlalhlana zawnha kan inhrihfiah ni ta se. (**Pu C. NGUNLIANCHUNGA : Khawngaih takin Pu Speaker, react tura ka tih Construction of Pang Tribal Girls Hostel Concept Paper, 2018 a submit kha umzui sak a ni ta em tih kha**) SEDP chungchangah khan Pu Speaker, district thenkhatah khan a lo tlem deuh pawh a ni mai thei a, a lo rualkhai lo deuh pawh a ni mai thei a, khangah khan Member-te hriatthiamna ka ngen a. Pilot Project a ni a, Planning lam thurawn anga ti kan nihna laite pawh min lo hriatpui ula. Member zahawm tak Pu Biakzaua rawn sawi Lawngtlai lamte pawh kha project kan kalpui tak tak hunah chuan duhsak zawk che u kan lo tum dawn nia.

Tin, Pang Tribal Girls Hostel kha an sawi tawh ang khan, SLEC a through tawh chuan central lamah PAC tura thawn vek a ni thin a. Kan hun hma deuh hlek a ni a, kha kha chu ka hre hauh lo, anmahni ngei pawh an lo kal a, “department lamah lo zawngh chhin ula, a whereabout lo hria ula a tul chuan hma ka lakpui ang che u” ka lo ti tawh a ni tih kha Member zahawm tak ka hrilhfiahna ni ta se.

Pu Speaker, khang kha Member-te nen a kan in react-na tlangpui chu ni ta se. Demand No. 7, Excise & Narcotics chungchangah khan hmjakna tawitein sawi tum ila.

Kan hriat angin Excise & Narcotics hi kan indaih loh zia Member tin ten an rawn sawi a, a hrechiangtute vek kan ni. Commissioner atanga Constable thleng hian mi 430 vel chauh kan ni a. Constable hi 264 kan nei a, chutah chuan Mizoram Liquor Prohibition kan lo puang tawh si a rilru a mangangin a rum thin a ni. Mahse chutiang karah chuan he zu dona kawng leh ruihhlo dona kawngah hian Excise & Narcotics Department hi kei mahni chauha kal kan ni lo tih kan chiang a. Kohhran kan hnungah an awm a, political party hrang hrang kan hnungah an awm a, NGO-te pawh kan hnungah an awm tih kan hriaa, chu chuan min tihuaisenin min tichak thin a ni. Tin, keini pawhin thuavna kan neih chu, ram leh hnam tan a thil tha ti tur chuan hmingmawina leh mi fak tawk leka hnathawh hi a li thuk lama lut mi an ni ngai lo. Chuvang chuan, keini Excise & Nanrcotics hi chuan, miin min sela min fak loh pawhin, “Hawh u, Quantity ni lovin, Quality hian i kal ang u” tih hi kan thuavna a ni. Chu chu vawiin ni thleng hian, kum 2 chhung enforcement lam hian an keng kawh tha khawp mai a, Pu Speaker, Excise-a enforcement te hi ka chhuang tak zet zet a ni.

Chutiang chuan hma kan la chho a, tunah chuan District 8 ah office kan nei a, Lawngtlai tih loh chu Asst. Commissioner-in a ho vek a, Lawngtlai erawh chu Lunglei lam Asst. Commissioner in a pui tel a ni. Chutiang chuan kum 2019-a Mizoram Liquor Prohibition Act a lo awm hnu khan theih tawpin hma kan han la chho a, YMA leh NGO hrang hrangte nen kan tang ho a. Kan thil man ho hi 2019 atanga sawi dawn chuan a tam dawn lutuk a Pu Speaker, Member ten an kham palh ka ring a, chuvang chuan 2019-ah khan tam tak zu leh drugs leh ruih hlo dang Excise & Narcotics hian kan man a ni.

Chutiang chuan a kal chho zel a, 2020 nikum lamah khan tamtak kan man leh bawk a, rak zu (local zu) ringawt pawh hi 46,083.76 litres lai man a ni. Zu bilh lai, fermented rice ringawt pawh hi tin 80,322 bakah dawidim (yeast) kan tih ang chi hi kg 99.43 man a ni bawk. Chu chu nikum lam Covid period chhung anih chu, Pu Speaker.

Kum 2020 chhungan Indian made foreign liquor hi um puitling 750 ml hi 8452 bottles, um chanve 375 ml hi 303 bottles, a quarter bottle 180 ml hi 6 bottles leh beer bottle leh cane 1575 man tawh a ni bawk a. Hei bakah hian ram pawn atanga lakluh, Foreign Import Liquor um 540 leh Foreign Import Cane Beer leh bottle 4149 man a ni bawk. Zu siamma bel 785, plastic cane 26 man a ni tawh bawk a. Heng bakah hian Grape Wine um puitling 750 ml bottle 144 leh Grape Wine litre 478.25 leh Apple wine tam tak man a ni bawk. Tin, Foreign Import Wine hi bottle 332 man a ni bawk a ni.

Kum 2020 chhung hian ruih hlo phurna leh a kaihhnawih thila lirthei, two-wheeler 33, three-wheeler 8 leh LMV 62 lai man a ni a, MMV 3 leh HHV 5 man a ni bawk.

Ruih hlo heroine kan man zat hi kg 11.710 a ni a, ganja hi kg 127.449 a ni a, Nitrozepam hi Tab. 163, Diazepam Tab. 2000, Alprazolam Tab.1825, Lorazepam Tab. 32, Tramadol 1419, Cough Syrup 1536, Methamphetamine Kg 45.549 man a ni tawh bawk a

ni. Hetiang hian ruih hlo kaihhnawih a mi kan man zawng zawng hi mi 4419 lai kan man a, case siamsak vek an ni bawk. Heng zinga mi 16 hi ram pawn lam mi, foreigner te an ni.

Hengte hi kum 2020, a tlangpuia hmalakna a ni a, revenue pawh hi engemaw zat heng atang hian kan la lut ve a, foreign liquors and spirit atangin cheng nuai 92,56,326, heng hi armed forces Mizoram-a awm ten state dang atanga zu an lak luh keini ina tax kan lo lak khawm a ni, Pu Speaker.

Tin, Finance Confiscation atangin cheng nuai 2,27,150, 800 other receipts atangin cheng nuai 9,84,683, a vaiin cheng nuai 104,68059 revenue chhunluh a ni.

Central Project-ah hian Assistant to State for Narcotic Control under Ministry of Home Affairs-ah te leh National Fund for Combat of Drug Abuse for Ministry of Finance-ah te project thehluh mek a ni. Hengte hi Pu Speaker, la hmuh theih mai kan inbeisei a ni.

Pu Speaker, Demand No. 29, Social Welfare-ah hian tawi thei ang bera sawi ka tum ang a. Eklavya Model Residential School kan tih hi Pu Speaker 100% grant-in-aid a ni a, zirlai mi 1 tan cheng nuai 1,09,000, Syllabus pawh hi CBSE Syllabus a ni dawn a, Class 12 thleng zir theihna a ni. Pathian zarah tun sorkar hnu hian sawi tawh ang khan 11 kan zuk sawi chhuak a, a dang block zawng zawngah min pe tur a ni tiin pangchang takin kan zu thlen a, a dang 9 te pawh min la pek kan beisei a ni. A hmasa tuna Chawngte, Lawngtla, Tuipang, Ngopa hi 16 crore a ni a, kan sorkar hnuu kan zuk sawichhuah vawiin a kan sak tan mek 5 te hi chu 24 crore theuh an ni. Tuna a thar 2020-2021 inkara 6 min pek te hi chu ka hriatdan chuan 28 crores tur nia sawi a ni. Chu lohah chuan Tribal Reasearch Institute hi Kelsih-ah sawn tunah a chanve aia tam chak takin Contractor-in a thawk a, hei hi ₹282.50 lakh a ni. Chu chu thiltih pui leh eng emaw state function kan tih ang emaw, international function kan neih pawhin saw saw kan la hmang tangkai hle dawn a ni tih min hriatsak kha a thain ka hria.

‘Cetre for Excellence in Sports’ tiyah hian Boxing leh Volleyball atan Thosai, Siaha District-ah hian tunah hian kalpui mek niin hei hi ₹500 lakh man a ni. ‘Special Central Assistance to Tribal sub-Scheme’ kan tih pawh hi 100% CSS a ni a, he Scheme hi kum 2018-19 atanga avail tan niin kan hun tan tir atanga kan avail a ni. Hengah hian Tribal Affairs, Govt. of India-in kumin 2020-2021 chhungin Mizoram tan Project 12 avaiin ₹1236.22 lakh min approve sak tawh a, eng emaw zat chu min sanction sak tawh a ni.

Tin, Article, nichina kan rawn sawi tawh ang khan hma kan la a, tuna Article atanga administrative approval kan neih tawh ang chi hi ₹1447.71 lakh man a ni. Hei hi sector hrang hrang Health, Education, Agriculture, Agri & Allied Sector ang chite atana kan hmuh a ni. Tin, pianphunga rualbanlo kan tih ang chi ‘Unique Disability Identity Card’ kan tih kha tunah chuan district tina hospital doctor te training pek vek an ni a, district tharah hian Disability Identity Card hi issue theih a ni tawh a.

Tin, Jordan Center, Sethawn hi kan Chief Minister zahawmtak hian kan thalaite ruihhloin NASA taka a tihbua mekte a hmuh hian a vei a, casualty kan mamawh a ni tiin “SEDP atangin 10 crore chu heng atan hian ka lo pe ang che u, an veiawm em mai” tiin hma kan han la chho a. Sethawna Home leh Skill Development Center-a kan hman kha ama hovin kan zuk en a, amah ngeiin a hming hi a vuah bawk a, ‘Jordan Center’ tiin. Heng atan hian pawisa ₹920.21 lakh min pe a. Khulaia damdawiin than sak nan te, renovate-na zawng zawng te, internal road te, tui dahna tur te, Biak In te leh a thlanga side plantation zawng zawng khu chu chuan kan han thawk phawt a. Tichuan, Ministry of Social Justice & Empowerment-ah kan zu tlanthla leh a, kan ram dinhmun drug route a nih zia te, Mizoram a him loh chuan Delhi pawh hi in him dawn lo, within a day-ah Delhi hi a rawn thleng thei vek a ni tiin kan zuk thlen a. An niin, “E! Project lo siam vat rawh u, a pawimawh alawm, mahse Infrastructure Develop atan chuan kan pe thei lo che u ang a, recurring atan kan lo pe ang che u” min ti a, kan rawn haw vat a, 15 crore project kan siam a. Tunah hian 77. something lakhs min rawn sanction tawh a, tuna a recurring atana kan hman tanmek khu a ni. Bungraw lei nan te khu laia thawk tu mi 144 te kan lo la tawh bawk a, chungte hlawh chu heng atanga kan tih chu a ni.

Tin, Social Justice & Empowerment hnuai National Institute of Empowerment of Person with Visual Disable ho tan anmahni Ministry kal tlangin Department-ah Braille Press min rawn pe a, hei hi nei vat turin tunah hian hmalak mek a ni. ‘Rehabilitation Home for Person with Mental Illness’ nichina ka rawn sawi kha Supreme Court order angin damlo Pyschiatric patient, damdawi-In atanga chhuak tawh si, hawna tur nei tawh lo, khang ho awmna tur kha tunah hian Maumual-ah khuan Social Welfare Department-in hma kan la mek a ni tih lai kha ka rawn sawi duh bawk a.

Tin, ‘National Action Plan for Drug Demand Reduction Programme’ tih hi Accreditation rules te pawh kha India rama siam hmasa ber kan ni tih kha Pu Speaker, ka sawi duh a. Tunah hian heng atan hian theihtawp chhuahin kum 2020 chhungin kan thalai 800 leh nu leh pate hnenah te, college naupang leh zirtirtute mi 725 hnenah te leh YMA leh NGO ruihhlo ngaite enkawlna kalpui mek tute hnenah zirtirna pek vek a ni tawh bawk a ni. Tin, Nasha Mukt Bharat “Drug free India Campaign” tih pawh kha chak taka kalpui mek a ni tih ka sawi duh bawk a, DC kaihhruaina-in District-ah chuan kalpui a ni. ‘Survey on Drug Use Amongst Children between 10 to 17 years of age’, hei hi survey kan han nei tak tak a, Pu Speaker, kan dinhmun hi a tha lem lo viau mai a, he zirchianna Mizoram district zawng zawng kan neiha a tarlan dan chuan, zirlai naupang 88% hi kan ramah hian ruihhlo kaihhnawih lo ti vek hi an ni a, a lungchhiathlak viau a ni. Chunga tan chuan heti lama theih tawp a hmalak hi kan tih tur a ni tih lai hi House hian min hriatpui se a pawimawh hlein ka hria.

Tin, Drug Treatment-cum-Rehabilitation Centre Accreditation Rules kha chu kan siam tawh a, kan amend hial tawh a nih kha. State helpline for senior citizens, senior citizens ho tan hian helpline tunah hian kan buaipui mek a, tun atanga reiloteah chuan an hman theih

ka beisei a, Accessible India Campaign pawh chak taka kalpui mek a ni bawk. National Action Plan for Senior Citizens kan tih ang chi, NAPSrC hi upate Covid-19 dona atan khan Central sorkarin tanpuina a rawn pe a, chungte pawh chu pek an ni.

Tin, upa pension chungchang kha nichinah kan rawn sawi tawh a, category 5 in kan then ta a, chung zawng zawng chu ka sawi chhuak lem lo ang a. Nichina kan chhannaah kha tawk maiah ngai ta ila Pu Speaker, kha kha Social Welfare & Tribal Affairs chungchang deuh chu a ni.

Tin, kan hriat angin Social Welfare Department hi Directorate pahniha bifurcate a ni a, tunah Women & Child Development Department chungchang tawitein han sawi leh ta ila.

Anganwadi Services-ah hian nichinah Member-te pawh khan Anganwadi in ngaipawimawh a, in rawn sawi thliah thliah a. Tuna Anganwadi kan neih hi 2244 a ni a, chunga thil dang dang kan tih chu ka sawi lo mai ang a. Supplementary Nutrition pawh hi lock down chhung pawh khan ‘take home ration’ angin inrinni tin in lamah kan deliver thlap thlap zel a ni. Pu Speaker, nutrition supplement item 16 hi in lamah kan deliver sak thlap a ni.

Anganwadi repair chungchang kha chu nichinah khan ka rawn sawi tawh a, Member te pawh kan chian vek ka ring a. Tin, ‘Scheme for Adolescent Girls’, hei hi Women and Child Department hnuiai scheme pawimawh tak mai a ni a, kum 11-14 naupang school drop-out, hengte hi anganwadi-ah hian food supplement te pawh kan lo pe thlap thlap zel a ni. Tuna kan neih zat hi mi 1300 lai a ni a, hengte pawh hi Memberte pawh hian kan hriata kan vei vea, mahni bial theuhah hma kan lak hi hrtau tu kan nihna angin kan tih tur dik tak a ni tih lai kha kan hriat chian a pawimawhin ka hria.

National Press Centre pawh 175 lai kan nei a, nu naupawm, hna thawk si, a chhuah huna him taka a fa an lo enkawlna tur hmun, ‘Pradhan Mantri Matru Vardhana Yojana’ hi kum 2017 atanga tan niin, nu, nau pai vawikhatna cheng 5,000/- theuh pek an ni. Chungah chuan district ti tha ber lawmman 2018-ah Serchhip hian India ramah a lo dawng tawh a ni, a lawmawm hle. Tunah hian Mizoram hi India ramah 4-na position-ah kan la awm a, kan chhe lo, kan performance a tha viau a ni tih kha Pu Speaker, ka rawn sawi chhuak duh a.

‘Prasan Abhiyan’ chu kan hria a, kan kalpui mawp mawp a, ‘Bye Bye anemia’, ‘Bye Bye mal-nutrition’ tia nutrition tha tak nena naupang enkawl hi Prasan Abhiyan tum a ni. Naupang hi kum hnih leh a chanve anih hian a san zawng tur chanve hi an san zawng a ni tawh thin a ni. Poshan Abhiyan kan hunlai khan lo awm ve tawh ta se Pu Speaker, keipawh hi ft. 6 tal chu ka nih ka ring a, chutianga scheme tha chu a ni a, chu chu chak takin tunah hian kan kalpui mek a. 2019-ah phei chuan Mizoram-in India ram pumpuiah category 2-ah First position ve ve kan zuk nih khan crore 2.5 kan dawng a ni. Children Protection Services

te, State Adoption Resource Agency te, Child Line te, State Advisory Boards Selection Committee te leh Child Protection khang zawng zawng kha district-ah kalpui vek niin hei hi ‘J.J. Act’ kan tih nichina mi pawh kha heng hnuiah hian kan kalpui a ni.

Institutional Services-ah hian Observational Home kan tih hi district 8-ah kan nei a, naupang 19 tunah hian kan nei a, Special Home hi district 2-ah 16 naupang kan nei a, Specialized Adopt Agency (SAA) kan tih, adoption kan va tihna tur khang naupang lo enkawltute kha district 7-ah kan nei a, 17 naupang tunah hian kan nei a ni. Children’s Home hi tunah hian 33 kan nei a, mi 649 tunah hian kan nei mek a, hmeichhe scheme hnuiai hlawhtlinna tam tak kan nei a, State Resource Centre for Women tih te ka sawi thui lutuk lo ang a, Mahila Sakti Kendra (MSK) scheme, District Level Centre for Women kan tih ang chite phei chu DC office-ah hian officer pakhat kan dah ta a, chung chuan hmeichhe hamthatna zawng zawng haikhawmin hma a la a ni. Chutiang chu MSK kan tih hi, bialtu te pawh khan in lo hriat theuh a pawimawhin ka hria.

Tin, *Beti bachao, Beti padhao*, he scheme hi Siaha leh Serchhip-ah tunah hian kalpui mek a ni bawk. ‘One Stop Centre’ kan ti a, hmeichhia pasalte kut tuar emaw, hleilenna avanga tlanchhiatna tur neilo lo enkawlta hmun a ni a, heng atan hian staff kan recruit vek a, nurse te, superintendent te, officer te, security te nen lam heng ho tan hian buatsaih vek a ni tawh a ni. Universal Women Helpline pawh hi kal pui mek a ni bawk a.

Tin, Mahila Police Volunteer te pawh kan nei a, *Swadhar Greh* te pawh kan nei a, heng hi MHIP hian a tlangpuiin an kalpui a, hmeichhia khatianga awmna nei lo kum 18 chunglam, an puitlin thlenga an awm theihna hmun a ni. Ujjwala Scheme te, Mizoram Bal Bhavan te pawh kan nei a, heng atang hian arts te, music te, dance leh integrated activities tam tak kan ti bawk a ni. Tin, Mobile Library kan nei bawk a, chu chu Women & Child lam atanga kan hmalakna tlangpui a ni, Pu Speaker.

Pu Speaker, a tlangpui han sawi loh theih loh a ni bawk si lova, sawi tawh ang khan a huam zau si a, Member zahawm tak te pawh khan min lo hriathiam ka ngen nawn leh a ni.

Demand No. 34, AH & Vety ah hian achievement tlangpui han sawi leh ila. Kan hriat angin ‘AH & Vety Department’ han tih hian ran ringawt hi kan rilruah a awm thin a, chutilaiin kan rilrua awm tel tur chu, tun kum zabi pahnih, kum 20 vela ‘the emerging diseases’ kan tih natna tam tak kan hmuhchhuante, heng zawng zawng atanga 75% chu genetic disease an ni. Hengte hi mihring hriselna nen hian a kal dun lo thei lova, chuvangin vawiina sa-a intodelhna tur te, artui-a intodelhna tura ran hrisel nei tura hma kan laknaah hian mihring hriselna atan pawh hma kan la tel a ni tih lai hi member zahawm tak tak leh Mizoram mipuite hian kan hriat a pawimawh hlein ka hria a. Chuvang chuan, *One-health concept* pawh a lo chhuak ta hial a ni, AH & Vety leh Health & Family Welfare ah hian.

Chutiang chuan SEDP kha kan phak ang tawkin pilot project kan lo kalpui a, nichina kan sawi vek tawh kha ka sawi nawn tawh lo ang a.

Tichuan, Up-gradation of Rural Animal Health Centre 35 kha kan sawi tawh a. Establishment of District AH & Veterinary Hospital Office te pawh District thar pathum kan neihah te, BDO kan tih thin tuna District AH & Veterinary Officer kan tih tak, heng post te pawh hi create vek a ni tawh a. Tun atanga reiloteah luahlum thei turah kan in beisei a ni. Tichuan, hospital 7 kan sa a, nichina kan rawn sawi tawh kha, Rural Animal Health Centre pawh pariat lai kan sa a, Animal Check Gate hi Trans-Boundary Animal Disease, PRRS kan tih te, African Swine Fever te, Brucellosis kan tih te, Foot & Mouth Diseases kan tih ang chi te, heng atanga kan him theih nan tiin animal check gate pariat lai sorkar thar hian a siam a. Chungte pawh chu kan theihtawp chhuahin hma kan la ve mek a ni tih lai kha ka rawn sawi duh bawk a ni.

Veterinary Health Care Institution ah hian Veterinary Poly-clinic kan neih zat chu nichinah ka rawn sawi tawh a, hospital hi 10 kan nei a, dispensary 67 kan nei a, RAH Centre hi 69 kan nei a. Vawk chi tha chi chungchang kan rawn sawi tawh a, *nucleus prosimentation*, vawk chi tha kan rawn phurh haw tur te kha chungah chuan kan lo tih puitlin theih chuan kan dah ang a, *artificial insemination* a tam thei ang bera tih tum a ni. Tunah pawh hian artificial insemination hi tam tak tih a ni a, ka bial Siaha-ah pawh tun hnaiah artificial insemination kan ti a, vawkpui 800 atanga 1000 vel kah rai tir a ni. District hrang hrangah chutiang chu kalpui mek a ni bawk.

Tin, Goat Breeding Farm kha kan sawi tawh a. Hatchery leh Establishment of Hatchery and Broiler Poultry farm kan ti a, nichina kan rawn sawi tawh a, ZPDS ah khuan vawikhatah 20,000 awpkeu thin kha tunah khuan 60,000 awpkeu turin hma kan la mek a. Tin, Lungpuizawl-ah sawn vawikhata 5,000 awpkeu tur broiler leh rainbow rooster (layer) ang chi awpkeu theihna hmun tur a ni a. Chuloah chuan Mampui-ah vawikhatah 2,000 awpkeu theihna hmun kan nei bawk a, hengte hi kan tih puitlin theiha hma kan lak chhoh zel chuan kan ar note mamawh te pawh hi mahni State-ah kan intodelh inbeiseina lian tak kan nei a ni. Mobile Veterinary Unit Ambulance hi 10 lai a thar lei a ni bawk a. Indigenous Heifer Production Farm, nichina kan member pakhatina bawng talh turté pawh hi vulh ni se a rawn tih kha, hei hi bawngpui 100 vulhna tur cheng nuai 205 hi hmuh tawh a ni a. First installment hi nuai 100 kan hmu tawh a, Lungpuizawl, Lengpui-ah tunah khuan hma kan la mek a ni tih kha ka sawi duh bawk a ni.

Tin, Pu Speaker, Rural Development Department nen hian *convergent* in hma nasa takin kan la a ni tih lai kha ka sawi duh bawk a. Tin, National Animal Disease Control Programme-ah hian theihtawp chhuahin immunization kan tih ang chi te, mobile clinic kan tih ang chi te pawh hi hmun tam takah neih a ni. Bird Flu hi kan hriat angin tunhnaiah State 12-ah a leng chiam mai a, varak leh ar te pawh nasa takin an thi a, chung avang chuan ar leh varak chung state atanga lakluh te pawh hi tunah hian strict taka khap mek a ni.

‘Meat & Animal Feed Supply Chain’ kan tih nichina kan Member tam tak ten an rawn sawi kha. Covid-19 lai pawh khan chutiang chuan theihtawp chhuahin hma kan lo la a ni.

Chutiang chuan Vety hian project tam tak a thehlut a, tam tak hi kan hmu tawh a, tuna Upgradation of Backyard Poultry Farm kan tih hi 5.33 crore niin NABARD RIDF atanga kan hmuh a ni. Construction of 8<sup>th</sup> Veterinary Dispensary kan tih pawh hi NABARD RIDF atanga crore 4 kan hmuh a ni. Construction of District Veterinary Hospital pawh hi NABARD RIDF atanga 3.75 crore hmuh a ni. Establishment of Holistic Pig Farm at Thenzawl pawh hi .42 crore niin NABARD RIDF atang bawka kan hmuh a ni. Augmentation of ZPDS erawh chu special central assistance atanga 4. 5 crore kan hmuh atanga hmalak a ni. Production and Enhancement of Feed Meal, Tanhril hi crore 1a ni.

Kan hriat angin tuna kan feed meal-a feed pad khu nikhatah quintal 80 atanga 100 vel kan herchhuak thei a, a khawl pakhat zawk khu hluihlawn deuh ti tih a ni tawh a, khu khu renovate ila kan ti a, a chungte phei chu kan siam vek tawh a, hma kan lak chuan production khu aia tam zawk neih kan inbeisei a ni. Beckyard Piggery Poultry Development atana 6.38 crore hi National Life Stock Mission atangin a ni a, piggery development NLM atan 3.15 crore hi kan hmu tawh bawk a ni. Hei lo pawh hi sawi tur chu a la awm nual a, Pu Speaker, a vai chuan ka sawi lo mai ang e, Memberte an zahawm si a. Kha kha a tlangpui AH & Vety-a kan hmalakna a ni.

Demand No. 41, Sericulture Department hi Pu Speaker, nang pawh kha i muthlu ang tih ka hlau deuh hlek a, ring deuhhlekin ka rawn sawi thin a ni. Mizoram Sericulture Department chuan farmers te tana hmalakna hrang hrang chak takin a kalpui mek a, heng bakah hian hmachhawp eng emaw zat a la nei bawk a. Department hmalak tawhna te leh hmachhawp tlangpui han sawi ta ila.

Aspirational District kan ti fo a, Mamit Aspirational District atan hian Agriculture Project kan siam a, crore 11.56 central atangin min rawn pe a, chu project chu SEDP project base-in kan kalpui ang kan tih tichiangular atan chhungkaw 500 hnenah sericulture-ah SEDP Mamit District-ah khuan kan pe tawh a ni.

Tin, silk samagra-ah hian Central Silk Board, ka zuk dawr a, “Minister min lo tlawh hmasa ber i ni; chuvang chuan i constituency tan project te lo siam rawh, Ministry of Textile lam nilovin Central Silk Board-ah hian kan lo tihsak ang che” min ti a chu chu 2020 - 2022 project tur Muga development a ni a, hei hi crore 11.66 a ni. Tunah hian fund hi 470.14 lakhs central atanga release tawh a ni a, heng atan hian Siaha District atangin chhungkaw 400 project base SEDP tur selection tih fel tawh a ni. Muga Sericulture Development under the Ministry of Tribal Affairs ah hian crore 1 project min approve sak tawh a, chu chu hmuh kan in beisei a ni. Tin, NABARD atangin, Strengthening of Sericulture Industries & Quality Productivity at Hnahthial, Saitual and Khawzawl, hengte pawh hi project lian tham tak

kalpui a ni a, approved tawh niin sanction pawh hmuh vat kan inbeisei a ni. RKVY, 2021-22-ah Development of Sericulture of All Districts, hei pawh hi sorkar kumtharah chuan hmalak theih kan inbeisei a ni. Tin, SEDP pilot project atan nuai 6 pek kan ni bawk.

Chu chu a tlangpuia kan hmalakna a ni a, kum 2021 January thleng Sericulture hian cocoon leh raw silk kan hrallchhuah tawhte chu hetiang hi a ni:-

1. Cocoon Mulberry atangin 323.29 metric tons;
2. Eri atangin 5.562 metric tons;
3. Muga atangin 17.2 lakhs;
4. Octosar atangin 1.36 lakhs.
5. Raw silk-ah hian -
6. Mulberry atangin 37.488 metric tons;
7. Eri atangin 4.3776 metric tons;
8. Muga atangin .285 metric tons;
9. Octosar atangin .023 metric tons.
10. Cocoon rate hi, seed cocoon @ 3 rupees, commercial muga-ah 1.9 a ni. A dangte pawh hia thliar hran vek a ni.

Kan ram hi kan hriat angin silk potential a ni a, muga tan phei chuan Mizoram tluk hi a awm lo tih tur a ni a, tin, afforestation-a tan hian muga plantation hi a tha em em a,’tih chi tak a ni’ tih laia hi. Tuna Ministry of Textile-a kan project te hi hlawhtling thei se chuan, project hmasa kha 2021-a tawp tur a ni a, 2021 kum thar atang hian beiseina sang tak kan nei a, Ministry of Textile a kan project thehluh te pawh kha hlawhtling turah beisei ila. Chutiang chuan Zoram mipuite pawh hian Sericulture-a ke pen tur hian kan insawm tak meuh meuh a ni tih kha Pu Speaker, ka rawn sawi duh bawk a ni.

Chutiang chuan Pu Speaker, ka Demand-te:

<b>Demand No.</b>	<b>Purpose</b>	<b>Amount (in ₹)</b>
7	Excise & Narcotics	40,34,49,000.00
29	Social Welfare	1,54,63,98,000.00
34	Animal Husbandry & Veterinary	79,43,30,000.00
41	Sericulture	20,03,50,000.00
<b>TOTAL</b>		<b>2,94,45,27,000.00</b>

Pu Speaker, hengte hi House-in min pawmpui turin ka rawn ngen e. Ka lawm e.

**SPEAKER** : Aw le, tunah chuan Minister zahawm tak Dr. K. Beichhua department enkawl House-a pass a rawn dilte –

Demand No.	Purpose	Amount (in ₹)
7	Excise & Narcotics	40,34,49,000.00
29	Social Welfare	1,54,63,98,000.00
34	Animal Husbandry & Veterinary	79,43,30,000.00
41	Sericulture	20,03,50,000.00
<b>TOTAL</b>		<b>2,94,45,27,000.00</b>

Rem ti a piangin ‘rem ti’ ti tawh u le (*MEMBERTE: Rem ti*). Rem ti lo apiangin ‘rem ti lo’ ti rawh u le. Rem ti lo an awm lova.

Tunah chuan, Minister zahawm tak Dr. K. Beichhua department chan Demand te –

Demand No. 7	-	Excise & Narcotics
Demand No. 29	-	Social Welfare
Demand No. 34	-	Animal Husbandry & Veterinary
Demand No. 41	-	Sericulture

A vaia belkhawm - ₹2,94,45,27,000 chu House-in lungrual takin a pass ta a ni.

**DR. K. BEICHHUA , MINISTER :** Pu Speaker, ka lawm e.

**SPEAKER** : Awle, tunah Minister zahawm tak Pu R. Lalzirliana kan sawm ve leh tawh ang a. Kan sawihona te rawn wind up se, sawi fiah ngai te rawn sawi fiah se, tin, House-ah hian pass rawn dil bawk se.

**PU R. LALZIRLIANA, MINISTER:** Pu Speaker, tuna in khaikhawm danah khan a inthlahrun awm riau tawh mai a. Kan kum ang zat te i kum veah chuan a reilo lutuk thei lovang a. Engpawh ni se ka lawm e, ka han ti zar zar ang a. Tunah hian a lo rei deuh tawh bawk a, dar kar khat leh a chanve minute nga in a ri lova kan hun hmanah khan. Tahchuan kan MLA zahawm tak tak te khan rem ti ula chuan in rawn sawi kha kan react tura in duh kha ziak pawh ni lo kut chhe deuha ziak lo, Mama te anga ziak kha chu a chhiar mai theih lova, a buaithlak a. Type thlapin ka department te hian an rawn ti vek mai a, an zahawm si a, han tih loh chua dik bawk si lova, mahse hun hi a rei deuh tawh a kan chau deuh tawh bawk nen. Rem in tih chuan hei hi naktuk chawhnu lamah chuan kan rawn sem thlap thei mai ang a, hetiang hian. In rem ti em, react lo mai ang aw? Chuti chu, in phalnain ka react thei vek a. Amaherawchu ka react lo mai dawn a ni.

Pu Speaker, a hmasain Demand No. 33, Land Resources, Soil & Water Conservation hi tawi tea han sawi ka duh chu, he department-ah hian sanction post 464 a awm a, 216 filled up a ni a, a aia tam 252 hi vacant post/post ruak kan nei a ni. Heta tang hian Soil & Water Conservation leh a department chhungah hian hnathawk thei tlem te mah ni ila, an awm a. Engineer mi fel tak tak an awm a, hnathawh an chak viau a. Amaherawhchu hmalakna tur sum hi kan budget han en chuan a awm lo a ni. RKVY leh NABARD atang hian eng emaw

zat chu kan nei ve thin a. Chutiang a nih lai chuan Soil & Water Conservation hi a pawimawh em em a, Mizoram hi tlangrama awm kan ni a, sawi nuam kan tih em em chu Mizoram hi thlai engkim that duhna a ni kan ti a. Kan peih chuan engkim hi ti ila a la hlawhtlin theih a ni tih kan sawi thin a, a dik a ni. Amaherawhchu tun anga water conservation te, soil conservation te hi kan tih nasat loh chuan nakin lawkah thlaler ram rovah kan ram hi a chang thei a ni tih hi kan mithiamte, kan hruiitute hian min hriatpui ka duh em em a ni.

Chutiang chuan sum kan nei lo chung chung pawhin kuminah pawh hian eng eng emaw hna chu kan thawk ve a. SEDP atang pawh hian tunah hian kan Chief Minister zahawm tak hian NABARD lamah kuminah kan fail tak avangin SEDP lamah kan ti dawn nia a ti a, thahnem tawk tak chu kan beisei a ni.

Tin, RKVY leh NABARD lam atanga kan hmuh tur bakah hian Turial catchment area treatment atan sum hmuh kuminah hian kan inbeisei a, tun financial year chhung hian. Chu chu Turial tuikhua siltation te a khah mai a hlauhawm a vangin venhim a ngai nasa em em a. Chung atana hmania tana kan tih chu a ni a.

Tin, Soil Department hi Rubber Board of India, Ministry of Commerce & Industry nena tang kawpin nasa takin Mizoram-ah hian hmalak tum a ni a. An rawn tum dan phei chuan hectare 15,000 lai kan rubber chinna kum nga chhunga tan earmark a ni a. Chutiang chu kan dinhmun a ni a, a tha em em a, he thil anga hnathawktute tana eizawnna tha hi tunah hian a awm chuang ang em aw ka ti a. A chhan chu hectare khatah nuai 3 loan min pe thei a, an tum dan anga a awm a nih chuan, family khatin hectare hnih an ti thei ang a, loan hi a rulh leh hun tur kha kum sarah hnuah a ni. Hei hi a thatna em em chu a ni a, amah leh amah a rawn inrul thei dawn a ni. A pung hi cheng 7/- anih laiin tyre company lam pangin cheng 3.50/- min rawn tum sak ang a, a beneficiary, lo neitu, huan neitu kha chuan cheng 3.50/- chauh kha a pung a rulh tur a ni dawn a ni. Chuvangin hei hi thil ropui, thil tha tak a niin kan hria a.

Tunah hian Tripura te kan sawi thin a, a chinna chu a ni mai a a hnaiah chuan, chutiang ai chuan tuna hnaia kung sing 2, sing 3 nei ho kan mihausa-te leh a dang hnai ve mek ho pawh hian Tripura aiin khulaia hnaitute an han chhawr pawhin a hlawk zawk an ti a. Tunah hian kung nuai 2 lai hnai theih kan han neih ve tak avangin tun current financial year-ah hian rubber machine leh a equipment a hnai atanga a lo dawhna thleng leh a herna tur machine te kha 100 lai subsidy-in kan pe thei nghe nghe a ni.

Rubber & Allied Crop Development Board hi mumal takin tunah hian kalpui mek a ni a, Board-ah hi chuan DPR te, project te siam hnem ber kan ni mai awm mang e aw kan ti a. Amaerawhchu, Covid-19 avangin kan hotute'n bawhzuina hun tha an nei thei rih lo a, tunah hian a la inchiah mek a ni tih ka sawi duh a. Tin, vannei ka inti khawp mai a, Board-a kan Vice Chairman, Pu Lalrinsanga Ralte hi a zuan a zang a, kawng engkima kan hma theh a ni a. Ka vannei thei reng reng a, sawrkar hmasa, term hmasa zawk khan Pu

Lalrinmawia Ralte Parliamentary Secretary-ah ka nei a, term hnihnaah khan Lt. Col. ZS Zuala ka nei bawk a, an ni kha an tha em em a. Ka han ngaihtuah mai hi chuan Ralte ho hi tih an lo nuamin an lo fel mang e aw, pamhamna leh hetiang reng reng nei lo mai hnam hi an lo ni a. Ralte nih pawh hi nuam ka ti hliah hliah mai a, ka lo ni ve bawk si a. Sailo nih pawh hi a nuam viau tho ang tih chu ka ring a.

Tichuan Rubber Board hi Regional Office pawh kan nei thei ve dawn niawm a ni a, a hmuna atan hian kan Directorate chung khu thlan a lo ni a, an inbuatsaih mek a ni. Kha kha Soil Department-ah chuan ni mai ta sela.

Art & Culture Department hi sum kumina min ruahman dan han en hian kan hlawhte hi chu kan inpe thei turah ka beisei a. Hnathawhna tur em em awm lo mahsela Central-a kan project thehluh te hi sanction ve te pawh a ni a. Kuminah pawh hian District Museum Lunglei-ah leh Lai Culture Center-cum-Auditorium hi kan sa ve mek a. Lunglei Museum hi ₹503,61,000/- man a ni a, Lai Culture Center-cum-Auditorium hi ₹103,02,000/- man a ni. Art & Culture Department tana sum ruahman hi tunah hian Member zahawm tak tak ten kan pi pute hmun hluite hi hmuhalh leh chei that ni se an ti a, a awm pawh kan ti a. Kan tih lai mek a ni nghe nghe a, nikum phei kha chuan kan Chief Minister zahawm tak Finance Minister hian kan budget bakah SEDP atangin cheng nuai 100 helam hawi GIA atana in lo sem yeah tiin min rawn pe a, a lawmawm kan ti khawp mai a. Art & Culture hi miin thiltithei tak department ni angah leh culture humhalhtute tak tak angah min hmu a, kuminah hian dil hi an tam leh zual a. Amaherawhchu, sum harsat takna avang hian khatiang ang sum kha dawn tur kan nei ta rih lo va. Eng pawh ni sela, hun tha a inherchhuak ang a, kan hotute'n hei hi chu an hria a, an theihnghilh loh a ni tih hi kan hmuw dan a ni a. Chuvang chuan kan hotute hian min hriatzui kan mamawh hle dawn a ni.

Tin, ram a lo changkang a, mithiam keini Zofa-ah te pawh kan lo tam telh telh a. Ph. D degree nei, hna thawk mumal vak chuang loa he lama research te tih chhunzawm leh zela lehkhabu tha tak tak ziak thiam tam tak kan lo nei ta a. Hengho hi kan culture vawng himtute zinga tangkai ber an ni a. Chungte chu heng lehkhabu ziak te hi an lakhawma, a tha tha te leh a dil mi harsa, lehkhabu ziakna lamah leh rilrua changkang, ngaihtuahna fing, khatiang ho financially-a sound si lo te pawh kha tanpuuin, dawmchhuaha dawm kan ve an ngai a. Chung lehkhabu siamte lo lei sak ve thin hi Art & Culture ten a an tih dan a ni a, tunhma atangin, tun hunah pawh hian kan la chhawm zel a. Amaherawhchu, tuna mithiam tam dan leh lehkhabu tha tak tak lokal chho thar, han ziak thar tam dan kan sum neihah hi chuan cheng nuai 10 te hi kan neih ve sa a ni a. Chuvang chuan hengah te pawh hian hriat chhoh zel chu ka la mamawh dawn tak zet zet a ni tih kha ka sawi tel duh a.

Tin, 2020-21-ah hian project tam tak central sawrkarah kan thehlut a, hengte pawh hi a hlawhtlin ngei kan beisei a, 12 lai tunah hian kan han thehluh awm sa a ni. Henga state matching tur erawh chu kan neih sa a awm a, keimahni department-ah min pe lo mahse, hetianga tana kan dil hi kan Finance Minister hian vawikhatmah min hlawhchham tir ngai

lo a, department dangah pawh. Chuvangin, kan lungngai lo a. A vaia tuna project kan han thehluh phei hi chu cheng nuai 11407 chuang lai a ni tih kha kan sawi duh a. A dang kan hnathawte hi a tam viau a, mahse hetiang ang hi hnungramah min nuihzat leh palh ang tih hi ka MLA puite hian ka hlau deuh a, kan han react tawh lo mai ang a. Kha kha tawk leh mai se la.

Demand No. 27, District Council & Minority Affairs hi tlem te han sawi leh ila. Autonomous District Council te hi an hlawh bak chu sum hi a tam lo thin khawp mai a, kum dangah pawh a tam ngai chuang lova, tun kumah pawh ngai kan awh chho leh a ni. Hmasawnna hnathawh tur hi he kan budget-ah hian a lang vak ngai lo hrim hrim a, chuvang chuan project Council area lam atang hian siam thin a ni a, tichuan, chu chu Ministry-ah thehluh niin anni hian NLCPR atang te, NEC atang tea kan dilte hi priority min pe ve thin a. Chuvangin, tun hunah pawh hian chutiang anga kan kal chu a ngai leh dawn a ni. ADC te inenkawlna a tana sum pek hi grant-in-aid bakah hna hrang hrang thawh nana sum kan hmuh zat District Council hnuiah hian kumin a tan chuan cheng nuai 1093.38 a ni a. Heng hi Grant for Creation of Capital Assets hnuiah dah a ni. Tunah hian PMJVVK hi hemi hnuiah hian project 15 lai, zawhnaa lo chhuak kan han sawi thuak thuak ang khan a sanction kumin kal taah khan kan nei a. Kan vannei khawp mai a, Covid-19 lo hran hma chiah khan central lamin CSS a rawn tih hlei thei tawhloh hma chiah khan sanction kan hmu hlauh mai a, 1<sup>st</sup> installment cheng nuai 10286.85 lai a ni a, kan sorkar pawh hei hian min chhanhim NASA viauin kan hria a, kan lawm tak zet a ni.

Tichuan, hei lo pawh hi Social Welfare atanga he department hi la chhawng kha kan ni a, an hman loh on-going cheng nuai 1,27,44,000 lai kan Department-a rawn transfer a awm a, heng project-te hi minority concentration area atan bika siam a ni. Helaia tlem te han sawibelh ka duh chu, “engatinge Sports Department tan chauha hetiang anga tih anih bik” tih ang lek leka. a bialtu thenkhatte pawh lawm lo lek lek te pawh kan awm a. Engpawh ni sela, hei hi Sports Department chauh a huam a ni lo a, a dang Education leh thil dang Health Department-te leh mipui ina an hman tur ang chi khatiang angte pawh kha a huam vek avangin, tuna project kan han siam lehah chuan chu lampang chu a rawn hrut chho ve dawn a ni. Chuvangin, kan zavaia tan hei hi thil tangkai tak tur a ni.

Helaia kumina sum kan han pek danah hi chuan Autonomous District Council-te inenkawlna tur grant-in-aid ruahman dan chu hetiang hi a ni-

LADC- GIA salary atan cheng nuai 17,39,51,000/- a ni a, GIA non-salary an hlawh ni lo, development leh thil dang han thawhna tur te kha a ni a. A hmingin token ang leka dah a ni a, cheng nuai 13,00,65,00,00/- a ni.

MADC - GIA salary atan cheng nuai 14,66,31,300/- a ni a, GIA non-salary-ah cheng nuai 12,30,62,000/- a ni.

CADC - GIA salary atan cheng nuai 9,79,4,25,000/- a ni a, GIA non-salary-ah cheng nuai 6,62,98,000/- a ni. A vaiin, nuai 4,50,52,49,000/-

Hemi PMJVVK hi kan sawi theuh a, kan lawm nge, engnge ni ka hre lo a, sawi a hlawh deuh bik a, tlemte in han sawi belh ilangin.

Hemi 11<sup>th</sup> Five year plan-ah hian, cheng nuai 48,54,93,000/- kan hmu a, 12<sup>th</sup> Five year plan-ah khan cheng nuai 8,56,49,000/- kan hmu leh a. Tin, 2017 Five year plan an thiaha, NITI AAYOG anga kan han kal chhoh tak 2017-2018 chhung khan cheng nuai 646/- hmu a ni a, 2018-2019 khan cheng nuai 472/- hmu a ni a. Tunah MNF sorkar a lo ding chho a, kan Chief Minister-in “central lamah theihtawp kan chhuah anga sum tam tak a awm a, chumi chu haichhuah kan tum dawn a ni” a tih kha hre rengin theihtawp kan department hotute’n an han chhuah ve a. Chutiang chuan ministry-in a ngaihpawimawh lam hawi zawnga bul tanin Sports Development-a concept paper kha siam uar a ni a, tichuan project 15 tuna kan sawi tawh ang khan sanction kan han hmu leh a. Hei lo pawh hi project dang kumin financial year chho ah khan han theh luh leh a ni a, a then phei hi chu approve tawh a ni a, approve loh hi enge maw zat pawisa awm dan a zira en tura hnutchhiah a ni. Chu chu kan han sawi duh zual chu ni mai selanganin, Pu Speaker.

Power & Electricity hi sawi in tam a, a bu chhah lawih khawpin in thusawi kha reactna a awm a. Tichuan department-ah pawh hian tlem te ka han sawi duh chu, kumin chho ah hian hma thar lakna hrarpa han chhuan em em tur kan neilo ti ila mahni inmualpho pawh kan ni thei a, amaherawhchu thudik tak hi he House ah hian kan sawi thin a thain ka hria a. Tuna kan neihsa siam that leh tuna kan neihsa anga eng regular taka kan mi leh sate hnena pek chhuah hi kan department-in a kan tum a ni pakhat maia tun hun atan hi chuan. Chuvangin a bul tan thar, thil lian tham neih kan neilo ti ila, a sual tampuiin ka ring lo a.

Electric hi nitin kan nunna tana leh kan eizawnna, eng tel lo chuan chaw leh tui ang hiala kan mamawh *necessity* niin keini department hi chuan kan ngai ve a ni. Transformer leh line te alo hlui a, alo rei tawh em em a, chungte chu tun sawrkar maiah nilo sawrkar hmasa-ah pawh kan buai chhohna vek kha a ni. Kan transformer a chhia, a puak kan ti, khatiang ang kha a ni reng a, chuvang chuan eng han neih loh dup te pawh hi alo awm ve thin a ni a. Hengte hi theih tawpin kan neihloh ang angin kan neiha te suan kual velin, a chhia kan siamna te, a lo siam that anisha a dang va thlak lehin khatiang ang khan kan departmenta thawk tu kan engineer te hi an buai ve em em a.

Ka sawi tawh thin a, electric department-a a field worker ngat te phei hi chu kan Police Department leh kan Health Department-a nurse te, doctor te ang deuh hian thla 12 thla 13 hlawh hi la awm an niin ka hria a. Veng tinah hian kan chhut duh chuan kan thimin, ‘khawiah nge linesman, khawiah nge SDO, EE, JE’ kan ti a, kan ko a, zan khaw tai rek rek thlenga tlaivara hnathawh hi an ngah em em a ni. Post create 2000 chuang kan nei a, chutah chuanin post vacant hi 900 dawn kan nei a ni. Tin, tun kumin financial year hi a zawha

nakum 2022 ah phei hi chuan SDO direct kan tih ang te hi kan nei miah dawn lo a ni. Chutiang ang te chu kan dinhmun a ni a, kan indaihloh em em dan chu; chutiang ang kan ni chung chuan tuna mite hian kan indaihloh lutuk lang loin NASA takin an tha leh zung an thawh a, an seng a tun hun hi min thlen thei a ni tih hi helai MLA zahawm tak tak he House zahawm tak hian min hriatpui ka duh takzet a ni.

Tichuan sum dah lam hi chu kan hre tlang vek a, sawi pawh hi a ngai lova, amaherawhchu kan sum dah hi kum kal ta ai chuan a tlem deuh vek a, a actual a han ti chuan kan hlawh te hi chu kan indaih ngawr ngawr mai awm mang e kan ti a. Chutia a tlem vek kan tih lai chuan, helai subsidy-ah hian cheng nuai min han pek belh ve leh a awm a, 1433 in a tam ta angin budget pumpui atang hi chuan a lang hman a ni. Amaherawhchu heng te hi kan hria ang a, tunah pawh kan eng chhit man a rawn to deuh dawrhna anga lang te pawh kha subsidy kan pek theih loh vang a ni a, chuvangin hei hi development lam atan chuan engmah a awm chuang lo a ni tih kha kan hotute'n in hriat tho ka ring a, ka sawi nawn ve mai mai a ni.

Heng minor works kan tih te hi helaiah hian kan hotute min hriatpui ka duh a. Minor works-I, power pekna kawnga harsatna awm han siamthatna, maintenance atana kan hman deuh ber a ni a, hengte hi a bei tham deuh a, a hrehawm hi kan ti thin a. Kan department hi hei kumthum kan kal ve chu a ni mai a, MR pakhat pawh hi kan la la theilo reng reng a ni. A hrehawmna em em chu, kan linesman, helaia thawktu te banah an lawn a, an in mantir palh a, khatiang khan an lo thi a, a thi chhungte han thlamuanna tur emaw, an nupui te, an fate emaw, khang aia casual employee-ah tak ngial pawh kan dah theilo hi a hrawm kan ti khawp mai a, kan hotute hian min lo hriatpui ka duh a. Ka mangang in Finance Officer-te, DP & AR officer-te ka sawm a, ka office-ah kan sawi ho a. Kan hotute nen kan indaih lohzia leh kan mangan ziate kan sawi a. Chutiang chuan tunah hian post fill-up ban a ni a, creation ban a ni a, hengah hian kan ti thei lo a ni tih chu kan hria.

Amaherawhchu heng kan maintenance-ah te tal hian sum eng emaw zat hi min rawn dah pun belhsak ve ula, chuta tang chuan a hrana helama lakna tur MR chuti zat la rawh se tihna tur awm chuang lem lovin, sorkar MR dik tak pawh ni chuang lovin, i sawi dawt mai ang, casual employee ang tal pawhin eng emaw zat te hi chu kan lo la ve teh ang, a hah pawh hi an han lutuk a ni kan lo ti a. Anni pawhin awm an ti khawp mai a, hmai chhanah chuan. Mahse hmai chhana awm tih kha, ‘hei, kan committee bawk a min rawn pe mial mahna, bei nge sei run dung’ tiin kan han dil a. Dilna te kan committee zawh veleh, a kar lehah kan han thehlut zui a, *tua tla ang vang vang* hi a ni leh ringawt mai a ni. Chuvangin, eng kan han neih leh lo thin deuh te pawh hi a department-a Engineer-te emaw, a Minister-te emaw mawhphurh ber hi a ni bik lem lo ve tih te pawh hi min hriatpui ve ka duh a ni. Chungte chu ka han sawi duh pakhat a ni. Thahnemngaihna vek a ni a heng hi.

Tin, ‘hnathawh em em kan nei lo’ han tih khan ka hmaa mi ang khan nitrozepam tablet 10 lek man tih te kha chu sawi duh ila chu sawi tur a tam mai a. A za tel, a sing, a nuai

tel pawh hian sawi tur chu a awm theiin ka ring a, amaherawhchu, kha kha chu tul lo mai selangin. Hei, hna thawh zawh tawh hi kumin chhoah pawh hian kan engineer-te, kan department-te thahnemngaihna avangin hmun sarih laiah hian thil lian tham tak tak, 782 lakhs hi a tlem pawl a ni mai awm mang e. Chutiang chuan a total-in ka han sawi leh law law mai ang a, ₹16,036.36 lakhs man lai hi kuminah hian kan thawk zo a ni. Hei hi thil ropui tak a ni a. Heta kan thawh zawahh hian 5 mW Tlawva, hengte hi ₹7,340 lakhs man a ni a, commission theih reng tawh a ni a. Amaherawhchu a lui a tet deuh hlek avangin kan zuk commission ang a, kan hawng ang a, eng kan nei lo leh nghal palh mai ang tih ka hlau deuh a. Chuvangin, furah tui a tama eng han chhit chhunzawm nghal char char theih turin kan ti a ni. 33 kV line, Kau-Tlabung small hydel project, Thenhlum nena inkara mi hi ₹782 lakhs man lai a ni a. Hei pawh hi thawh zawh tawh a ni a, commission a la ni lo a ni.

Tin, hna kal lai pawh hi a tam khawp mai a, keimahni sawrkar hnuiah ringawt pawh hian pasarh lai a awm a, chungte chu ka sawi hman lo vang a. A man hi chu ₹19,939 lakhs lai a ni. A hna hi a te chhe lo va, 133 kV line a ni tlangpui deuh a. Chutiang chuanin eng tha zawka kan hmuh theihna tur atana sum central sorkar atanga kan hmuhte atanga kan thawh a ni. Tin, keimahni department kaltlang thova central lam atanga an rawn thawh hi tam tak a ni a, a total cost hi cheng nuai 43,634 man lai thawhmek a awm bawk a ni. Project proposal thehluh hi kan ngah viau a, tunah hian khangho zawng zawng kha chu kan sawi seng lovang a. National Infrastructure Pipeline (NIP) kan tih atang hian kum 5 chhunga hmalakna turin a hnuia tarlan ang hian proposal kan thehlut a, hengte hi chu kan hmu ngei turah kan beisei a. Transmission Sector-ah hianin cheng vaibelchhe 849, nuai 68, Transmission Sector atan hian cheng vaibelchhe 215 nuai 63, Distribution Sector atan hian cheng nuai 5934 sing 6 leh sang 9 a ni a. A vaiin cheng vaibelchhia 7000 a ni. Chutiang chuan tunah hian National Infrastructure Pipeline-ah hian Project thehluh mek kan nei a.

Tin, kan hmalakna kal mek kan hre tawh a, zawhnaah khan react-na tur then khat khatte a la awm na chungin, solar hi kan hotute, kan Chief Minister zahawm tak pawh hian tuna kan tih bak Vankal, mega watt 20 bakah Saitual, Keifang mega watt 10 leh Tlunvel mega watt 2 bak hi engnge tum laklawh deuh te in nei em a ti a hmanniah. “Nei e, hei aia tam zawk Lungpher saw, kuthnathawktu VC leh khawtlangin ram tha tak mai min pe a, mega watt 30 pek chhuah theihna tur ani a ti a; chumi hmunah chuan han kal ula, han enchiang teh u, hengte pawh hi kan tih a tha ang” a ti a. Phur takin a niin min tumpui a ni. Hengte hi a hmasaah kan han kal ang a, kan han en ang a; keima duh dan tak erawh chuan tuna Saitual hi bul han tan nghet phawt ila, chuta tang chuan kal zel ila a tha awm mang e aw, tih te ka ngaiantuahnaah a awm a. Tunah North East-ah hian an la ti tam lova, a hmasa ber kan ni nghe nghe a. Tlunvel, khi khi a chhuanawm ve a, mega watt pe chhuak tam theilo mahsela, a hmasa kan lo nih venaah hian thil tha tak niin ka hria a. Chu lo pawh chu wind (thli) lam atang hian thil heksak lo zawka tiha, to deuh pawh niselingin, khawvel ram dang ten engti ang takin nge an lo siam a, an lo enchhin ang ngawt lo deuh hian technology changkang zawk te pawhin a tihtheih niin kan hria a. Chungte pawh chu han dapchhuah kan tum mek a ni.

A tawp ber atan chuan, Pathianin min siam dan hi kan zir chiana kan enhian deuh fe a tha awm mang e aw ka ti a. A chhan chu, a ram leilung pianziaah te, thil dang vak atang hian power hi min siam chhuah tir a tumlo em ni ang aw ka ti a. Kan ram leilunga lui tha tak tak, hmundang ai pawha tha zawk ni awm tak te kan nei nual a, hengte hi power kan neihna tur atan chuan vawi khatah nasa deuh mahse, kan state ina kan siam ve chuan avaia kan neih tur anih hlawm avangin, hengte hi bawhzui that leh deuh chu a ngai mang e tih te rilru chuan ka ngaihtuah a. Chumi zingah chuan Tuirini kha kan ti ta lova, Tuivawl hi mega watt 42 lai pechhuak thei tur project tunah hian siam mek a ni a, an zo tawhin ka hria a. Chungte pawh chu kan bawhzui thata kan tihchhoh leh chuan, avaia kan ta tur anih dawn avangin kan CM zahawm tak hian theitawp min chhuahpuia, central lamahte loan lo ang deuhte pawha min tihpuria, kan hmuh theih chuan kan Engineer te hi, Civil Engineer tam tak kan nei a, CE thlengin an awm a. Chutiang chuan vawiin hian hna an nei lo dawn, an hlawh pangai an la ang a, chhawrna tur hi kan ngah lo mai ang tih ka hlau hle a. Chuvangin, kan neihsa angte hmang tangkai thei tura kan tih tulin ka hria a ni. Chung zawng chu ka khaikhawmna ni mai se.

Tichuan, Pu Speaker, ka department chan-

Demand No.	Purpose	Amount (in ₹)
23	Art & Culture	12,91,93,000.00
27	District Council & Minority Affairs	4,51,06,49,000.00
33	Land Resources, Soil & Water Conservation	21,41,38,000.00
39	Power & Electricity	7,04,72,48,000.00
<b>TOTAL</b>		<b>11,90,12,28,000.00</b>

House zahawm tak tak hian min pass pui turin ka ngen e.

SPEAKER : Awle, tunah chuan Minister zahawm tak Pu R. Lalzirliana'n a department enkawlte-

Demand No.	Purpose	Amount (in ₹)
23	Art & Culture	12,91,93,000.00
27	District Council & Minority Affairs	4,51,06,49,000.00
33	Land Resources, Soil & Water Conservation	21,41,38,000.00
39	Power & Electricity	7,04,72,48,000.00
<b>TOTAL</b>		<b>11,90,12,28,000.00</b>

House-ah pass a rawn dil a. Remti apiangin, 'remti' ti rawh u le. Remti lo kan awm em? Kan awm chuan, 'remti lo' ti u la... (Remti lo an awm lo)

Aw le, Pu R. Lalzirliana Demand-te –

Demand No. 23 - Art & Culture,  
Demand No. 27 - District Council & Minority Affairs;  
Demand No. 33 - Land Resources, Soil & Water Conservation;  
Demand No. 39 - Power & Electricity Department,

Avaia belkhawm ₹11,90,12,28,000.00 chu House-in lungrial takin a passed ta a ni.  
(*Pu R. LALZIRIANA, MINISTER: Pu Speaker, ka lawm e.*)

Vawiina kan business, kan tih tur chu kan lo zo leh ta a, kan chawl leh rih ang a,  
Naktuk March Ni 16, 2021, 10:30 AM-ah kan thukhawm leh dawn a nia.

*Sitting is adjourned. (8:08 PM)*